

# MATIW

## *Yeisuw delen* *(Luk 3:23-38)*

- <sup>1</sup> Buk towen waseg delen Yeisuw Kelis, tabun kweiboug Deibid, kweiboug tonen tabun Ebelam.
- <sup>2</sup> Ebelam natun Aysak. Aysak natun Yekob. Yekob nitun Yud siney tuwan budan.
- <sup>3</sup> Yud nitun Peles son Selak. Ines Temal. Peles natun Eslon. Eslon natun Alam.
- <sup>4</sup> Alam natun Amminadab. Amminadab natun Nason. Nason natun Salmon.
- <sup>5</sup> Salmon natun Bowas. Bowas inan yagan Leyab. Bowas natun Obed. Obed inan yagan Lut. Obed natun Desiy.
- <sup>6</sup> Desiy natun Deibid, mtowen king. Deibid natun Solomon. Solomon inan mtowen Uliyak nakwaw. Deibid bo ikow vin manawen.
- <sup>7</sup> Solomon natun Lekoboum. Lekoboum natun Ebiy. Ebiy natun Esap.
- <sup>8</sup> Esap natun Yosepat. Yosepat natun Yolam. Yolam natun Usay.
- <sup>9</sup> Usay natun Yotam. Yotam natun Akas. Akas natun Esekay.
- <sup>10</sup> Esekay natun Manas. Manas natun Emon. Emon natun Yosiyak.
- <sup>11</sup> Yosiyak nitun Yekonay siney budan, tutan ikoulups ineis Babilon.
- <sup>12</sup> Ineis Babilon ikous, Yekonay natun Salatiyel. Salatiyel natun Delububel.

- 13 Delububel natun Ebiyud. Ebiyud natun Ilayakim. Ilayakim natun Esol.
- 14 Esol natun Sadok. Sadok natun Ekim. Ekim natun Eliyud.
- 15 Eliyud natun Eliyesal. Eliyesal natun Mattan. Mattan natun Yekob.
- 16 Yekob natun Yosep, mtowen Meliy namwan. Meliy natun Yeisuw, mtowen yagan Kelis.
- 17 Yeisuw delen, tasilamaw Ebelam waseg, tavin Ebelam, tayuwein Ebelam natun, tatounun Ebelam tabun, tavaşin Ebelam tabun natun, beibus ee... tutan Deibid waseg, babiweis sinawatan teivas. Tasilamaw Deibid waseg, tavin Deibid son natun, tatounun Deibid tabun, tavaşin Deibid tabun natun, beibus ee... tutan min-Babilon ikawes inawes wasiven, babiweis sinawatan teivas. Tasilamaw tutan ineis Babilon tavin ee... tutan Kelis waseg, babiweis sinawatan teivas.

*Apwaw Yeisuw Kelis*  
(Luk 2:1-7)

18 Nakabsilamaw Yeisuw Kelis maʁawan. Inan Meliy nibokes vagan beivays son Yosep. Nag imasis son, tage bo isum-wan; Kululuwan Yowbad isek Meliy mo isum.

19 Namwan Yosep ikin neisum, itilikon, idok kid bipiyev. Taw towen tadidumwal, nag bilivan wavtakon ven; adok vin beivag anmwasin; misi-naka bikayeb binoun.

20 Ininuway maʁawan ee... imasis, anmikon waseg Yowbad natakayob ikin neim, idibek, ilana, “Yosep, yaʁoum Deibid tabun yak, bweina kuvays soum Meliy. Awoum beivag nanoum

babaw. Yowbad Kululuwan isek mo isum ikakudapom.

<sup>21</sup> “Igaw mo bikop natun kudataw; e, kudok yagan Yeisuw, mtowen bikatinabwes nagamag sinap kalbaleb waseg.” <sup>22</sup> Youd towen ikamat peinan Yowbad anilivan mawan. Napalopit kweiboug nilivnek mamagina:

<sup>23</sup> “Nakubukwab igaw naptabod mo bikop natun kudataw, yagan bidokes Imanuwel.”

Wawun yeg towen ‘Yowbad sod tasesus.’

<sup>24</sup> Yosep imasis ikous, ikit, ikanow aygan Yowbad natakayob, ivays son nakwaw.

<sup>25</sup> Ta-imasis son; tanaban ises ee... mo ikop natun, taman mo idok natun yagan Yeisuw.

## 2

*Tassinaps nimeis, silmanin biyakawns Yeisuw waseg*

<sup>1-2</sup> Tutan inan nikop Yeisuw ven Betelem waseg, wawnuwan ven Yudiy, ven babaw siking Elod. Tassinaps mwasanin siven wanuvid mo imeis Yelusalem, ilansa, “Yakamiy min-Yudiy miking kweivaw, avanuy mikopweyas? Peinan nakakin anwutun kweivaw neipel, mwana nakam kid bakakulul wamatan.”

<sup>3</sup> King Elod iligen mamagin, ivag aspwayat siney min-Yelusalem.

<sup>4</sup> Mapun ilivan vagan meivek tasiyas tanuwg-wes lun, sisiyas takatimlakeins kaleiwag, katuyouns bimeis.

Imeis mo ikatugan, ilana, “Kelis avanuy mikopweyas?”

<sup>5</sup> Ilansa, “WaBetelem, wawnuwan ven Yudiy; peinan palopit teitan nilel Yowbad anilivan mamagina:

<sup>6</sup> ‘Yakoum ven Betelem wawnuwan ven Yudiy, bo kumug.

Nag kukuyeim Yud guyawaw watiblous, nag. Peinan takaleiwag bikamat ven Betelem waseg; mtowen mo bikaleiwag gungamag Yisleil wasigeis.’

Palopit towen anilivan mamagin.”

<sup>7</sup> Wankuyeim Elod mo idawes bimeis tassinaps, tasiyas mwana nimeis; siney tasiyas illivans, ikatugan, ilana, “Wutun towen nukukines, aveiyam waseg neipel?”

<sup>8</sup> Ilivans ikous, mo ikayabes bineis Betelem, ilana, “Gwad towen kuneves beibwein; kukin bukubanes, kuyums kumeis, kudibakeigs; yey mo ban akulul wamatan.”

<sup>9</sup> Iliganes aygan King towen, mo inounas ineis. Wutun towen, kweiboug nikines wanuvid, bo imgwayes in, iton wakunuwatan apwaw nabunatum nimsikey-yay.

<sup>10</sup> Ikinis wutun towen, mo imwasaws avakaein.

<sup>11</sup> E, isiws bunatum wanuwan, ikines apwaw son inan Meliy, ikululs wamatan, iyakawns waseg. Ikous, mo ikaliyowes siwliyoug isiwyoubus apwaw towen, isekes goul, o pilankisens simasim seikwan, o mul silmanin won takanig biptumis. Imulouls mawan ikous.

<sup>12</sup> Wankuyeim asmikon waseg Yowbad mo ikatimlakes awoum beiyum binekes Elod, mapuna iyums inoyes kadetan ked, ineis wasiven.

### *Isawls ineis Yidipt*

<sup>13</sup> Wankuyeim Yowbad natakayob teitan mo inek Yosep, Yosep anmikon waseg, ilana, “Kutamanaw, kutokes gwad son inan, kusawls kuneis Yidipt, kusesus ee... tutan balivan mo kuyums. Peinan Elod binineiv gwad townen, biban kid bikatimet.”

<sup>14</sup> Yosep ikanow aygan, itamanaw boug waseg, itokes gwad son inan, ineis Yidipt.

<sup>15-18</sup> Elod gog bikayyamat tasiyas tassinaps, ikayyamata ee... nag; nanon ilana, “O bo ikatidavigs.” Kapasal nuwan, ikayabes nagamag, beiweiys kid apwaw tasiyas tawaw Betelem o walasin ven wasigeis, ilana, “Tasiyas asibweilim katanok o akweiy kuwaweiyisa beikous.” Peinan nikatugwan tassinaps wasigeis avei-tut nikop gwad townen.

Idok kid Yeisuw bikatimet, tage Yowbad anilivan kweiboug napalopit Yelemay nilivnek mamagina:

“Ven Lem waseg mo biliganes valam avakaein.

Lakel o vinay-nen Yisleil bivlams nitsiyas pines.

Ta-mawan bivkakes beitout ninous, peinan nitsiyas bo imtakous.”

Yelemay anilivan kweiboug, bo ikamat tut townen waseg. E, Yosep siney angamag Yidipt waseg isesus ee... ikanig Elod. Peinan kweiboug napalopit nilivnek mamagina:

“Natug waYidipt mo adouw im.”

<sup>19-20</sup> E, Elod ikanig, Yowbad natakayob mo inek Yosep, anmikon waseg, igaw nises Yidipt, ilana, “Kutamanaw, kutokes gwad son inan, kuneis

Yisleil; peinan townen sivinan beiweiy gwad bo ikanig. Kameiliw bo ikous.”

<sup>21</sup> Mtowen Yosep itamanaw, itokes gwad son inan ineis Yisleil. <sup>22-23</sup> Iligen Elod ikanig, o Elod natun Alkelaw, taman nakaleiwag bo ikow, ikaleiwag ven Yudiy waseg. Yosep anpwayat beiyum ven townen waseg, kweitan sinap ikakin anmikon waseg, mo inoyes kidenen Galiliy, ineis ven Nasalet, isiwas. Mapuna ikamat palopit anilivan mamagina:

“Bidokes townen gum-Nasalet.”

### 3

*Yon tabibaptaysein gamags inageiguy townen  
(Mak 1:1-8; Luk 3:1-9, 15-17; Yon 1:19-28)*

<sup>1-2</sup> Igaw nisesus Nasalet mo Yon isilamaw nageiguy ven Yudiy wanawoud, mtowen tabibaptaysein gamags, ilana, “Bikanavin ninoumiy, sinap kalbaleb kulavewas, peinan Yowbad kakita bisilamaw nakaleiwag.”

<sup>3</sup> Palopit townen Isaya kweiboug nilivnek Yon nawotet, ilana,  
“Aygan bivakaein wanawoud, bilivan,  
‘Kukidumwalus daGuyaws inaked; kuvages beib-  
wein.’”

<sup>4</sup> Mtowen Yon anakweim wunuwunun kamel, anawat kaleivin kamel, kan gog kulipaw son kitoul.

<sup>5-6</sup> Mo inounas inekes Yon, min-Yelusalem sisiyas Yudiy gimgilis, sisiyas wunsiyas ven wadadan lay yagan Yoldan, ikamats asisinap kalbaleb, Yon mo ibaptayses tasiyas lay Yoldan waseg.

7-10 Ikin tasiyas Palisiy sisiyas tasiyas Sadusiy imimeis vāgan bibaptayses, mo ikānes, ilana, “Mwatet yakamiy, adok teitan tan niguyeimiy mapuna kuwenes Yowbad, amipwayat igaw mo bikatimop amisinap kalbaleb. Adok nag kupiyaves amisinap kalbaleb. Kwatimlakeigs miwotet bwein vāgan bakin amisinap kweivaw nukukwawes, bwanabwein. Awoum kunin-uways, kulansa, ‘Yakamey bwein, peinan Ebelam delen yakamey.’ Nag gog, Yowbad kadilok dakul tasiyas bivag mo bimplavags Ebelam delen. Ebelam delen mamagina kay. Tut kadilakus mo beiteiy kay kasiyas. Kukin amata kay nag beivag anagin mo beiteiy, bilev bein wākov.”

11-12 Yon mo ilivan, ilana, “Yey, bo nabaptayseimiy yevagam waseg, peinan bo kulavewas amisinap kalbaleb. Igaw teitan beim, tatawtoun; yey nag kadilok bakew inasandol, peinan guyaw avakaein. Mtowen beim mo bibaptayseimiy Kululuwan Bwanabwein waseg, mamagina kov. Mamagina nakaytuk wanaman biwaway anawit, vāgan bikow anagin bwanabwein binow waseigous, simwan gog bisen bigigob kov tuta babaw.”

*Ibaptays Yeisuw*  
(*Mak 1:9-11; Luk 3:21-22*)

13 Wankuyeim Yeisuw mo ilisow Galiliy in Yoldan, inek Yon, vāgan kid bibaptays.

14 Yon idok kid bisilbwed, ilana, “Kadilok kubaptayseig yey, awoum yey babaptayseim yak.”

<sup>15</sup> Iw to Yeisuw, ilana, “Bweina kuvag nagein. Kadiloka sinap babaw bwanabwein bitayakous.” Mo itam.

<sup>16</sup> Ibaptays Yeisuw ikous, igalag, libalab bo itavis, Yowbad Kululuwan mo ikin, ankakin mawana bwabun italbelub im, iton Yeisuw waku-nun.

<sup>17</sup> Aygan teitan walbalab mo iligen, ilana, “Townen Natug bwanabwein; singay ibwein nanoug waseg.”

## 4

### *Iyakwen Yeisuw*

*(Mak 1:12-13; Luk 4:1-13)*

<sup>1</sup> Yowbad Kululuwan mo itok Yeisuw, inow wanawoud, vagan Seitan biyakwen.

<sup>2</sup> Ipos sinawavas yam; ta-kweitan kan ikam yam waseg o boug waseg, nag. Ikous, mo ivag anamoun.

<sup>3</sup> Tayakwanein gamags mo isap, ilana, “Magat yakoum Yowbad Natun yak, amlivan kusek dakul tasiyas mo bimlavag bled bukukwam.”

<sup>4</sup> Yeisuw ikatimop aygan, ilana, “Bukitab waseg livan nises mamagina:

‘Kan makaw nag biyamov gamag; nag. Tage Yowbad anilivan kweitan kweitan mo biyamoves gamags.’”

<sup>5-6</sup> Ikous sinap townen, Seitan mo itok Yeisuw inow Yelusalem waseg, itamnow Yowbad nabunatum wakunuwatan, idibek, ilana, “Magat yakoum Yowbad Natun yak, kwaspepel kun watinow. Nag aveiyag bivag, peinan livan nises Bukitab waseg mamagina:



‘Bo bisek natakayobs siwotet vagan bimtaka-  
vateims, binupeims yak; mata ge dakul  
iweiy kakeim.’ ”

<sup>7</sup> Yeisuw idibek, ilana, “Kweitan livan nises  
mamagina:

‘Awoum kuyakwen muGuyaw Yowbad.’ ”

<sup>8</sup> Sivtounun mo itok Yeisuw, inow koy singay  
avakaein, ikatimlek vena babaw ikous, ikin vena  
babaw bwanabweins.

<sup>9</sup> Yeisuw ikin ikous, Seitan mo idibek ilana,  
“Kukulul wamatag mo basekeim vena babaw,  
wunsiyas ven mukwaleiwag yakoum.”

<sup>10</sup> Yeisuw mo ikan Seitan, ilana, “Kusineikik.  
Bukitab waseg kweitan livan nises mamagina:

‘DaGuyaws Yowbad bukukulul wamatan;  
Towen anmwānet bukutupwālou waseg.’ ”

<sup>11</sup> Seitan mo ilisow Yeisuw, inoun. Yowbad  
natakayobs mo imeis, ilabes Yeisuw.

*Isilamaw nawotet ven Galiliy waseg  
(Mak 1:14-15; Luk 4:14-15)*

<sup>12</sup> Wankuyeim kweitan tut gamag mwasanin  
mo inekes Yeisuw, ilansa, “Bo iyousis Yon inawes  
wādeil.” Yeisuw iligen mo inoun in Galiliy.

<sup>13</sup> In Nasalet, ilisow, in Kapaneyum mo isin.  
Ven towen wakawalaw, kweiboug tasiyas Seblon  
son Naptal siven.

<sup>14-16</sup> Palopit kweiboug Isaya nilivnek mamag-  
ina:

“Seblon son Naptal siven, palata-dadan Yoldan,  
yol niweiw, ven towen Galiliy nimeim;  
tasiyas igaw dadub misikes.

Kweiboug dadub, kamnat avakaein mo ikines.

Kweiboug ven kanig-nen misikes, kamnat mo isap wasigeis.”

Kweiboug palopit nilivnek, tut townen bo ikamat.

<sup>17</sup> Yeisuw mo isilamaw nageiguy, ilana, “Kulavewas amisinap kalbaleb, peinan Yowbad kakita bisilamaw nakaleiwag.”

*Taplapouls asteivas*

*(Mak 1:16-20; Luk 5:1-11)*

<sup>18</sup> Ivayal yevagam townen yagan Galiliy, ikin taw teitan son bwadan iplapouls, mtowen Saymon, kweitan yagan Pita, bwadan Andiluw, peinan siwotet poul-wan.

<sup>19</sup> Yeisuw idibakes, ilana, “Kukikuns waseg yey, mo basekeimiy kweitan miwot, waseg bukuk-wanes gamag.”

<sup>20</sup> Iliganes, ipiyaves wot townen, ikikuns Yeisuw waseg.

<sup>21-22</sup> Inounas, ineis mo ikines tawaw asteiy, Sebidiy nitun, Yemes son bwadan Yon, tasiyas sisiy times wawag iymiyiems siwot. Yeisuw idawes, mo ilisawes wag townen, ilisawes times, mo ikikuns Yeisuw waseg.

*Ilabes gamag babaw*

*(Luk 6:17-19)*

<sup>23</sup> Itavin ven babaw Galiliy waseg, igeiguy buntuman tapwəloul sinagog wasigeis, livan bwan-abwein isekes vagan bikakins Yowbad nakaleiwag; takatouns ivag ibweins; tasiyas abes igeg, ilabes mo ibweins.

<sup>24</sup> Tasiyas min-Siliy mo iliganes butun Yeisuw, imeyes takatouns, askatoun kweitan kweitan, ivag mo ibweins, tasiyas igidaged wous, tasiyas

bwagaw neiweiys, takabalamats, taydagwegs, ivag mo ibweins asibabaw.

<sup>25</sup> Gamag babaw mo ikikuns waseg, tasiyas min-Galiliy, min-Dikapolis, min-Yelusalem, min-Yudiy, sisiyas tasiyas palata-dadan Yoldan, ikikuns waseg Yeisuw.

## 5

### *Yeisuw igeiguy wakoy*

<sup>1-2</sup> Yeisuw ikin gamag singay babaw, ikatulag, in wakoy, isin, inavamul inekes, mo isilamaw nageiguy, ikatimlakes mamagina:

### *Tasiyas tamumwasaws*

*(Luk 6:20-23)*

<sup>3</sup> “Yakamiy waninoumiy kulansa, ‘Nag aveiyag bwanabwein nises wakululuwem,’ bweina kumwasaws, peinan bukusiws Yowbad wanakaleiwag.

<sup>4</sup> “Kumwasaws yakamiy tavvalams, Yowbad bilabeimiy mo beitout ninoumiy.

<sup>5</sup> “Kumwasaws yakamiy tammanums, igaw Yowbad mo bisekeimiy youda babaw.

<sup>6</sup> “Kumwasaws yakamiy magat biseiw nuwamiy sinap didumwal silmanin, igaw mo bivakaein wasigeis yakamiy.

<sup>7</sup> “Kumwasaws yakamiy bukusiwyoubus tasiyas abes igeg, Yowbad mo bisiwyoubumiy yakamiy.

<sup>8</sup> “Kumwasaws yakamiy tatoukums, igaw mo bukukines Yowbad.

9 “Kumwasaws yakamiy bukulabes gamag vagan biyakousis sikameiliw sisiyas, igaw Yowbad bilivan, ‘Nitug yakamiy.’

10 “Kumwasaws yakamiy, kukin gamag bikamliweimiy peinan amisinap didumwal, bukusiws Yowbad nakaleiwag wanuwan yakamiy.

11-12 “Kumwasaws magat gamag bitawyageimiy, bikamliweimiy, o peinan gungamag yakamiy, siyaweid avakaein bivtokeimiy livan; bweina kumwasaws avakaein, maysamiy bwanabwein igaw mo bukulivatus walbalab. Mawan magin gamag nikamliwes tasiyas palopits kweiboug. Yakamiy bo mawan bikamliweimiy.

*Livānen sol yayan o livānen kamnat  
(Mak 9:50; Luk 14:34-35)*

13 “Yakamiy mamagina sol silmanin ven babaw sabal-nen yakamiy. Kukin sol sabal-nen bigeg, ta-mawan bitavkek bisabal vayuwein. Peinan bo igeg, misinaka bitalev bein watoulan, gamag mo bivvanis.

14 “Yakamiy vena babaw sikamnat yakamiy. Magat wunovek ven bibunis koy wakunuwatan, makava kimnayawl ven townen. Mawan magin gamag babaw bikines mikamnat yakamiy.

15 “Lamp nigidaged, awoum takow loutan takatugiblikēn kunuwatan tage tasen wateibol mo bimteil bunatum, nakamnat kadilok bunatum.

16 “Mawan magin yakamiy kummiteilis gamag babaw vagan bikines miwotet bwanabwein, mo biyakawanes Tamads nises wanakaew.

### *Kaleiwag livanen*

17 “Awoum kudokeigs yey nam tagulekwein Moses nakaleiwag o tasiyas palopit sikaleiwag, awoum. Yey nam vagan bakatimweis sikaleiwag, bivakaein.

18 “Mounid adibakeimiy, nag kweitan sikaleiwag beikous tut townen waseg. Tut townen ven watinow son libalab nisesus. Mawan magin tasiyas Moses siney palopits sikaleiwag bisesus ee... igaw mo bikamat anagin.

19 “Kavel yak bukulivan, ‘Kaleiwag townen kakit, bweina tanumlaves talavewas,’ yak singay bukubus Yowbad nakaleiwag waseg. Tage bukwawanow kaleiwag tasiyas, bukwatimlakes gamag, igaw mo bukumwen Yowbad nakaleiwag waseg.

20 “Taninuways tasiyas takatimlakeins kaleiwag sisiyas tasiyas Palisiy, gamag babaw idokes asisinap bwein. Tage yakamiy amisinap bwanabwein bivakaein; waseg kwalsawes tasiyas. Kukin gog nag, tamawan bukusiws Yowbad wanakaleiwag.

### *Kameiliw livanen*

21 “Kukwakins tammwayas sikaleiwag kweiboug mamagina:

‘Awoum kuweiy gamag.

Kukin bukkwatimet gamag, takalleiwags mo biyateleims yak.’

22 Tage yey gunakaleiwag mamagina:

‘Kukin yak bukkwamliw soum, takalleiwags mo biyateleims yak.

Kukin bukuyeg soum, tasiyas takaleiwag kawkaveks wasigeis mo biyateleims yak.

Kukin go bukuyeg avakaein, adok Yowbad bilaveim bukun wadiginasim, kov bigabum yak.’

<sup>23-24</sup> “Kukin aveiyag bukukow vāgan bukulun Yowbad waseg mo kunuw kavel nanon igeg waseg yak, bweina kusem mulun abeilun wadadan, kunoun, kun, kulun gamag townen waseg; beikous, mo kuyum kum, kulun Yowbad waseg.

<sup>25</sup> “Kukin kavel soum biyateleim, kadiloka wāked kulun amiteiy; kukin gog nag, adok soum townen bitokeim takaleiwag to gabman waseg, gabman mo bidibek plisman, bitokeim binaweim wādeil.

<sup>26</sup> “Mounid adibakeimiy, bukusesus wādeil ee... bukupayin soum beikous, mo bispuyeim bukun wannat. Kukin gog nag, bukusesun-wan wādeil.

### *Livanen kaninavay mav*

<sup>27</sup> “Kukwakins tammwayas sikaleiwag mamagina:  
‘Awoum kwanavay mav.’

<sup>28</sup> Tage yey gunakaleiwag mamagina:  
‘Kavel yak bukumet vin, wananoum kid bo kukwanavay soum manāwen vin. Amsinap townen igeg.’

<sup>29</sup> “Kukin gog matam wamkwatay bikaleiwag mo bukukwalouw, kadiloka kugut kulev bein tanāban. Bweina kuyamkwen matam palatanok; mata ge tamkwalan mo son woum bigob wadiginasim.

<sup>30</sup> “Kukin mukwatay bikaleiwag vāgan bukukwalouw, kuboub, kulev bein tanāban. Bweina palatanok namam; mata ge

bukuyamkwen woum sona tamkwalan  
wadiginasim.

*Livanen peiyaw vinay*

(Matiw 19:9; Mak 10:11-12; Luk 16:18)

<sup>31</sup> “Kukwakins kaleiwag kweitan mamagina:  
‘Kukin kal yak bukupiyev mukwav, kusek inalet  
mo kwayeb binoun.’

<sup>32</sup> Tage yey gunakaleiwag mamagina:  
‘Kukin kal yak, nag bukutanid, tage bukupiyev  
mukwav, mo kuvages tasiyas bikaninavays  
mav son namwan teivaw.’

*Livanen tabudabod*

<sup>33</sup> “Kukwakins tammwayas kweitan sikaleiwag  
kweiboug mamagina:  
‘Awoum kutabudabod mav. Bukutabudabod,  
bweina kuvag mawan, daGuyaws  
silmanin.’

<sup>34-36</sup> Tage yey gunakaleiwag mamagina:  
‘Awoum kutatabdabod, misinaka amlivan  
mounid kusek.  
Awoum kutabudabod libalab waseg, peinan Yow-  
bad aban.

Awoum kutabudabod ven watinow waseg,  
peinan Yowbad nakabvawot kaken.

Awoum kutabudabod Yelusalem waseg, peinan  
daGuyaws inaven.

Awoum kutabudabod kunum waseg, peinan ta-  
mawan bukuvkek bipwapwakaw o bi-  
gunugoun walitanok kunum, nag.’

<sup>37</sup> Kukin bukutam, misinaka kulivan, kulana,  
‘E!’; o kukin bukupiyev misinaka kulivan, kulana,  
‘Nag.’ Peinan tabudabod babaw meinoy neim  
Seitan waseg.

*Awoum kwatimapus sinap kalbaleb*  
(Luk 6:29-30)

<sup>38</sup> “Kukwakins tammwayas sikaleiwag mamagina:

‘Soum matan nukuweiy inalug matam yak beiweiy.

Soum kudun nukwatimoun, inalug kudum bikatimoun.’

<sup>39-41</sup> Tage yey gunakaleiwag mamagina:

‘Awoum kwatimop soum peinan ansinap kalbaleb.

Kukin binep silapam wamkwatay, bweina kutouvin binep paliyuwein silapam.

Kukin soum biyateleim bikow amukweim, bweina kusek-vak musag.

Kukin soum bikaleiwag, bilana, “Kwanag kukow katanok veit,” bweina kutam, mo kukow kwayuwein veit.’

<sup>42</sup> Aveiyag soum bilivan, bweina kusek, o kukin soum binitoug, awoum kwayus.

*Kusiwyoubus tasiyas astakameiliws yakamiy*  
(Luk 6:27-28, 32-36)

<sup>43</sup> “Kukwakins tammwayas sikaleiwag mamagina:

‘Kusiwyoubus taliwom, kwamliwes gog tasiyas nikamliweims yak.’

<sup>44-45</sup> Tage yey gunakaleiwag mamagina:

‘Kusiwyoubus tasiyas nikamliweimiy; kunitougs Yowbad waseg vagan kid bilabes tasiyas iyagageimiy.’

Bo mawan bukumlavags Tamads nitun yakamiy, peinan mtowen wanakaew nilabes takalbalebs



sisiyas toubweins, kalas ivag ikal yam katanok katanok wasigeis, o kweis isekes asibabaw-wan.

<sup>46</sup> “Kukin bukuyamanes siwayoub wasigeis tasiyas nisiwyoubumiy, adok nag kweitan lalan bukubanes, kulatanes gog simiyas tasiyas takaweins takis; peinan tasiyas iyamanes siwayoub wasigeis tasiyas nisiwyoubus. Mawana tasiyas, mawana yakamiy.

<sup>47</sup> “Kukin misinaka simiyas tawlimiyas bukumulouls, amisinap nag bitawtoun, peinan tobwag ven gingilis asisinap mawan.

<sup>48</sup> “Kadiloka bukuyakousis sinap bwanabwein, mawan magin ansinap mtowen Tamads wanakaew.

## 6

### *Muloul wasigeis tasiyas tasimavs*

<sup>1</sup> “Kukin bukumulouls wasigeis tasiyas tasimavs, awoum gamag babaw bikakins, mo bilansa, ‘Singay tasiwayoubs tasiyas’; awoum! Magat amisinap mawan, ta-kweitan maysamiy bukubanes waseg Tamads, walbalab nises.

<sup>2</sup> “E, bukumulouls wasigeis tasiyas tasimavs, awoum tayikin bwagig bingwayeimiy, mamagina tayyaweids tasiyas wavtakon ven o buntuman tapwaloul waseg ikaypamwes butus, vagan kid gamag babaw bikavasis. Mounid adibakeimiy tut towen mayses ibanes, tage wanakougwaw bo nag.

<sup>3</sup> “Kavel yak bukumuloul wasigeis tasiyas tasimavs, kadiloka kukwawum mumuloul; awoum teitan gamag bikakin.

<sup>4</sup> “Mamagina kusowm mumuloul, Tamads anmwānet bikin, igaw maysam mo bisekeim.”

*Nitoug livānen*

*(Luk 11:2-4)*

<sup>5</sup> Yeisuw ilivan, “Gamag mwasanin bo initougs Yowbad waseg, itamanaws itowas wabunatum yagan sinagog, o itowas wawtakon ven mo initougs; tayyaweids gog. Peinan sivines gamag babaw bikakins, bo kid bilansa, ‘O singay tantougins Yowbad tasiyas.’ Ivavags mav, gamag tasiyas. Mounid adibakeimiy tut townen mayses ibānes; tage igaw gog wanakougwaw bo nag.

<sup>6</sup> “O yakamiy awoum kuvāges māwan. Kal yakamiy binitoug, kadiloka beisiw wanbunatum wanuwan, bikatibog koukwed, anmwānet bikulul wamatan Yowbad, mo binitoug. O Tamads bikin anmwānet ininitoug, igaw maysan mo bisek.

<sup>7-8</sup> “Kukin bukunitougs, awoum kulivans māwana tamgamegs igaw dadub. Idokes kid bibānes youd babaw, peinan asilivan babaw, aveiyov. Awoum kunitougs māwan. E, bukunitougs Tamads waseg, bo ikakin nanawan aveiyag sivinamiy.

<sup>9-13</sup> “Kadiloka kunitougs mamagina:

‘Timem walbālab,

Yagam bakagoul,

Mukwaleiwag beim.

Aveiyag aw-nanoum sivinam ven watinow bakavag, māwan ivvāges walbālab.

Kaem bukusekem nagein.

Kunumlev makalbaleb māwan kanumlev gamag sikalbaleb wasigeis yakamey.

Awoum bukusenam abiyokon waseg.  
Igaw kalbaleb waseg kwatinabwem.'

14 "Bukunumlaves o bukuwidis youd babaw wasigeis gamag tasiyas niyagageimiy, igaw gog Tamads mo biwid amisinap kalbaleb yakamiy.

15 "Tage nag bukunumlaves o bukuwidis asisinap tasiyas niyagageimiy, Tamads gog nag biwid amisinap kalbaleb yakamiy.

### *Pos livanen*

16 "Igaw tutan bukupos, tapwāloul silmanin, awoum bimmayag mitamiy, awoum beivag amisinap māwan tasiyas tayyaweids, ivag mamagina siwsawoul wous, vagan gamag bikines, bilansa, 'O singay tapsapos tasiyas.' Mounid adibakeimiy, tut townen mayses ibānes, tage tut wanakougwaw bo nag.

17-18 "Kal yak bukupos tapwāloul silmanin, kuwid magim, kusinat, kuput; mata geg gamag bikakins, anmwānet Tamads bikakin imupos wanuwam, mtowen maysam mo bisekeim.

### *Libalab wuliyougwan*

*(Luk 12:33-34)*

19 "Awoum kwatinakus miwliyoug babaw ven watinow waseg. Ven watinow wuliyougwan ipwapoup o man kekel ikamkoums, o gamag mwasanin ikaliyowes bunatum ivveinaws.

20 "Tage libalab wuliyougwan bukwatinakus, nag beipoup, man nag beikoums, ta-kal biven; bwein-wan.

21 "Ampalawen muwliyoug kwatinok, mo bi-seiw nuwam ven townen.

*Woun kamnat-nen*  
(Luk 11:34-36)

<sup>22</sup> “Woun kamnat-nen matad. Kukin matam inakaleiwag bwein, woum mo bikamnat.

<sup>23</sup> “Tage kukin matam inakaleiwag kalbaleb, woum bo bidadub. O peinan mukwamnat bo idadub, woum singaya dadub.

*Takaleiwag katanok*  
(Luk 16:13)

<sup>24</sup> “Ta-mawan gamag anmwānet bikanow ages natuwāveks asteiy; adok bikamliw natovek teitan, tayuwein gog bisiwyoub; adok bikanaway aygan teitan, tayuwein gog bipiyev. E, ta-mawan gamag bikanow ages takaleiwags asteiy, teitan Yowbad, tayuwein money. Misinaka anmwānet aygan bikanow.

*Kubukub nuwn*  
(Luk 12:22-34)

<sup>25</sup> “Mapun adibakeimiy, awoum bikubukub nuwamiy silmanin kaemiy vagan biyamoveimiy, o silmanin amikweim vagan bukusikams. Peinan kan na-ikadilok bigimwel mwamovads, o kweim na-ikadilok bigimwel kaleivids, nag.

<sup>26</sup> “Kukines mansiyas man iyoyows wanakaew, ta-isapwes kan, ta-itayoys, ta-isenas waseigous; nag. Tamads wanakaew ituyay mansiyas man, moundid mo bitutuyeimiy yakamiy.

<sup>27-29</sup> “Nag kavel yakoum bukunuway mutaw-toun waseg vagan ambweilim bibabaw; nag. Aveiyag wawun kuninuwes amikweim? Kukines lalan moloubaw nitatos, na-iwotets, na-ibalals, nag; tage askakin singaya bwanabwein. Moundid

adibakeimiy kay kasiyas lalan ikalisow Solomon antubub.

<sup>30</sup> “Kay kasiyas nagein nitatos, nubweig beiyakous, bigob kov. Yowbad kay kasiyas isek astubub, mounid mo bisekeimiy amikweim. Adok nag kunmises bwein vagan Yowbad bimtaka-vateimiy.

<sup>31-32</sup> “Awoum ninoumiy bibabaw; awoum kulansa. ‘Aveyag bitakams? Aveyag bitamoums? Aveyag bitasikams?’ Tasiyas igaw dadub asisnap mawan; yakamiy awoum. Tamads gog wanakaew ikakin sivinamiy youd tasiyas.

<sup>33</sup> “Towen nakaleiwag bimug waninoumiy, o ansinap didumwal bimug waninoumiy, igaw aveiyag sivinamiy mo bisekeimiy.

<sup>34</sup> “Nagein kuninuways aveiyag sivinamiy nagein; nubweig mo kuninuways aveiyag sivinamiy nubweig. Yamtan yam mouvitan kweitan; kwayuwein yam mouvitan kweitan.

## 7

### *Awoum kutawyages simiyas*

*(Luk 6:37-38, 41-42)*

<sup>1</sup> “Awoum kudibek soum, kulana, ‘Yak kalbaleb yak.’ Adok Yowbad mo bidibakeim mawan.

<sup>2</sup> “Mikaleiwag waseg bukwawawages simiyas, Yowbad mawan mo bikaliwageimiy yakamiy. Magat mukwaleiwag kalbaleb wasigeis simwey. Yowbad mo bikaleiwag mawan waseg yakoum. Kukin gog bwein. Yowbad mo bikaleiwag bwana-bwein waseg yakoum.

3-5 “Adok kukin soum matan musamusan kakit nises, tage nag kukwakin amweilok avakaein wanuwan matam yak nises.

“Kulivan kid, kudibek soum, kulana. ‘O musamusan wamatam nises, bakablev’; tage amweilok avakaein matam tatoneim wanuwan nises.

“Tayyaweid yak! Kwablev amweilok townen wamatam nises. Ikous, wankuyeim mo bukuk-inbunik vagan bukwablev musamusan townen, soum wamatan.

<sup>6</sup> “Awoum Yowbad navavag kuvgen kusekes mansiyas awuk, adok bipiyaves mo bigadeimiy. Awoum veigun kulev bwaloud waseg, mata ge bivvanis, bivatunis bikatigayay, bo bigeg.

### *Nitoug livanen*

*(Luk 11:9-13)*

<sup>7</sup> “Kunitougs, mo bisekeimiy; kunineivs mo bukubanes. Kugipits, mo bikaliyow nakoukwed pinamiy yakamiy.

<sup>8</sup> “Tasiyas gog tannitougs ikokews sivavag; tasiyas taninineivs mo bibanes sivavag, o tasiyas taggipits, mo bikaliyow koukwed pines tasiyas.

<sup>9</sup> “Adok ta-kal yak, kukin natum binitoug kan mo bukusek dakul; adok nag.

<sup>10</sup> “Adok ta-kal yak, kukin natum binitoug in mo bukusek mwatet; adok nag.

<sup>11</sup> “Yakamiy takalbalebs yakamiy kukwakins youd bwein bukusekes nitimiyas; singay gog Tamads wanakaew bisekeimiy youd bwanabwein, magat bukunitougs waseg.

<sup>12</sup> “Aveyiyag sivinamiy vagan gamag bivages wasigeis yakamiy, kadiloka kuvages mawan

wasigeis tasiyas. Moses siney kweiboug palopits sikaleiwag maḡwan.

*Koukwed kabkakit*  
(Luk 13:24)

13-14 “Kusiws koukwed kabkakit waseg, peinan diginasim kidenen avakaein, awkwedan babayay, gamag babaw isowskiws, inounas waseg; tage mwamov kidenen kabkakit, awkwedan kabkakit, gamag na-ibabaws bisowskiws makadewen ked.

*Amweilok anagin*  
(Luk 6:43-44)

15-16 “Kuvnaḡsemiy, awoum kuliganes ages palopit tasiyas tayyaweids, tasiyas igaw bisaps wasigeis yakamiy, askakin maḡwana sip, tage wanuwes maḡwana awuk nakananeiy. Igaw bukukines siwotet mo bukukwakins asisinap bwein, o nag, kalbaleb. Peinan gamag maḡwana kay.

“Adilaboub nag beivag gleip anagin, o ayliluweis nag beivag yaveinun anagin, nag.

17 “Kukin amweilok bwein, mo beivag anagin bwein; kukin gog kalbaleb, mo kalbaleb anagin. Mapun alana, ‘Bukukines siwotet mo bukukwakins asisinap amaḡwan.’

18 “Ta-maḡwan kay bwanabwein beivag anagin kalbaleb, nag. Ta-maḡwan kay kalbaleb beivag anagin bwein, nag.

19 “Kay kasiyas nag beivag angis, bo beiteiys bilaves bein waḡkov.

20 “Gamag tasiyas bo maḡwan, bukukines angis mogo kukwakins asisinap bwein, o nag, kalbaleb.

*Tayyaweids*  
(Luk 13:25-27)

21 “Gamag babaw bidibakeigs, bilansa, ‘MaGuyaw yak,’ tage babaw nag beisiws Yowbad wanakaleiwag, nag. Misinaka tasiyas takaweins aygan Tamag, nises walbalab.

22 “Igaw yam townen waseg babaw gamag bidibakeigs, bilansa, ‘Nakageiguy yagam waseg, o nakakawsep bwagaw yagam waseg, o yagam waseg mawotet singay tawtoun.’

23 “Yey mo bakatimop ages, balana, ‘Tobwag gamag yakamiy, kunounas, kuneis, peinan miwotet kalbaleb.’

*Bunatum ankawtun*  
(Luk 6:47-49)

24-25 “Kal yak bukuligen aygag, bukwano, yakoum mamagina tassina teitan; townen niwlul nabunatum dakul wakunuwatan. Iwlul ikous, kweis mo ikweis avakaen, yevagam ilatay, yag avakaen itow, tage nag igulek bwan townen, peinan niwlul dakul wakunuwatan.

26-27 “Kal yak bukuligen aygag, bukupiyev, yakoum mamagina takabalawein teitan, townen niwlul nabunatum walekel. Iwlul ikous, kweis mo ikweis avakaen, yevagam ilatay, yag avakaen itow, ikalouw bwan townen, singay nuwanaw angwelek.”

28-29 Iyakous Yeisuw anilivan townen, bo isom ninous tababaws tasiyas aniganeg aygan waseg, peinan tawtoun ansinap. Nag mawan tasiyas takatimlakeins kaleiwag, nag; tage Yeisuw ansinap sinap tatonen.



## 8

*Touplel ivag, mo ibwein*  
*(Mak 1:40-45; Luk 5:12-16)*

<sup>1</sup> Koy towen waseg, Yeisuw iwlobus, singay babaw gamag ibukunis.

<sup>2</sup> Toulepel teitan isineikim, ikulul, ilana, “Guntovek yak, magat sivanam, kadilokeim bukuvag kaleivig beibwein.”

<sup>3</sup> Yeisuw isen naman wawon toulepel towen, ilana, “Bo bukubwein,” mo ibwein kaleivin towen.

<sup>4</sup> Yeisuw mo idibek, ilana, “Awoum kwamtel sinap towen. Awoum teitan gamag kudibek. Misinaka kukwamat tanuwagan lun waseg, kumuloul waseg Yowbad, mawan Moses nakaleiwag; gamag bikineims, bikakins bo kubwein, mo bilansa, ‘O bo ibwein taw.’ ”

*Takalikay natouwat Yeisuw ivag, mo ibwein*  
*(Luk 7:1-10; Yon 4:43-54)*

<sup>5-6</sup> Yeisuw inoun in Kapaneyum, siyas Lom takanaviys sitakalikay mo inek Yeisuw, initoug waseg, ilana, “Guntovek yak, guntouwat ikatoun avakaein, nimmasis wabunatum, ta-mawan binoun, singaya igidaged won.”

<sup>7</sup> Yeisuw idibek, ilana, “Yey baw, bavag mo beibwein.”

<sup>8-9</sup> Takalikay towen ikatimop aygan, ilana, “Adok nag. Peinan guyaw yakoum, o yey toul, nag kadilok bukusiw waganbunatum. Misinaka kulivan mo beibwein guntouwat. Yey gunakaleiwag nises wasigeis guntakanaviys, teitan badibek ‘Kunoun’ mo binoun; teitan badibek ‘Kum’ mo

beim; guntouwat badibek ‘Kuvag townen’ mo bivag. Kaleiwag akakin; misinaka kulivana beibwein.”

10-12 Yeisuw iligen, bo isom nanon, itouvin idibakes tasiyas tabkunins, ilana, “Guma-Lom townen singay inamis vagan baleb! Ta-aban gum-Yisleil teitan inasimounid mawana taw townen. Mounid adibakeimiy ven babaw gimgilis beisiws Yowbad nakabkaleiwag waseg, peinan gamag tasiyas wanuvid sisiyas tasiyas wayavat bo beisiws bikaypuls Yowbad wanakabkaleiwag waseg, sisiyas tamumwey tasiyas Ebelam, Aysak, Yekob. Tage Ebelam tibun mwasanin Yowbad bilev, bineis watoulan, dadub waseg, bivvalams o bikakikilis kumtus, peinan igeg abes tasiyas.”

13 Yeisuw mo idibek takalikay townen, ilana, “Bweina kunoun; musimounid waseg bo bivag mawana nanoum.” E, tut townen waseg, mo ibwein natouwat.

*Takatouns babaw ivag, mo ibweins  
(Mak 1:29-34; Luk 4:38-41)*

14-15 Yeisuw mo isiw in Pita wanbunatum, ikin yawan ikatoun, itakalon won; ikabkwen naman manawen vin mo iloulun won, itamanaw manawen; ikatineg kan Yeisuw beikam.

16 Kwayav waseg mo imeyes tasiyas bwagaw nibugawus, ilivan mo ikilaves, o asibabaw takatouns tasiyas ivag mo ibweins.

17 Wotet townen kweiboug palopit Isaya ilivnek mamagina:

“Im ikow adkatouns, inow, ilavew tanaban, ivageids gog mo tabweins.”

*Gamag mwasinis sivines bikabwākuns Yeisuw waseg*

*(Luk 9:57-62)*

<sup>18</sup> Yeisuw ikin gamag singay babaw ikatuyouns nimeis, mapun idibek nagamag, ilana, “Kadiloka tatouws, tadopels, taneis palatan.”

<sup>19</sup> Ilivan mo im takatimlakein kaleiwag teitan, ilana, “Tamwey, bo babwākun waseg yākoum ampalawen bukunoy.”

<sup>20</sup> Iwage Yeisuw, ilana, “Awuk bulawud sikab-masis sam wanuwan leg, o mansiyas man iyoy-ows sibunatum nises wakamweilok; tage Gimgilitoun yey ta-ivag gunakabmasis.”

<sup>21</sup> Inavamul teitan idibek, ilana, “Yey babkunim, guntovek yak; tage bawtameim wanamug ga bayum ban wagunbunatum, bamtakavet tamag, igaw bikanig mo babkunim yak.”

<sup>22</sup> Yeisuw ilana, “Awoum. Tut townen kubwākun waseg yey. Bweina takanigs tatineis bidibwanis.”

*Bwaw avakaein, Yeisuw ivag mo iniwal*

*(Mak 4:35-41; Luk 8:22-25)*

<sup>23</sup> Yeisuw iginitouw in wawag, navamul itouws wankuyeim, mo ikuks.

<sup>24</sup> Ikuks ee... bwaw avakaein ilivatus, kakita bimukuls; tage Yeisuw bo imasis.

<sup>25</sup> Navamul aspwayat inekes Yeisuw, iwgunis, ilansa, “Matovek yak, kukit, kwatinabweids, bo bitamukuls.”

<sup>26</sup> Ilana, “amipwayat? Adok nag kusimounids waseg yey, ne?” Mo ikit, itamanaw, ikan yag son kaysay, mo idabab, iniwal singay avakaein.

<sup>27</sup> Gamag tasiyas ikines, isom ninous, ilansa, “Taw towen kweitana gamag; yag son kaysay iliganes aygan.”

*Takabalqwein ven Gadal waseg ivag mo ibwein  
(Mak 5:1-20; Luk 8:26-39)*

<sup>28-29</sup> Ikuks ee... ilugs palatan, ven Gadal waseg. Gamag alugwes watakunumwan tawaw asteiy nisesus, yeiluw neiweiys, singay kapasal nuwes; nag kadilok gamag binoyes makadewen ked. Tut towen ilugs tasiyas asteiy ilisawes takunumwan, imekes, iwaks, ilansa, “Awoum aveiyag bukunuwakem yakamey, Yowbad Natun yak. Mata nuwanaw bukuyagagem yakamey.”

<sup>30-31</sup> Ikines kadiveiyov bwaloud babaw ikamkwams awuyow. Yeiluw tasiyas igilagels, initougs Yeisuw waseg, ilansa, “Bweina kwayabem bakan bakasiw mansiyas bwaloud wasigeis, ke?”

<sup>32</sup> Ilana, “Kuneis.” Ineis, isiws mansiyas bwaloud wasigeis, ikabalqweins, nuwanaw isisawls, papap waseg ikalkalouws, inineis yevagam towen waseg, iwgweles.

<sup>33</sup> Tasiyas tamtakavateins aleis isawls, ineis waven ikamats sinap towen, peinan yeiluw ilisawes gamag, isiws bwaloud wasigeis, iyagages.

<sup>34</sup> Misikena gimgilis asibabaw-wan mo isaps, imekes Yeisuw, initougs waseg, ilansa, “Kadiloka kunoun kulisawem.”

## 9

*Takatoun teitan ivag, mo ibwein  
(Mak 2:1-12; Luk 5:17-26)*

<sup>1</sup> Mapuna itouws wawag, ikuks, iyums, ineis Yeisuw wanven.

<sup>2</sup> Gamag mwasanin mo imeyes taw teitan ankaton avakaein, immasis wakaban, ta-mawan binoun. Yeisuw ikakina tasiyas inamis vagan bileb, mapuna idibek takatoun towen, ilana, “Kalin nuwag yakoum; amsinap kalbaleb bo awid.”

<sup>3</sup> Takatimlakeins kaleiwag mwasanin bo ikatitutegs, sisiyas illivans, ilansa, “Anilivan waseg ikaypom Yowbad ansinap; singay kalbaleb!”

<sup>4-5</sup> Tage Yeisuw ikakin ninous, mapuna idibakes, ilana, “Aveiyag wawun ninoumiy kalbaleb? Bweina balivan, balana, ‘Bawid amsinap kalbaleb beikous,’ o bweina balivanvak balana, ‘Kutamanaw kunoun.’ Wotet akweiy gagab waseg yey.

<sup>6</sup> “Kadiloka kukwakins Gimgilitoun yey, o gunakaleiwag nises ven watinow vagan bawid gamag asisinap kalbaleb, mapuna badibek taw towen bitamanaw binoun.” Yeisuw idibek, ilana, “Kutamanaw, kukow, abam, kunoun kun wambunatum.”

<sup>7</sup> Taw towen iligen, itamanaw, inoun in wambunatum.

<sup>8</sup> Gamag babaw ikines, igoulus Yeisuw, iyakawns Yowbad waseg, peinan bo isek kaleiwag towen wasigeis gamag.

*Yeisuw idouw Mati  
(Mak 2:13-17; Luk 5:27-32)*

<sup>9</sup> Yeisuw inoun in, ikin taw teitan yagan Mati, isin wakaban, gamag isitakis ikokew; Yeisuw idibek, ilana, “Kukikun waseg yey.” Mtowen iligen, itamanaw, ibukun Yeisuw.

<sup>10</sup> Wankuyeim ikamkwam wanbunatum, takalbalebs babaw imeis, tasiyas takaweins takis sisiyas takalbalebs mwasanin ikaypuls sisiy Yeisuw siney navamul.

<sup>11</sup> Tasiyas Palisiy ikines, idibakes navamul, ilansa, “Aveyag wawun mitovek ikamkwam siney takalbalebs sisiyas tasiyas takaweins takis? Bo igak!”

<sup>12-13</sup> Yeisuw iligen asilivan, ilana, “Misinaka takatouns sivines doket, toubweins nag. Kadiloka kukwakins silawun Yowbad anilivan mamagina: ‘Sivinag siwayoub; makava lun apiyev.’ Yey nam silmanin takalbalebs, awoum badawes tasiyas toubweins.”

*Pos livanen*

*(Mak 2:18-22; Luk 5:33-39)*

<sup>14</sup> Yon navamul mo inekes Yeisuw, idibakes, ilansa, “Yakamey kapsapos, tasiyas Palisiy ip-sapos; tage mivamul ipiyaves pos. Aveyag wawun?”

<sup>15</sup> Yeisuw ankabebay isekes, ilana, “Kukin kal beivays son nakwav, o taliven bineis bivages kan silmanin inakamkwam; bimwasaws-wan; tamawan bivalams, nag. Tage tutan anadouw waseg, taw townen binoun, mo bivalams taliven, beipos.”

<sup>16</sup> Ankabebay kweitan isen mamagina, “Kweim sigsagob tamawan bitabweil waseg kweim kweivaw; bitabweil bo bitadud avakaein.”

<sup>17</sup> Kwayuwein ankabebay mamagina. “Awoum bitavgog kunasoup kweiboug, waseg wayn kweivaw; igaw beilol, bitavis kunasoup, biyamkwen wayn; tage kunasoup kweivaw

bwein, bitavgog wayn kweivaw waseg, bo bisesun bwein, peinan tawtoun.”

*Vinay asteiy Yeisuw ivag, mo ibweins  
(Mak 5:21-43; Luk 8:40-56)*

<sup>18</sup> Igawa igeiguy wasigeis, takaleiwag teitan im, ikulul wamatan, ilana, “Natug kudavin mwana ikanig, kum kusen namam wawon, vagan bukuyamov.”

<sup>19</sup> Yeisuw itamanaw ibukunis taw townen sen navamul.

<sup>20-21</sup> Igaw inounas, vin natan isap watibwelon, buyavin iwtawout yam babaw, bweilim sinawatan akweiy nag beibwein. Nanon ilana, “Bo bakabkwen Yeisuw anakweim, mo babwein;” mapuna watibwelon Yeisuw ikabikon anakweim mafan.

<sup>22</sup> Yeisuw itouvin, ikin, ilana, “Kalin nuwag yakoum. Nukusimounid waseg yey mapuna bo kubwein.” Mo ibwein tut townen waseg.

<sup>23</sup> Yeisuw inoun in takaleiwag townen wanbunatum, ikin taykiyiks pikolel iykiyiks, tavvalam ivvalams, butus gamag singay avakaein.

<sup>24</sup> Yeisuw ikin, ilana, “Kunounas. Nag imat gwad townen, immasis-wan.” Tasiyas gog isibawes, idokes kid Yeisuw takabalawein.

<sup>25</sup> Tage Yeisuw ikayabes, ineis watoulan, mo isiw wabunatum, iyous gwad townen naman, mo itamanaw.

<sup>26</sup> Butun inawotet townen inganegs ven townen avakaein waseg.

*Tawaw ikaw mites, ivag, mo ibweins*

27 Yeisuw inoun in, tawaw asteiy ibukunis, ikaw mites, iwkuwaks ilansa, “Yakoum Deibid tabun yakoum, kusiwyoubum.”

28 Isiw wabunatum, tasiyas inekes. Yeisuw ikatiganes, ilana, “Tab kusimounids guntawtoun silmanin wotet townen?” Ilansa, “E, mawan, peinan guyaw yak.”

29 Yeisuw mo ikabkwen mites, ilana, “Peinan nukusimounids waseg yey, mapuna bo bukubweins.”

30 Mo ilal mites. Anilivan tawtoun isekes, ilana, “Awoum kwamteles sinap townen.”

31 Tasiyas gog, mo inounas ikamats, vena babaw wasigeis.

### *Taw teitan anilivan wadadan-wan ivag, mo ibwein*

32-33 Yeisuw siney navamul inounas ineis, gamag mwasanin mo imeyes taw teitan takakon, bwagaw neiweiy anilivan wadadan. Bwagaw townen Yeisuw ikayeb mo ikilev, gamag townen mo ilivan bwein. Gamag babaw ikines, bo isom ninous, ilansa, “Sinap kweitan-wan. Kweiboug nag takines wadavanuys, min-Yisleil yakids, peinan kweivaw sinap townen, tawtoun.”

34 Tasiyas gog Palisiy, ilansa, “Natawtoun, peinan Seitan ileb, Seitan siyas bwagaw sitovek. Seitan ileb mo ikayabes bwagaw.”

### *Yeisuw inok nuwan*

35 Yeisuw itavin ven katanok katanok wasigeis, sisinagog wasigeis ikatimlakes gamag, Yowbad nakaleiwag bwanabwein livanen issekis tasiyas, o takatouns katanok katanok ivages mo ibweins.



36-38 Ikin gamag singay babaw mo inok nuwan, peinan kululuwes isiwsawoul, peinan bo ilassulis ked, mawana sip; o ta-kal bingwayes. Mapuna idibakes navamul, ilana, “Kan babaw bo imatuw, asteiyuy bitayoys; kunitougs daGuyaws Yowbad vagan kid bikayabes tawwotets bilabeids kid mo bitatayawes inabag towen.”

## 10

*Isekes siwotet navamul sinawatan teiy*  
(Mak 3:13-19; Luk 6:12-16)

<sup>1</sup> Yeisuw mo idawes navamul sinawatan teiy, imeis, mo isekes sikaleiwag vagan bwagaw bikayyabes, o takatouns bivages beibweins, askatoun kweitan kweitan waseg. <sup>2-4</sup> Tasiyas sinawatan teiy takaweins livanen Yeisuw yiges mamagina:

Saymon, yagan kwayuwein Pita;

Saymon bwadan Andiluw;

Yemes, mtowen Sebediy natun;

Yemes bwadan Yon;

Pilip son Batolomiw;

Tomas son Mati, mtowen takawein takis;

Yemes, mtowen Alpiyow natun, son Tadiw;

kweitan gum-Kenan yagan Saymon,

son Yudas Iskaliyot, mtowen tasikodein Yeisuw.

*Yeisuw ikayabes navamul, bineis iwotets*  
(Mak 6:7-13; Luk 9:1-6)

<sup>5-6</sup> Tasiyas sinawatan teiy Yeisuw ikayabes silmanin nawotet; iguyes, ilana, “Misinaka kunekes sidayas min-Yisleil, mtasiyas ikankanigs peinan ilassulis ked. Awoun kunekes tobwag ven

gimgilis tasiyas ages kweitan; awoum bukuneis ven Samaliy waseg; awoum.

<sup>7</sup> “Igaw bukounounas, kuguyes gamag, kulansa, ‘Yowbad nakaleiwag kakita bisap.’ <sup>8</sup> Takatouns kuvages beibwein; takanigs kuymoves; tasiyas toulepel kuvages kalivis beibwein, bwagaw kwayabes binounas bineis tanaban. Peinan Yowbad nisiwyoubumiy, bweina kusiwyoubus tasiyas.

<sup>9</sup> “Money awoum kukwawes, goul dakul, o silib dakul, o kopa dakul; awoum. <sup>10</sup> Awoum kunamiy kukwawes waked. Amikweim mwayntanok kusikams; awoum mwaynatan kukwawes; misandol awoum; mikaytuk awoum. Peinan wotet towen bukukwawes, kaeimiy mo bukubanes, maysan wotet.

<sup>11</sup> “Amata ven waseg bukuneis, kwatugwans gamag wasigeis kavel ansinap bwanabwein, mo kusiwanbunatum, kusesus ee... mo kunounas.

<sup>12-13</sup> “Aw-bunatum bukusiws waseg, kumulouls wasigeis tasiyas, mo livan siwayoub kusekes. Kukin asisinap bwanabwein, mo bimwasaws tasiyas; kukin gog nag, livan towen bwanabwein mo beiyum wasigeis yakamiy. <sup>14</sup> Kukin bipiyaveimiy o bipiyaves amilivan, igaw bukulisawes ven towen kwatsapis kikeimiy musamusan bein ven towen, mo bikakins asisinap kalbaleb.

<sup>15</sup> “Kweiboug Yowbad iweiys min-Sodom, min-Gomol peinan asisinap kalbaleb; tage wunsiyas ven ipiyaveimiy asisinap singay kalbaleb. Igaw tutan Yowbad bikatukin, kalamwey-nen beiweiys min-Sodom, min-Gomol, tage singaya-wan beiweiys wunsiyas ven nipyaveimiy.

*Gamag mwasanin igaw mo bikamliwes  
(Mak 13:9-13; Luk 21:12-17)*

<sup>16</sup> “Akayabeimiy silmanin wotet townen. Igaw bukuneis, bukunekes babaw gamag bikamliweimiy. Yakamiy mamagina mansiyas sip tage tasiyas mamagina awuk bulawud biyagageimiy. Kadiloka kuvages amisinap bitawtoun, o kuymanums mamagina bwabun yakamiy.

<sup>17-18</sup> “Kumtakavateimiy, peinan gamag biyateleimiy yatal avakaein waseg, o sisinagog wasigeis biwaweimiy vatul waseg; biyateleimiy wamtes tasiyas takaleiwags kavkaveks, o king mwasanin wamtes, peinan gungamag yakamiy; mo bukukwamats livaneig. Tasiyas binganegs, sisiyas tobwag ven gimgilis.

<sup>19-20</sup> “Igaw biyateleimiy yatal avakaein waseg, awoum ninoumiy bibabaw, awoum kuninuways amawan bukulivans; peinan yatal wanuwan, amilivan tawtoun Yowbad mo bisekeimiy. Nag tatineimiy bukulivans, peinan Tamads Kuluwan bikatipel ansinap, anilivan waseg bukulivans.

<sup>21</sup> “Tut townen wanakougwaw, tuwan bisilkod bwadan, vagan takaleiwags bikatimates, o taman bisilkod natun vagan takaleiwags bikatimates; o nitsiyas bipiyaves sikaleiwag timsiyas insiyas, bisilkodes vagan gamag mwasanin bikatimates. <sup>22</sup> O peinan kukwawes yagag yey, gamag babaw mo bikamliweimiy yakamiy. Kukin gog bukusimkines gunawotet waseg, igaw mo bukusesus bwein.

<sup>23</sup> “Kukin gamag mwasanin biyagageimiy ven kweitan waseg, kusawls, kuneis kweitan

ven. Mounid adibakeimiy, igaw vena babaw Yisleil waseg, bukutitavins ee... Gimgilitoun yey mo bayum bam, tage yakamiy igaw-wan; nag bukuyakousis.

<sup>24-25</sup> “Navamul awoum bingwey natakatimlakay waseg; natouwat awoum bikaleiwag natovek waseg. Tage gunavamul yakamiy mawana mitakatimlakay yey, o guntouwat yakamiy mawan mitovek yey. Bo idokeigs baloum yey, singay bo bitawyageimiy, peinan gungamag yakamiy.

*Liᵛanen pwayat*  
(Luk 12:2-9)

<sup>26</sup> “Awoum kuwenes gamag tasiyas. Sinap babaw gamag mwasanin nikawwumes, tage igaw gamag babaw mo bikines kamnat waseg, bikakins.

<sup>27</sup> “Sinap bo akatamwālag boug waseg, nukuliganes, vāgan bukugeiguys wawtakon ven, wudayam waseg.

<sup>28</sup> “Awoum kuwenes tasiyas bikatimates kalivimiy, peinan nag kadilok bikatimates kululuwamiy. Tage kadiloka kuwenes town biyageg kululuwamiy son kalivimiy wadiginasim, ven to kalbaleb waseg.

<sup>29-31</sup> “Adok maysan skwāsik mwanay misinak kweinim toya, tage mwanatan beimat Tamads mo bikakin. Kunukun babewein Tamads bo ivin babewein wakunuds; ansinap tawtoun, bo kadiloka bimtataᵛateimiy. Awoum kuwenes gamag tasiyas, peinan Tamads imtakavatemiy; maysamiy singay imug mansiyas skwāsik wasigeis.

<sup>32</sup> “Kal yak buk>wamtel wamtes gamag, buku-lana, ‘Yey Yeisuw nagamag yey’, igaw mo bakamtel wamatan Tamag wanakaew, balana, ‘Towen gungamag tonen.’ <sup>33</sup> Kukin gog kavel yak buk>wayaneig wamtes gamag, yey mo bakayaneim wamatan Tamag wanakaew.

*Niwal nag, tage naviy silmanin*  
(Luk 12:51-53; 14:26-27)

<sup>34</sup> “Awoum kunuways yey nam ven watinow niwal silmanin; niwal awoum, tage naviy silmanin. <sup>35-36</sup> Yey nam vagan magaltawaw mwasanin bivatays wasigeis timsiyas, o magalvinay bivatays wasigeis insiyas o wasigeis yiwsiyas, peinan gamag taliven bo bikamliwes.

<sup>37</sup> “Kal yak kusiwyoubus avakaein tamam son inam, tage yey kusiwyoubug kakit, nag kadilok bukusesuna gungamag yakoum. Kal yak kusiwyoubus avakaein nitum, tage yey kusiwyoubug kakit, nag kadilok bukusesuna gungamag yakoum.

<sup>38</sup> “Kadilok bukukow amklos, buk>wabkunig vagan mo bukukwanig; tage kukin bukupiyev, nag kadilok bukusesuna gungamag yakoum.

<sup>39</sup> “Kukin buk>wayus mwamovam, bo biyamkwaneim; kukin gog biyamkwen mwamovam peinan yey, igaw mo bukubanes.

*Maysamiy*  
(Mak 9:41)

<sup>40</sup> “Kukin kal beitam waseg yak, mamagina bo itam waseg yey; mo itam-vak waseg Yowbad, peinan Yowbad nikayabeig nam.

41 “Kukin kal yak bukwaveiyon waseg palopit teitan, peinan palopit towen, mogo palopit maysan bukukow. Kal yak bukwaveiyon waseg tadidumwal, peinan tadidumwal towen, mogo maysan tadidumwal bukukow.

42 “Kal yak bukusiwayoub kakit teitan gwad waseg, peinan gunavamul towen, mamagina kwavtanok anasoup bukusek, moundid adibakeim maysam nag biyamkwen.”

## 11

### *Yon ikayeb navamul inekes Yeisuw (Luk 7:18-35)*

1 Yeisuw anilivan towen, imulis nagamag tasiyas sinawatan teiy. Imulis ikous, inoun in ven babaw, ikatimlakes gamag babaw, igeiguy.

2-3 Misumkwey towen Yon nises wadeil, mtowen tabibaptaysein gamags, butun Yeisuw inawotet iligen, ikayeb navamul mwasanin inekes Yeisuw, ikatugans, ilansa, “Yowbad bikayeb Mesay beim, mtowen yakoum? o nag? tabta teitan bakakayamat igaw beim wankuyeim?”

4-6 Yeisuw ikatimop asilivan, ilana, “Kuneis, kwatimlakes Yon sinap towen nukukines o kulinganes; magina toukwaws mites bo ikiplal, takagayals bo inounas bwein, toulepels bo ibwein kalivis, tasiyas ituy tiges bo iliganes livan, takanigs bo ikits mwasanin, o tasiyas tasimavs inganegs Yowbad anilivan bwanabwein. Kal yak bukusimounid gunawotet waseg, tage takupiyaveig, igaw mo bukumwasaw.”

<sup>7</sup> Iyums tasiyas, Yeisuw mo ikatiganes gamag babaw peinan Yon, ilana, “Kweiboug kuneis wanawoud, aveiyag silmanin bukukines? Bukukines kay iguwen yag, ne?”

<sup>8</sup> “O bukukines gamag teitan anakweim mway-namnabwein ne? Nag, adok tasiyas nisesus guyawaw wasibunatum.

<sup>9</sup> “Tage, kuneis kukines palopit teitan. Mounid mtowen Yon nimgwayes palopit wasigeis.

<sup>10</sup> “Peinan livanen Yon nises, magina Yowbad anilivan nidibek Mesay, palopit mo ilel Bukitab waseg mamagina:

‘Akayeb guntuwat bimgwayeim, bikidumwal muked beibwein.’”

<sup>11</sup> Yeisuw mo ilana, “Mounid adibakeimiy nag kal nikop ven watinow ikalsow mtowen Yon, peinan Yon ikalsawes gamag babaw; tage Yowbad nakaleiwag kweivaw waseg asibabaw ikalsawes Yon.

<sup>12</sup> “Misiyamun Yon inawotet waseg, tasiyas tatawtouns sivines Yowbad nakaleiwag, isilamaws sitawtoun waseg iyyousis ee... nagein bo mawan.

<sup>13</sup> “Tut kweiboug Moses nakaleiwag o tasiyas palopit, Yowbad nakaleiwag isekes gamag wasigeis ee... wankuyeim mo isap Yon.

<sup>14</sup> “Kukin sivinamiy bukuliganes agulivan townen mo bukukwakins kavel Yon. Townen Ilaytiy vagan bikidumwal Mesay inaked, mtowen mounid Yon.

<sup>15</sup> “Yakamiy tigamiy sam bweina kuliganes.”

<sup>16-17</sup> Yeisuw mo ilivan, ilana, “Amawan bak-abebay mo bukukwakins amisinap? Adok yakamiy mamagina gamagal iwliwals wavtakon

ven, idibakes sisiyas, ilansa, ‘Kawaway kup, tage nag kusilasals; ikous mo kalloupid, tage nag kuvalams.’

18-19 “Peinan Yon isap, nag ikamkwam; namimoum wayn, mo kulansa, ‘Takabalawein towen, peinan baloum iweiy.’ Gimgilitoun yey mo asap, akamkwam, amwamoum, mogo kulansa, ‘Tagovek towen, o tamwamwein wayn towen, ikaveiyons siney takalbalebs o tasiyas takaweins takis.’ Ga bukukines aw-wotet bwein, mo silawun bukukwakins, sinap tonen.”

*Yowbad bimop ven mwasanin asisinap kalbaleb  
(Luk 10:13-15)*

20 Ven mwasanin nikines Yeisuw nawotet taw-toun, tage nag ipiyaves asisinap kalbaleb, mapun Yeisuw mo ikanes, ilana:

21-22 “Kuvalams yakamiy Kolesin o yakamiy Beteseid. Magat kweiboug tasiyas Tayil o tasiyas Sidon bikines mulin naman Yowbad mawana gunawotet nukukines nagein, nuwanaw mo bisimounids, bipiyaves kid asisinap kalbaleb, sona koun sewed bivalams-wan peinan asisinap kalbaleb, mo bipiyaves. Yakamiy gog nag. Mounid adibakeimiy igaw tutan Yowbad bimop vena babaw asisinap, tasiyas bilivatus sikalbaleb kakit, yakamiy gog avakaen.

23-24 “O yakamiy-vak Kapaneyum bukumwens kid wanakaew; nag gog, bukubus watinow, bukuneis watum. Magat kweiboug tasiyas Sodom bikines mulin naman Yowbad, mawana gunawotet nukukines, mo bivages asisinap kweit-tan, Yowbad nag beiweiys tasiyas, bisesus ee... tut



towen bisigagas. Mounid adibakeimiy igaw tutan Yowbad bimop vena babaw asisinap, tasiyas Sodom bilivatus sikalbaleb kakit, yakamiy gog avakaein.”

*Yeisuw ansinap kweitan*  
(Luk 10:21-22)

<sup>25-26</sup> Tut gog towen Yeisuw initoug, idibek Taman, ilana, “Tamag yakoum, libalab natovek o ven watinow natovek yakoum. Kalin nuwag yak peinan nukusowm sinap tatonen. Tasiyas tassinaps nag bikakins, tage kukwatimlakes tasiyas mamagina gamagal; mo ikakins tasiyas. Peinan kaleiwag bwein wananoum.”

<sup>27</sup> Yeisuw mo ilivan, ilana, “Tamag bo itam youd babaw waseg Natun yey. Tamag anmwānet ikakin Natun yey; o yey agumwānet akakin mtowen Tamag. Igaw, kalisiy beivag sivinag mo bakatimlakes; e, tasiyas mo bikakins Tamag.

<sup>28</sup> “Yakamiy kunamiy mōmōuvit o miwotet mōmōuvit, kumeis waseg yey, mikabiyeiwas silmanin.

<sup>29</sup> “Kumeis, kulabeigs kwanag waseg, mo bukukwawes agusinap yagan manum; kuluwamiy mo bibānes sikabiyeiwas.

<sup>30</sup> “Peinan kid kwanag gagab, gunawotet bwein.”

## 12

*Yeisuw takaleiwag yam tapwāloul waseg*  
(Mak 2:23-28; Luk 6:1-5)

<sup>1</sup> Misumkwey towen Yeisuw siney navamul inoyes kweitan ked wanuwan bag, yam tapwāloul

waseg; navamul asimoun, ilapes wit anagin, ikams.

<sup>2</sup> Tasiyas Palisiy ikines, idibakes Yeisuw, ilansa, “Kukin muvumul, nag igoulus Sabat.”

<sup>3-4</sup> Yeisuw ilana, “Adok nag kukwakins livanen Deibid, nises Bukitab wanuwan. Peinan asimoun siney nagamag, isiws Yowbad wanbunatum, ikams bled townen nises Yowbad wamatan. Tanuwgwes lun bo ikatibomes bled townen. Na-ikadilok Deibid beikam; nagamag-vak nag beikams; misinaka tasiyas tanuwgwes lun. Tage tanuwagan lun isek Deibid sen nagamag, mo ikams, peinan singaya asimoun.

<sup>5</sup> “O adok nag kuvinis Moses nakaleiwag, peinan Sabat waseg tasiyas tanuwgwes lun iwotets lun, Yowbad wanbunatum, tage nag ivag asisinap kalbaleb.

<sup>6</sup> “Gunakaleiwag townen kweivaw imug-wan Yowbad nabunatum waseg.

<sup>7</sup> “Livan nises Bukitab waseg, ‘Makava lun apiyev; sivinag kid siwayoub.’ Magat bukukwakins Yowbad anilivan townen, adok nag bukuygages tasiyas toubweins.

<sup>8</sup> “Peinan Gimgilitoun yey, Sabat tanuwagan yey.”

*Sabat waseg Yeisuw ileb teitan, naman ipam  
(Mak 3:1-6; Luk 6:6-11)*

<sup>9</sup> Yeisuw ilisawes, inoun, isiw sisinagog silmanin tapwaloul.

<sup>10</sup> Sinagog wanuwan teitan nises, naman ipam. Tasiyas sivines biyateles Yeisuw, ikatiganes, ilansa, “Tab kadilok bitavag takatouns beibweins, Sabat waseg?”

11-12 Iwage Yeisuw ilana, “Adok nag teitan yakamiy alen sip bikalivatow bein waleg Sabat waseg, bilivan, bilana, ‘Deisa bisiw, peinan Sabat.’ Adok nag. Adok biyous, bikatinob, ne? E, gamag singay imgwayes wasigeis aleimiyas. Mapun bweina bitaleb sod Sabat waseg.”

13 Yeisuw mo idibek taw townen, ilana, “Kusayel namam palawen neipam.” Iyasel mo ibwein, mawana paliyuwein.

14 Siyas Palisiy bo igeg ninous, isaps, illivans sisiyas, sivines kid biyagages mtowen Yeisuw.

### *Yowbad natouwat*

15-16 Yeisuw ikakin ninous, inoun in. Gamag babaw ibwakuns Yeisuw waseg; takatouns ivag mo ibweins; idibakes, ilana, “Awoum kwamteles youd townen; awoum!”

17-18 Mo ikamat Yowbad anilivan palopit townen Isaya nilivnek mamagina:

‘Kukines guntouwat, bo adouw silmanin gunawotet.

Singay ikalin nuwag mtowen.

Basek kululuwag, mo bisek nakaleiwag didumwal, ven babaw wasigeis.

19 Nag biwkuwak, nag bikamniman, gamag nag biliganes aygan wavtakon ven, nag.

20 Kaytuk isasal, nag biwut bilev, nag.

Wodam nakagidaged kalbaleb, nag bisuwmet, nag.

Igaw nawotet waseg sinap didumwal mo biton.

21 E, tobwag ven gimgilis binmises vagan mtowen bilabes.’

### *Ivtokes livan Yeisuw*

*(Mak 3:20-30; Luk 11:14-23; 12:10)*

<sup>22</sup> Wankuyeim itokes teitan gamag, baloum neiweiy, imeyes Yeisuw waseg, ankatoun mamagina ikaw matan, o wadon ikapet; ta-mawan bikapwageg bilivan. Inekes Yeisuw, ivag mo ikilev, bo ibwein gamag townen, ikin, ilivan bwanabwein.

<sup>23</sup> Gamag babaw ikines, bo isom ninous, ilansa, “Adok mtowen Deibid tabun, Mesay.”

<sup>24</sup> Siyas gog Palisiy iliganes, mo ivtokes livan, ilansa, “Siyas baloum sitovek Seitan mtowen ileb Yeisuw, mo ikayabes baloum.”

<sup>25</sup> Yeisuw ikakin ninous, mapuna idibakes, ilana, “Kukin bod avakaein tawtoun nises; tage bod to gimgilis bikavikuns sisiyas; bilivis, bo beigwey bod townen, beikous. O ven o kum mawan, kukin gamag bilivis bivages bod babaw, bo beigwey ven townen o kum townen.

<sup>26</sup> “Mapuna kuninuways Seitan inabod, kukin Seitan bilabeig mo bakayeb Seitan natouwat tasiyas baloum, mogo Seitan inabod bilivis, bo beikous nakaleiwag tonen. Tage nag.

<sup>27</sup> “O kuvtokeigs livan, kulansa, ‘Seitan ileb mo ikayabes baloum,’ o kal ilabes mivamul mo ikayabes baloum? Kuninuways asisinap tasiyas mo bukukwakins bo ibol amilivan.

<sup>28</sup> “Kukin gog Yowbad Kululuwan bilabeig mo bakayeb baloum, mapuna Yowbad nakaleiwag bo isap wasigeis yakamiy.

<sup>29</sup> “Kweitan sinap kuninuways: Ta-mawan bitasiw tawtoun gamag wanabunatum mo bitaven navavag. Deisa bitayous taw townen, tayawen naman, kaken, vagan nag binoun, mo bitaven navavag, tayakousis.

30 “Kukin kal nag bilabeig gunawotet waseg, gamag townen isilbwed gunawotet. O kalisiy nag bikatikunakus wagunseigous, tasiyas gog bikatigayes.

31 “Mapun adibakeimiy, amisinap kalbaleb o amilivan kalbaleb Yowbad biwid babaw beikous; tage kweitan sinap nag. Magat bukuyeg Yowbad Kululuwan, nag biwid sinap townen, nag.

32 “Kukin bukutawyageig Gimgilitoun yey, Yowbad biwid amsinap townen; tage bukutawyeg Yowbad Kululuwan Bwanabwein, Yowbad nag biwid, tut townen nag, o tut wanakougwaw nag.

*Kay anagin*

*(Luk 6:43-45)*

33 “Magat kay bwein, anagin bwein. Magat kay kalbaleb, anagin kalbaleb. Takin anagin mo takakin kay amawan, bwein o kalbaleb.

34 “Yakamiy takalbalebs magina mwatet yakamiy, ta-mawan bukulivans bwein, peinan ninoumiy kalbaleba singay; mapun amilivan kalbaleb.

35 “Tasiyas toubweins asisinap bwein, mapuna siwotet bwein; tage tasiyas takalbalebs asisinap kalbaleb, mapuna siwotet kalbaleb.

36 “Kukin bukulivans mav, Yowbad mo biy-ateleimiy, igaw tutan bikatukin sinap babaw gamag wasigeis.

37 “Magat amilivan bwein bo bukounounas bwein, o kukin gog amilivan kalbaleb mo bukulivatus kalbaleb.”

*Gamag mwasanin sivines bikines naman mulin*  
*(Mak 8:11-12; Luk 11:29-32)*

38 Wankuyeim takatimlakeins kaleiwag mwasanin sisiy tasiyas Palisiy mwasanin idibakes Yeisuw, ilansa, “Tamwey, sivinem namam mulin bakakin, mo bakasimounid waseg yak.”

39-40 Yeisuw ikatimop, ilana, “Kalbaleb gamag, tapiyaveins Yowbad yakamiy, sivinamiy bukukwakins namag mulin. Nag kweitan sinap bukukwakins; misinaka sinap townen, peinan palopit townen kweiboug Youna nises uloulas wanuwan, yam kweitoun o boug kweitoun, maṁwan yey Gimgilitoun yey bo basesun pwepway wanuwan, yam kweitoun o boug kweitoun.

41 “Min-Ninavek igaw mo bitamanaws yaṁtal waseg, bilivans vaṁgan bukukwakins amisinap kalbaleb, gudwouvaws yakamiy. Peinan tasiyas iliganes Youna nageiguy mo ilaves asisinap kalbaleb; tage kaleiwag nagein nukuliganes ikalsow Youna nageiguy. Kuliganes; nag gog, nag kulaves amisinap kalbaleb.

42 “Igaw tutan Yowbad biyaṁtal wasigeis gamag babaw, mo kwın maṁwan kweiboug inaven wayals mo bilivan vaṁgan bukukwakins amisinap kalbaleb, gudwouvaws yakamiy. Peinan maṁwan kwın inoun in singay kadiveiyov vaṁgan biligen Solomon ansinap; tage sinap townen nagein nukuliganes ikalsow Solomon ansinap waseg.

*Gamag ibwein mo ilivet kalbaleb singay  
(Luk 11:24-26)*

43-45 “Magat yeiluw bikilev gamag, mo bitavin ven babaw, binineiv nakabiyeiwas. Binineiv nag,

bilivan bilana, ‘Bayum ban wagunbunatum to nalisow.’

“Beiyum biban nabunatum makaw, bo itaneivis, youd babaw bo ilivkases bwein; bikalin nuwan, bein ikin siney teinim teiy asisinap singaya kalbaleb, tasiyas asibabaw mo beisiws wabunatum, bisesus bisigagas. Kweiboug gamag townen nakalbaleb peinan yeiluw neisiw, tage nakabiyokous waseg singaya kalbaleb. Gudwouvaws yakamiy mikalbaleb bukulivatus mawan.”

*Yeisuw taliven*  
(*Mak 3:31-35; Luk 8:19-21*)

<sup>46</sup> Yeisuw igawa ilivan gamag wasigeis, inan budan itamanaws watoulan gamag babaw, sivines binekes, bilivans sisiy Yeisuw.

<sup>47</sup> Teitan ilana, “Inamwa budam nitatos watoulan.”

<sup>48-49</sup> Yeisuw idibek taw townen, ilana, “Kuninuways kalisiy inag budag,” mo ikatimlek navamul tasiyas nitatos wadadan, ilana, “Mtasiyas-one inag o budag.

<sup>50</sup> “Kal yak bukukow nanon Tamag walbalab, mounid yakoum bwadag o nagut o inag.”

## 13

*Talavein veitun*  
(*Mak 4:1-9; Luk 8:4-8*)

<sup>1</sup> Yam townen Yeisuw ilisow nabunatum, iwloubus in wakawalaw, isin.

<sup>2</sup> Gamag singay babaw inekes, mapuna itouw wawag, isin. Babaw gamag itamanaws itowas

wakawalaw. Yeisuw itouvin, ikines gamag babaw, mo ilivan.

<sup>3</sup> Tage ansinap babaw-wan livan kabebay waseg isekes gamag tasiyas, ilana, “Teitan taw in wabag ilivelov veitun.

<sup>4</sup> “Mwasanin ikalkalouw ininein waked, man imeis ikamkwams veitun townen waked.

<sup>5-6</sup> “Mwasanin ininein wadikudakul, pwepway nag mananan; nuwanaw isob peinan pwapwayein kakit-wan, tage ivag kalas mo iyag, peinan gidwalin nag beisoul mananan.

<sup>7</sup> “Mwasanin sisiyas awuyow veitun in wapwepway. Awuyow isobs, ivkuvakaein, mapuna kan igwey.

<sup>8</sup> “Mwasanin gog ininein pwepway bwanabwein waseg, isob, ivag anagin bwein, mwasanin lakatutan, mwasanin sinawanim, mwasanin sinawatoun.

<sup>9</sup> “Yakamiy tigamiy sam bweina kuliganes.”

### *Silawun kabebay*

*(Mak 4:10-12; Luk 8:9-10)*

<sup>10</sup> Wankuyeim gog Yeisuw navamul inekes, ilansa, “Aveyag silawun mukwabebay wasigeis tasiyas?”

<sup>11</sup> Yeisuw ikatimop ages, ilana, “Yowbad itam, sinapun libalab kaleiwag-nen isekeimiy; tasiyas gog nag.

<sup>12</sup> “Kalisiy yakamiy amisinap nises, igaw amisinap bikatimweis, bivakaein; tasiyas gog nag, bo bikow asisinap tasiyas, makava bisesus.

<sup>13</sup> “Mapuna akabebay wasigeis tasiyas, mo bikines tage nag biwtusis, o bikatiliganes tage nag biliganes bunik vagan bikakins, nag.



14 “Kweiboug palopit Isaya anilivan bo ikons tasiyas; anilivan ma<sub>w</sub>an:

‘Bukuliganes tage nag bukukwakins.

E, bukukines tage nag bukuwtusis.

15 Peinan ninous gamag tasiyas bo imouvit;

bo ituy tiges;

bo ikaw mites;

mata ge mites waseg beikins,

o tiges waseg beinegs,

bikakins, mo bikanavin ninous,

bavages kid beibweins tasiyas. Nag gog.’

16 “Yakamiy bwein, mitamiy ikin, tigamiy ineg.

17 “Mounid adibakeimiy kweiboug palopit babaw sisiyas tasiyas tadidumwals sivines bikines sinap towen nagein nukukines, o biliganes kaleiwag towen nagein nukuliganes; sivines kid, tage nag.

*Silawun ankabebay towen talavein veitun*

*(Mak 4:13-20; Luk 8:11-15)*

18 “Kadiloka kuliganes silawun kabebay towen talavein veitun.

19 “Veitun tasiyas ininein wa<sub>k</sub>ed mamagina gamag tasiyas iliganes Yowbad nakaleiwag, tage nag bikakins, towen takalbaleb mo bisap, bikow livan towen nises waninous, binow.

20-21 “Veitun wadikudakul mamagina gamag tasiyas iliganes livan towen, isimounids, imwasaws waseg, ee... bimwemway nen, gidiwlis nag beisoul mananan, gamag mwasanin biyages livanen Yowbad, biyagages tasiyas takaweins Yowbad anilivan, mo bikalkalouws gamag tasiyas.

22 “Veitun tasiyas sisiyas awuyow, mamagina gamag tasiyas iliganes livanen Yowbad, mo inuwes youd babaw ven watinow, sivines kid biguyaws, mo ilisawes ked bwanabwein, mapuna Yowbad nakaleiwag igwey wasigeis tasiyas, nag ivag angis.

23 “Tage veitun tasiyas pwepway bwanabwein waseg, mamagina gamag tasiyas iliganes livan, ikakins mo ivag angis, teitan lakatutan, teitan sinawanim, teitan sinawatoun.”

### *Kabebay wit son awuyow*

24 Vayuwein Yeisuw ikabebay, idibakes, ilana, “Bakabebay mo bukukwakins Yowbad nakaleiwag; peinan mawana gamag isop veitun bwanabwein wanabag.

25 “Wankuyeim boug waseg, gamag babaw bo immasis, teitan nikamliw tagnibag im wanabag isop awuyow magin mawana kan, tobwag gog. Mo iyum in.

26 “Igaw tut wankuyeim iwuw anagin mo ibananes awuyow tobwag waseg.

27 “Nagamag inekes tagnibag, ilansa, ‘Tamwey, adok muveitun bwein nitasapwes, avanuy meinoy neim awuyow towen kalbaleb?’

28 “Tamwey ilana, ‘Adok towen nikamliweids!’ Nagamag ilansa, ‘Tabta bakan kagut awuyow siyas?’

29-30 “Ilana, ‘Nag. Adok bukugutes mwasanin kan sona bukugutes sisiyas awuyow. Babaw bisesus, bimatuw kan, mo badibek tasiyas tatayaweins kan, balana: Wanmugwana awuyow kugutes kwatikunakus, kusinaves, kukwawes,

kunawes, kugabus; ikous; mo kan kutayoys, kwatikunakus kunawes wagunseigous.’ ”

*Kabebay akweiy, tipol, yist*  
(Mak 4:30-32; Luk 13:18-21)

<sup>31-32</sup> Kwatounun kabebay isekes, ilana, “Bakabebay mo bukukwakins Yowbad nakaleiwag; peinan mawana veitun kay yagan tipol, gamag isop wanabag, veitun gog singay kekel, tage isob kay kaywen, mo ivakaein, man iyoyows imeis iwlules sibunatum wayayagein, kay-nen avakaein.”

<sup>33</sup> Kwavasin kabebay isekes, ilana, “Bakabebay mo bukukwakins Yowbad nakaleiwag; peinan mawana yist, natan vin ikow yist kakit, isen wanuwan pwalaw kwavitoun, tamkwalan mo ilol.”

*Tut babaw Yeisuw ikabebay*  
(Mak 4:33-34)

<sup>34-35</sup> Sinap tasiyas babaw Yeisuw isekes nakabebay waseg; nag kweitan livan kamnat isekes gamag babaw, nag. Tut townen waseg bo ikamat palopit anilivan townen nilivnek mamagina:

‘Gunakabebay balivan;  
magina bakamat sinap misikena kweiboug nikawum.’

*Silawun kabebay wit son awuyow*

<sup>36</sup> Anilivan ikous, ilisawes gamag babaw, inoun in wabunatum. Navamul mo inekes Yeisuw, ilansa, “Kwamtilakem silawun kabebay awuyow wabag.”

37 Yeisuw mo ilik, ilana, “Talavein veitun bwan-abwein yey, Gimgilitoun yey.

38 “Abeibag ven towen watinow; veitun bwan-abwein, tasiyas itams Yowbad nakaleiwag waseg; awuyow veitun towen takalbaleb inagamag.

39 “Mtowen takammeiliw nisop awuyow, mtowen Seitan; tutan tayoy, nakabiyokous tut; tatayaweins kan tasiyas Yowbad natakayob.


40-42 “Nakabiyokous tut mamagina bikatikunakus awuyow bigabus, peinan Gimgilitoun yey bakayeb min-libalab, gunakabkaleiwag waseg bikatikunakus tasiyas takalbalebs sisiyas tapiyaveins sinap bwein, bilaves bineis kov avakaein waseg, mapuna tasiyas bivvalams-wan, peinan abes singay kalbaleb.

43 “Tut towen wanakougwaw tasiyas tadidumwals bikamnats mawana kalas, wanuwan Tamads nakabkaleiwag. Yakamiy tigamiy sam bweina kuliganes.”

### *Kabebay kweitoun*

44 Yeisuw mo ilana, “Bakabebay mo bukukwakins Yowbad nakaleiwag; peinan mawana money singay babaw teitan gog gamag bisown wanabag, bises ee... mo bikanig. Igaw gog kweitan gamag mo biban money towen, bisown vayuwein, biyamiyis navavag babaw, maysan bikow, bigimwel pwepway towen, singay bikalin nuwan peinan namoney singay babaw pwepway towen waseg.

45-46 “Vayuwein bakabebay mo bukukwakins Yowbad nakaleiwag; peinan mawana takunakun

teitan inineiv kun bwanabwein, iban kun kuvakaeinimgwayes kuna babaw; inakun babaw mo ilev silmanin kun to kweivaw, peinan singay bwanabwein.

<sup>47-48</sup> “Sivtounun bakabebay mo bukukwakins Yowbad nakaleiwag; peinan mawana wot ilaves wayol, ikwanes in kweitan magin kweitan magin. Bo ikalawt wot; ibiteilis, in wanakaew, mo bikatukins, in bwanabweins bidagis bein wanuwan abmavin, siyas gog kalbalebs, yegay, ikawes, ilaves.

<sup>49-50</sup> “Tut nakabiyokous waseg bo mawan, bakayeb min-libalab bikawes takalbalebs bilaves bineis kov avakaein waseg, toubweins gog bisesus. Tasiyas takalbalebs mo bivalams avakaein, peinan singaya abes bigeg.”

### *Yowbad nakaleiwag sinapun*

<sup>51</sup> Yeisuw mo ikatiganes, ilana, “Tab kukwakins sinap siyas babaw?” Itams, ilansa, “Oo!”

<sup>52</sup> Ilana, “Tasiyas gog takatimlakeins kaleiwag mwana nikakins Yowbad nakaleiwag sinapun, tasiyas gog asisinap kweivaw bwanabwein, kweiboug bwanabwein; mawana tanuwagan bunatum nawliyoug babaw bwanabwein, kweiboug o kweivaw.”

### *Min-Nasalet ipiyaves Yeisuw*

*(Mak 6:1-6; Luk 4:16-30)*

<sup>53-54</sup> Yeisuw nakabebay iyakous, inoun in wanven, isiw wanuwan sinagog silmanin tapwaloul, ikatimlakay. Isimasom ninous tasiyas, ilansa, “Ampalawen meinoy neim ansinap singay avakaein o nawotet singay tawtoun?”

55-56 “Adok tawtelein amweilok natun towen; inan Meliy nises; budan nisesus, tasiyas Yemes, Yosep, Saymon, Yudas; o nunet asibabaw nisesus. Ansinap avanuy meinoy neim?”

57 Bo igeg ninous, magina ipiyaves kid Yeisuw. Yeisuw gog mo ikatimop asilivan, ilana, “Vena babaw ivnases palopits, tage wasiven tatineis bo nag; wasibunatum tatineis bo nag.”

58 Yeisuw nawotet tawtoun na-ibabaw wanven tatonen, peinan taginvens nag isimounids waseg.

## 14

### *Kweiboug Elod nibob kayob Yon* (Mak 6:14-29; Luk 9:7-9)

1-2 Misiyamun towen gabman yagan Elod iligen butun Yeisuw, mapuna idibakes natouwats, ilana, “Mtowen tabibaptaysein gamags yagan Yon, kweiboug abob kayon, imat, adok bo ikit vayuwein, mapun nawotet tut towen singay tawtoun.”

3-5 E, kweiboug Elod niyous Yon, iyawen naman, isen wadeil, peinan Elod nikwey bwadan Pilip nakwav Elodiyas, Yon nilivan, “Awoum kukwey bwadam nakwav.” Elod sivanan beiweiy mtowen Yon, mapuna iyous, isen wadeil, anpwayat gog beiweiy Yon, peinan gamag babaw sivines Yon, idokes palopit teitan.

6-7 Wankuyeim isagal, peinan tutan inan nikop-yay, mtowen Elod ikamkwams siney nagamags. Elodiyas natun kudavin isal wamtes tawaw tasiyas, Elod ikalin nuwan, idibek, ilana, “Aveiyag sivanam bo basekeim, tabudabod tamag.”

<sup>8</sup> Nāwen in ikatugwan inan waseg, ilana, “Inag, aveiyag banitoug?” Inan ilana, “Kunitoug busbwesan Yon bisekeim.” Inek Elod, ilana, “Kusekeig busbwesan tabibaptaysein gamags, towen Yon. Bibwabwes kayon, busbwesan bisenas wanuwan abmavin, mo kusekeig.”

<sup>9</sup> King towen mo igeg nanon, tage peinan gamag babaw niliganes nitabudabod anilivan, mo itam.

<sup>10-11</sup> Itam, ikayeb teitan in wādeil, ibob kayon Yon, busbwesan isen wakabmavin, imey, isek guwāvin, ikow inow, isek inan.

<sup>12</sup> Yon navamul iliganes, ineis, ikawes won Yon, inawes idibwanis. Ikous, inekes Yeisuw, ikamteles sinap towen.

*Yeisuw ivakamus gamag kweinim tawsan  
(Mak 6:30-44; Luk 9:10-17; Yon 6:1-14)*

<sup>13</sup> Yeisuw iligen sinap towen, ilisawes gamag babaw, itouw wāwag, ikalāvis ineis ven makaw waseg. Gamag babaw iliganes livānen bo itouw, ilisawes siven kweitan, inoys gog wāked, ikikuns Yeisuw waseg.

<sup>14</sup> Yeisuw ilug, ikin gamag singay babaw, ikalin nuwan, takatouns ivag mo ibweins.

<sup>15</sup> Iwwotet ee... kwayav; navamul inekes, ilansa, “Bo ikwayav, kwayabes gamag babaw bineis waven mwasanin biyamiyises kaeis, peinan nawoud towen nag kweitan ven nises.”

<sup>16</sup> Yeisuw gog ikayuses, ilana, “Awoum bineis. Kusekes kaeis beikams.”

<sup>17</sup> Ilansa, “Kan nag. Misinaka bled kweinim, in mwanay.”

18-20 Ilana, “Kumeyes bakin; gamag babaw bisinis awuyow wakunuwatan, beikams.” Ikow bled son in wanaman, ikin wanakaew, ikalin nuwan waseg Yowbad, mo initoug. Ikous mo ikikiv bled issekes navamul, ikawes ivakamus gamag babaw, ikams, ikamuweips. Kan nikambwages isiyavis, idagis in wanuwan kaynad; bo ikalawt kaynad sinawatan kadiney.

21 Gamag siyas neikams kweinim tawsan tawaw, sisiyas vinay gamagal babaw.

*Yeisuw inoun wakunuwatan yevagam  
(Mak 6:45-52; Yon 6:15-21)*

22 Ikous, mo idibakes navamul, ilana, “Kutouws kumugwas, kusupels kuneis palatan; yey gog bases bakayabes gamag.”

23 Ikayabes ikous, ikatulag in wakoy, anmwānet binitoug Yowbad waseg. Bo iboug anmwāneta ises.

24 Tasiyas gog wawag kadiveiyov-o wabwanit ikallavis, bo ikalalav nimes, peinan yag meinoy neim wamtes.

25 Kakita beiyam, Yeisuw mo inoun wakunuwatan yevagam, bo binekes.

26 Navamul ikines Yeisuw ininoun wakunuwatan yevagam, idokes yeiluw kid, iwkuwaksa aspwayat.

27 Yeisuw ilana, “Bwein-wan! Awoum beivag amipwayat. Yey nases.”

28 Iw to Pita, ilana, “Guyaw, magat mounid yakoum, kudibakeig baw, mo banoun wakunuwatan yevagam, bawekeim.”

29 Yeisuw ilana, “Kum.” Pita mo ilisow wag, inoun wakunuwatan yevagam binek kid Yeisuw.



<sup>30</sup> Igaw ininoun, ikin yag itotow, anpwayat, kaken bo isoun, kakita bo bimukul. Iwak, ilana, “Guyaw kwatinabweig!”

<sup>31</sup> Yeisuw iyasel naman, iyous, ilana, “Adok nag kusimounid waseg yey. Aveiyag wawun ivag nanoum akweiy?”

<sup>32</sup> Iyums asteiy inekes tasiyas wawag, itouws, yag mo iyenom. <sup>33</sup> Tasiyas wag aniwnataw mo ikululs wamatan Yeisuw, ilansa, “Mounid Yowbad Natun yak.”

*Genesalet gimgilis ivag mo ibweins*  
(Mak 6:53-56)

<sup>34</sup> Isupels, ilugs ven yagan Genesalet.

<sup>35-36</sup> Min-Genesalet iwtusis Yeisuw, ikayabes sisiyas, ineis vena babaw, idibakes takatouns, ilansa, “Kwatuyouns kunekes Yeisuw.” Inekes, initougs waseg, sivines kid misinaka bikabkwanes matan anakweim. Itam, ikabkwanes, mo ibweins.

## 15

*Tammwayas sikaleiwag*  
(Mak 7:1-23)

<sup>1-2</sup> Tasiyas Palisiy mwasanin sisiyas takatimlakeins kaleiwag mwasanin mo ilisawes Yelusalem, imekes Yeisuw, ilansa, “Aveiyag wawun muvumul isiplaves tammwayas sikaleiwag, peinan beikams kan tage nag iwidis nimes?”

<sup>3</sup> Ikatimop asilivan, ilana, “Yakamiy-vak, aveiyag wawun kunuwes amikikun, mo kusiplaves Yowbad nakaleiwag?”

<sup>4</sup> “Yowbad nakaleiwag mamagina:

‘Kuvnases tamam inam’, o  
 ‘Kukin kal biyeg taman o inan tonen, mo kuweiyas  
 gamag towen.’

5 “Tage yakamiy amisinap, kulansa;  
 ‘Aveiyag bukusekes tamam inam, bweina  
 bukwatibom silmanin Yowbad, mo  
 bukwamgwayes tasiyas.’

6 “Amisinap towen waseg kugidamis Yowbad  
 nakaleiwag.

7 “Tayyaweids yakamiy! Mounid palopit towen  
 Isaya nilivnek livanen yakamiy, peinan ilel Yow-  
 bad anilivan mamagina:

8-9 ‘Gamag siyas wudous waseg ivnaseigs, tage  
 ninous waseg isinaleigs.

Makava itapwalouls waseg yey, peinan gamag  
 mwasanin asisinap ikatimlakays, tage  
 agusinap yey bo ipiyaves.’ ”

10-11 Mapuna Yeisuw idawes gamag babaw  
 bimeis. Imekes Yeisuw, ilana, “Kuliganes mo  
 bukukwakins. Aveiyag beisiw awn waseg nag  
 biyageg gamag kululuwan, nag. Misinaka sinap  
 towen bisap wawadon mo biyageg gamag.”

12 Tut wankuyeim navamul inekes Yeisuw,  
 idibakes, ilansa, “Tabta kukwakin siyas Palisiy  
 asimwasin amlivan to nukulivan?”

13-14 Yeisuw ikabebay, ilana, “Tamag walbalab  
 nisop kay bwanabwein; tage kay tobwag nitatos.  
 Tamag mo bigut kay siyas, bilev. Townen nakalei-  
 wag, yakamiy nag. Tasiyas mamagina toukwaws  
 imgwayes sisiyas toukwaws, bitokes sisiyas bi-  
 nawes, babaw mo bikalkalouws bineis waleg.”

15 Pita ilana, “Kulik kabebay towen vagan  
 silawun bakakakin.”

16-18 Yeisuw ilana, “Adok yakamiy-vak igaw tatagouwaws yakamiy. Tabta kukwakins aveikan beikoum gamag, kan townen bein waboutoun, bininoun ee... igaw simwan mo bisap bein wamnat? Tage aw-sinap gamag binuway wananon, igaw mo bilivan, anilivan townen bisap wawadon mo biyageg gamag kululuwan.

19-20 “Gamag nanon waseg sinap kalbaleb, katumat gamag, subwan, kaylas, veinaw, yaweid, yagay. Sinap siyas gamag wananon bisap mo biyageg gamag townen. Tage nag biwid naman mo beikam, sinap townen nag biyageg gamag, nag.”

*Vinen-Kenan inamis Yeisuw waseg  
(Mak 7:24-30)*

21 Yeisuw ilisow ven townen, inoun in walasin ven Tayil o Sidon.

22 Natān vin nag vinen-Yudiy, tage vinen-Kenan, isap, iwak, ilana, “O Guyaw, Deibid tabun yak, kusiwyoubug, peinan natug kudavin yeiluw singay iyageg.”

23 Yeisuw gog ikapay, nag ikatimop anilivan, nag. Navamul mo iwekes, ilansa, “Kwayeb nāwen iwkuwak, bo iwegweis wom.”

24 Yeisuw ikatimop ages, ilana, “Yowbad nikayabeig nam silmanin nagamag min-Yisleil, peinan mamagina sip tasiyas, ilassulis ked.”

25 Manāwen vin im, ikulul wamatan, ilana, “O Guyaw, kulabeig.”

26 Yeisuw ikabebay, ilana, “Awoum bakow gamagal kaeis, basekes awuk beikams, awoum.”

27 Iw manāwen vin, ilana, “E, moundid. Tage gamagal beikams, musamusan kan bikalkalouw

bininein waskawan teibol, bweina beikams man-siyas awuk puskekel, waskawan teibol nisesus.”

<sup>28</sup> Yeisuw ikatimop aygan, ilana, “Vin yak, singay kunmiseig vagan balabeim. Mukwanitoug waseg yey avanin mo bikamat waseg yak.” Mapuna natun ibwein tut townen waseg.

*Takatouns babaw ivag, mo ibweins*

<sup>29</sup> Yeisuw inoun, in, ivvayal yevagam avakaein yagan Galiliy, mo ikatulag in wakoy, isin.

<sup>30</sup> Singay babaw gamag inekes sisiyas takatouns babaw, takagayals, toukwaws, tasiyas ipam kikeis o nimes, o takakons. Takatounsa babaw inawes isewas wamatan Yeisuw, ivag mo ibweins.

<sup>31</sup> Gamag babaw ikines tasiyas takakons, ivag mo ilivans bwein; tasiyas ipam kikeis o nimes ivag mo idamoms; takagayals ivag mo inounas; toukwaws ivag mo ikins bwein; isom ninous, iyakawns waseg min-Yisleil siYowbad.

*Yeisuw ivakamus kweivas tawsan tawaw  
(Mak 8:1-10)*

<sup>32</sup> Wankuyeim Yeisuw idawes navamul, inekes, ilana, “Inok nuwag gamag babaw asimoun, kweitoun yam sigwey tasiyas nitasesus, kaeis nag beikams. Adok awoum bakayabes sona asimoun, bo bisiwsawoul wous wakod.”

<sup>33</sup> Iweis navamul ilansa, “Ven townen makava nawoud, avanuy bakaban kaeis tasiyas babaw gamag beikams?”

<sup>34</sup> Yeisuw ikatiganes, “Kweivin amibled?”

Ilansa, “Kweinim kweiy son in mwanay kekel-e.”

<sup>35-36</sup> Idibakes gamag babaw, ilana, “Kusinis.” Isinis, ikow bled towen son in, initoug, ikalin nuwan Yowbad waseg, ikikiv, issekis navamul; navamul mo ikawes ivvageins gamag babaw wasigeis.

<sup>37</sup> Asibabaw ikams ikamuweips. Kan towen nikambwages isiyavis, gamwat kweinim kweiy bo ikalawt.

<sup>38</sup> Asibabaw tasiyas ikamkwams ikamuweips kweivas tawsan tawaw sisiyas vinay gamagal babaw.

<sup>39</sup> Ikous, ikayabes gamag babaw, mo itouw wawag, ikalawis ineis ven avakaein yagan Magadan.

## 16

### *Gamag sivines bikines naman mulin Yeisuw (Matiw 12:38-41; Mak 8:11-13; Luk 12:54-56)*

<sup>1</sup> Wankuyeim siyas Palisiy sisiyas tasiyas Sadusiy inekes Yeisuw iyakwanes, ilansa, “Kwamtilakem mulin naman Yowbad, bakakin.”

<sup>2-3</sup> Ikatimop asilivan, ilana, “Kwayav waseg kulansa, ‘Libalab ikayibwel, kalas bo beikal,’ o gaboug waseg kulansa, ‘Bwaw beim peinan lov magin mawana musewun kov.’ Yowbad naman mulin tasiyas kuwtusis; tage tut towen waseg Yowbad naman mulin nag kuwtusis.

<sup>4</sup> “Kalbaleb gamag tapiyaveins Yowbad yakamiy, sivinamiy bukukines mulin naman Yowbad. Nag gog; misinaka sinapun Youna bukukines. Nag kweitan mulin naman Yowbad bukukines.” Ilivan ikous, ilisawes, mo inoun.

*Tasiyas Palisiy asiyist*  
(Mak 8:14-21)

<sup>5</sup> Ikalavis, italags palatan, navamul bo inumlaves asibled.

<sup>6</sup> Yeisuw idibakes, ilana, “Kumtakavateimiy. Kadiloka kupiyaves tasiyas Palisiy asiyist, o tasiyas Sadusiy asiyist.”

<sup>7</sup> Illivans sisiyas wasigeis, idokes Yeisuw anilivan townen peinan bo inumlaves asibled.

<sup>8-11</sup> Yeisuw go ikakina ninous, ilana, “Adok nag kunmiseigs vagan kan basekeimiy bukukwams. Mata kudokes silawun agulivan bled tatonen peinan kunumlaves, nag. Adok nag kunuwes kweinim tawsan tawaw neikams bled kweinim waseg mo kusiyavis kaynad babaw, o nag kunuwes kweivas tawsan tawaw neikams bled kweinim kweiy mo kusiyavis gamwat babaw. Silawun agulivan nag bled tonen. Aveiyag wawun nag kukwakins? Vayuwein badibakeimiy, ‘Kadiloka kupiyaves tasiyas Palisiy asiyist, o tasiyas Sadusiy asiyist.’ ”

<sup>12</sup> Mo ikakins anilivan nag livanen yist tatonen, silawun gog tasiyas Palisiy o Sadusiy sikatimlakay, kadiloka bipiyaves.

*Pita ikakin kavel Yeisuw*  
(Mak 8:27-30; Luk 9:18-21)

<sup>13</sup> Yeisuw inoun in walasin ven yagan Sisaliy Pilipay, ikatiganes navamul, ilana, “Gingilitoun yey, gamag mwasanin idokes kavel yey?”

<sup>14</sup> Iweis tasiyas, ilansa, “Mwasanin idokes yakoum tabibaptaysein gamags Yon yakoum, mwasanin gog idokes yakoum kid Ilaytiy

yakoum, mwasanin idokes yakoum Yelemay o teitan palopit kweiboug nukuyum nukum kid.”

<sup>15</sup> Ilana, “Tage yakamiy, kudokeigs kavel yey?”

<sup>16</sup> Saymon Pita ikatimop, ilana, “Yakoum Mesay yakoum, Tamwamov Yowbad Natun yakoum.”

<sup>17</sup> Yeisuw ilana, “Tammwasaw yakoum Saymon, Youna natun yakoum; bo nukuwtusig, nag ven watinow gimgilis ikatimlakeims, nag; tage Tamag walbalab nikatimlakeim. O yey mo bali-van badibakeim:

<sup>18</sup> “Yakoum Pita, wawun yagam “Dakul” o dakul towen wakunuwatan mo bawlul agugwamag mamagina gunbunatum yakamiy, o kanig nag bitawtoun wasigeis yakamiy tayakelesiys.’

<sup>19</sup> “Yowbad nakaleiwag anakiy mo basekeim yak. Aveiyag kuyawen ven watinow, Yowbad mo biyawen walbalab, o aveiyag bukulik ven watinow Yowbad mo bilik walbalab.”

<sup>20</sup> Ikous anilivan towen, idibakes navamul, ilana, “Awoum kukwamats sinap towen. Awoum teitan gamag bikakin yey Kelis Mesay, yey. Awoum.”

*Yeisuw nilivnek vagan bikakins bikanig mo beikit vayuwein*

*(Mak 8:31–9:1; Luk 9:22-27)*

<sup>21</sup> Tut towen Yeisuw isilamaw anilivan kweitan, vagan navamul bikakins, ilana, “Kadiloka ban Yelusalem, biyagageigs singay tammwayas sisiyas tanuwgwes lun situwawek o takatimlakeims kaleiwag; ikous mo beiweigs, bakanatoun mo bakit vayuwein.”

22 Pita iligen livan towen, itok Yeisuw, ineis palatan, ilana, “Yakoum Guyaw, awoum kulivan mawan. Awoum biyagageims mawan sinap towen nukulivan.”

23 Iw to Yeisuw, idibek Pita, ilana, “Kusineikik yakoum Seitan. Awoum kusilbwadeig. Amsinap towen meinoy neim gamag sikanuway waseg; Yowbad ansinap kweitan.”

24 Yeisuw mo idibek navamul, ilana, “Kal yak bukubkunig, kadiloka bukupiyeve nanoum tatoneim, bukukow amklos vagan bukukwanig kid, mawan magin yey bo bakanig. E, makadewen ked waseg bukubkunig yey.

25 “Kukin bukwayus mwamovam, bo biyamkwaneim. Kukin gog biyamkwen mwamovam peinag yey, igaw mo bukuban.

26 “Youd babaw bitayous ven watinow, tage mwamovads bigeg, bo bigak! Peinan ta-mawan gamag bivkek bisen mwamovan sivyuwein.

27 “Igaw Gimgilitoun yey mo bakam sigwey guntakayobs, o Tamag inakamnat waseg, mo maysan miwotet basekeimiy katanok katanok yakamiy.

28 “Mounid adibakeimiy mwasanin yakamiyanan nag bukulivatus kanig ee... mo bukukineigs Gimgilitoun yey igaw bam, gunakaleiwag mo bisilamaw ven watinow.”

## 17

### *Ankakin Yeisuw ivag kamnat (Mak 9:2-13; Luk 9:28-36)*

1 Yam kweinim katanok ikous, Yeisuw itokes Pita siney asteiy, tasiyas Yemes son bwadan



Yon; ikatulags ineis wakunuwatan koy avakaein; asteivas isiwas.

<sup>2</sup> Wamtes ivag ankakin kweitan, magin ikamnat maḡwana kaḡas mititeilin, anakweim ilapupwaḡaw singay gimagim.

<sup>3</sup> Mo ikines Moses son Ilaytiy illivans sisiy Yeisuw.

<sup>4</sup> Iw to Pita, idibek Yeisuw, ilana, “Guyaw, singay bwein tasesus townen. Magat sivinam mo bawlul mibwan bunatoun, bunatan yak, bunatan Moses, bunatan Ilaytiy.”

<sup>5</sup> Igaw ilivan, lov kweitan singay kamnat mo imteilis, aygan teitan wanuwan lov ilana, “Mtowen Natug bwanabwein, singay ibwein nanoug waseg; kuliganes aygan.”

<sup>6</sup> Navamul iliganes livan townen, ikalouws kantukovs, singay aspwayat.

<sup>7</sup> Yeisuw gog im ikabkwen wous, ilana, “Kutamanaws. Awoum beivag amipwayat.”

<sup>8</sup> Itamanaws, ikinewas, nag ivag gamag, misi-naka Yeisuw.

<sup>9</sup> Igawa iwwloubus, Yeisuw mo idibakes, ilana, “Awoum kwamteles sinap townen nukukines. Kwawumes. Igaw Gimgilitoun yey bakanig, baḡit vayuwein, mo kwamteles.”

<sup>10</sup> Navamul ikatiganes, ilansa, “Aveiyag wawun takatimlakeins kaleiwag ilivans, ‘Ilaytiy wana-mug beim, Mesay wankuyeim?’”

<sup>11-12</sup> Iw to Yeisuw, ilana, “Mounid livan townen ‘Ilaytiy beim mo bikatilow youd babaw’; tage bo neim. Tasiyas gog nag iwtusis; tage sivines beiweiys-wan, mo iyagages. Igaw mo biyagageigs yey, Gimgilitoun yey, bo maḡwan.”

13 Navamul mo idumwal ninous, peinan ikakins-wan tabibaptaysein gamags towen Yon mamagina Ilaytiy.

*Gwad takabalawein Yeisuw ivag, mo ibwein  
(Mak 9:14-29; Luk 9:37-43)*

14-15 Ikous, inounas, inekes gamag babaw, teitan taw im, ikulul wamatan Yeisuw, ilana, “Guyaw, binok nuwam natug, peinan ikabalawein, ankatoun avakaein. Tut babaw ikalkalouw ininein wakov, tut babaw ikalkalouw ininein wayvagam.

16 “Awey natug muvumul wasigeis; iyokons bo nag.”

17 Yeisuw idibakes tasiyas, ilana, “Takakons yakamiy, minamis nag. Bo akawgwes amisinap kakon. Kumey gwad towen.”

18 Yeisuw idibek yeiluw towen neiweiy gwad, mo ikilev. Gwad towen mo ibwein, tut towen waseg.

19 Navamul mo inekes Yeisuw anmwānet nises, ikatugwans, “na-ikadilokem bakakayeb yeiluw towen?”

20-21 Iw to Yeisuw, ilana, “Peinan nag kunmises Yowbad vāgan bivag. Mounid adibakeimiy, magat minamis mamagina tipol veitun, igaw bukudibek koy towen kulana, ‘Kunoun kun kutoun palatan,’ mo binoun; e, sinap babaw mo bikadilokeimiy.”

*Yeisuw ilivnek bikanig, mo beikit vayuwein  
(Mak 9:30-32; Luk 9:43-45)*

22-23 Igaw nisesus Galiliy, Yeisuw idibakes, “Teitan bisilkodeig yey, Gimgilitoun yey; gamag mwasanin mo biyousigs, bikatimateigs, yam

kweitoun mo bakit vayuwein.” Iliganes, singay ikalin nuwes.

*Simoney ibanes wanuwan in*

<sup>24</sup> Inounas ineis Kapaneyum. Iweis tasiyas takaweins takis (takis towen silmanin Yowbad nabunatum), ikatugans Pita waseg, ilansa, “Tabta mutovek itam natakis issekem, o nag?”

<sup>25</sup> Pita itam, ilana, “Oo!”

Pita iyum in wasibunatum. Iw to Yeisuw, ilana, “Saymon, wananoum yak, takaleiwags ven watinow nitsiyas bipayins wasigeis timsiyas? o tobwag gamag bipayins adok?”

<sup>26-27</sup> Pita ilana, “Tobwag gamag.”

Iw to Yeisuw, ilana, “Mounid. Nitsiyas nag bipayins, nag. Tage bweina bitapayin silmanin Yowbad nabunatum; mata ge bigeg ninous tasiyas. Kun kuksikous, in wanamug bukukous, kukin wanuwan mo bukuban idamoney, bo ikadilok idatakis aditeiy. Kukow kusekes takaweins takis tasiyas.”

## 18

*Kal bimug Yowbad nakaleiwag wanuwan  
(Mak 9:33-48; Luk 9:46-48; 17:1-2)*

<sup>1</sup> Mitiyamun towen navamul inekes Yeisuw, ilansa, “Kal bimug Yowbad nakaleiwag wanuwan?”

<sup>2-3</sup> Mapuna Yeisuw idouw gwad teitan beim. Im to gwad, Yeisuw itamnow gwad towen wanuwein, ilana, “Mounid adibakeimiy, kukin bikanavin ninoumiy bukumlavags mawana

gwad townen mo bukusiws wanuwan Yowbad nakaleiwag. Kukin gog nag, bo nag.

<sup>4</sup> “Kal yak bukumanum mawana gwad townen, igaw bukumug Yowbad nakaleiwag wanuwan.

<sup>5</sup> “Kukin bukuleb gwad teitan nisimounid waseg yey, magina bo kulabeig yey.

<sup>6</sup> “Gamagal tasiyas isimounids waseg yey, kukin kal bikatsilakes silmanin bikakins sinap kalbaleb, singay kalbaleb bilouvat gamag townen. Kukin gamag mwasanin bikawes dakul avakaein biyawanis kayon bo bilaves bein wabwanit, bi-wgwel, nakalbaleb townen kalamwey; tage kukin bisesuna ee... bikatsilek teitan gwad, singaya kalbaleb mo bilouvat.

<sup>7</sup> “O bo igak! Peinan tasiyas takalbalebs ikat-silakes gamag ven watinow. Gamag mwasanis bisilbwades sinap bwein, mo gamag babaw bilivatus kalbaleb. Ven watinow inakaleiwag mawan. Tage tasiyas bisilbwades sinap bwein, igaw singay kalbaleb mo bilivatus.

<sup>8</sup> “Kukin namam o kakeim bikaleiwag amsinap kalbaleb, kubob kulev. Bweina biyamkwen namam o kakeim, igaw mwamovam bukuban; awoum kid namam paleyun-wan o kakeim paleyun-wan igaw bilaveim bukun wanuwan kov townen nakagdaged nag beikous.

<sup>9</sup> “Mawan-vak matam. Kukin matam bikaleiwag amsinap kalbaleb, kugut kulev. Bweina biyamkwen matam palatanok, igaw mwamovam bukuban; awoum kid paleyun-wan igaw bilaveim bukun wadiginasim, kov nigidaged waseg.

*Awoum kwasigumis gamagal*

*(Luk 15:3-7)*

<sup>10</sup> “Awoum kwasigumis gwad teitan peinan igaw takakit; mound adibakeimiy anelos tasiyas ililabes gamagal tut babaw sisiy Tamag walbalab; ikikines magin. <sup>11</sup> (-)

<sup>12-13</sup> “Kuninuways kavel alen sip lakatutan, mwantanok gog bilasisul ked bikanig, adok tanuwagan mtowen tamtakavatein bilisawes mansiyas sip sinawanim sinawawas mwananim mwanawas wakoy bisesus, binineiv gog manawen nikanig. Igaw biban, mound bimwasaw avakaein silmanin; tage inamwasaw kakit wasigeis mansiyas sip nisesus bwein wakoy. Tanuwagan nag ivag sivanan biyamkwen mwantanok sip.

<sup>14</sup> “Tamag walbalab mawan; nag ivag sivanan biyamkwen gwad teitan, mamagina tasiyas.

*Towen soum tayagageim yak*

*(Luk 17:3)*

<sup>15</sup> “Kukin soum biyagageim, kunek kwatimlek ansinap kalbaleb. Amiteiy kulivans. Awoum gamag babaw biliganes. Kukin biligen amlivan bo bwein, peinan bukumwas soum bwadam towen.

<sup>16</sup> “Kukin gog nag biligen, soum teitan o simwey asteiy kunekes bwadam towen, kulivans waseg vagan kid bisimound amlivan meivek-wan.

<sup>17</sup> “Kukin bipiyev amlivan, mo kuneis kudibakes tayakelesiys, tasiyas babaw mo bilivans. Kukin bipiyev tayakalesiys asilivan, bweina kudok gamag towen tadadub, o magina takawein takis, kalbaleb gamag towen.

18 “Mounid adibakeimiy tayakelesiys yakamiy, aveiyag bukuyawanis ven watinow waseg, Yowbad mo biyawen walbalab. Aw-kaleiwag bukulikis ven watinow, Yowbad mo bilik walbalab.

19 “Vayuwein adibakeimiy, kukin amiteiy ven watinow kusesus, igaw bukutams aw-youd bukunitougs waseg Tamag walbalab Tamag mo beitam, bisekeimiy youd townen.

20 “Avanuy kwatuyouns amiteiy o amiteitoun silmanin gunawotet, simiy yey mo bitasesus, yey agugwamag yakamiy.”

### *Teitan nag biwid son nakalbaleb*

21 Iw to Pita, ikatigan Yeisuw, ilana, “Guyaw, siva<sub>v</sub>in soug biyagageig, mo bawid ansinap kalbaleb, banumlev? Adok siva<sub>n</sub>im sivay, ne?”

22 Yeisuw ilana, “Nag siva<sub>n</sub>im sivay. Deisa lakatunim lakatuy sinawanim sinawey mo siva<sub>n</sub>im sivay.

23 “Mapun bakabebay mo bukukwakins Yowbad nakaleiwag; peinan ma<sub>w</sub>wana guyaw teitan itita<sub>l</sub>ay wasigeis inagamag.

24 “Itokes teitan gamag imeyes, nakawlavag singay avakaein, sinawatan tawsan kina, ilana, ‘Gunmoney nag. Igaw wanakougaw mo bamop waseg yak.’

25 “Natovek ilana, ‘Nag. Igaw teitan gamag beim bisekeig maysamiy soum mukwav o nitum, bitokeimiy bukuneis kuwotets townen nawotet, maysamiy money bo bakow kadilok mukwawlavag.’

26 “Taw towen mo ikulul igilagel, ilana, ‘Binok nuwam yey, igaw mo bamop gunakawlavag babaw, beikous.’

27 “Iyakalin guyaw towen, ilik nagamag, iwid nakawlavag ikous, ilana, ‘Deisa kunoun. Bo awid mukwawlavag.’

28 “Inoun taw towen, iban son, peinan asteiy iwteles sitovek nawotet, ilana, ‘Mukwawlavag waseg yey lakatutan toya.’ Deisa iyous kayon son, ilana, ‘Nuwanaw kusekeig.’

29 “Son mo igilagel, ilana, ‘Binok nuwam yey, igaw mo bamop gunakawlavag babaw, beikous.’

30 “Towen ikayus, itok son, isen wanuwan deil, ilana, ‘Deisa kuses wadeil. Igaw bukumop mukwawlavag mo bukun wamnat.’

31 “Iliganes sisiyas, tasiyas tawteleins guyaw nawotet, singaya igeg ninous tasiyas, inekes sitovek towen, youd babaw ikamteles ikous.

32-33 “Sitovek idouw mtowen beim. Im, natovek ilivan, ‘Singay takalbaleb yakoum. Nukugilagel to nawid mukwawlavag meivek-wan. Inok nuwag yak, tage nag inok nuwam soum. Bo igak!’

34 “Kapasal nuwan, idawes tamtakavateins deil, ilana, ‘Kutokes gamag towen, kunawes wadeil, bises oko igaw bimop nakawlavag beikous, mo bein wamnat.’

35 “Tamag walbalab ansinap mawan. Kal yak wananoum ta-bukuwid simwey sikalbaleb waseg yak, Yowbad bo bimop amsinap kalbakeb yakoum.”

# 19

## *Peiyaw mikwawas o mimwǝnas wasigeis (Mak 10:1-12)*

<sup>1</sup> Anilivan tasiyas ikous, Yeisuw ilisow Galiliy, inoun in min-Yudiy siven palata-dadan lay yagan Yoldan.

<sup>2</sup> Singay babaw gamag ikatukuns waseg; inekes Yeisuw, ven townen nises, takatouns ivages mo ibweins.

<sup>3</sup> Tasiyas Palisiy mo inekes Yeisuw, iyak-wanes, ilansa, “Tab kadiloka bakapiyev makwawas peinan asisinap mwasanin kalbaleb?”

<sup>4-6</sup> Yeisuw ikatimop asilivan, ilana, “Tabta kuvinis livanen Yowbad, peinan kweiboug nibun gamag, kudataw kudavin, mo ilana. ‘Peinan kudataw kweitan, kudavin kweitan, kadiloka kudataw bilisow taman inan, bikatuvases son nakwaw, asteiy bimplavags mamagina wous katanok-wan.’ Peinan Yowbad anilivan mawan, taveivays asteiy wous nag akweiy, bo katanok-wan. Peinan Yowbad bo ilaten, awoum gamag teitan biliv bisenas palatan palatan; awoum.”

<sup>7</sup> Ilansa, “Magat kaleiwag townen moundid, aveiyag wawun Moses nakaleiwag vagan kid townen tapiyavein nakwaw bilel inalet bisek, bikayeb, mo beiyum bein wanven?”

<sup>8</sup> Iw to Yeisuw, ilana, “Kweiboug nag kweitan ked vagan gamag bipiyev nakwaw. Wankuyeim gamag siyas takakons, to Moses isekeimiy miked waseg bukupiayaves mikwawas.

<sup>9</sup> “Moundid adibakeimiy kukin kal bipiyev nakwaw, mo natan bikow, ansinap townen kalbaleb, magina ikanavaya mav. Misinaka



nakwaw bimasis son teitan taw, namwan mo bipiyev.”

<sup>10</sup> Navamul ilansa, “Magat veivay kaleiwag-nen bo mawan, adok awoum bitaveivays.”

<sup>11-12</sup> Yeisuw ilana. “Gamag babaw nag bikakins kaleiwag towen. Misinaka Yowbad ansinap bisekes gamag mwasanin, mo bikakins. Peinan tawaw mwasanin tutan insiyas nikopwes-yay powes nag, o tawaw mwasanin powes nag peinan gamag ikablaves, o gamag mwasanin ikablaves powes tatineis vagan bikanawes Yowbad nakaleiwag. Kal yak bukukwakin sinap towen, bweina kuligen.”

*Yeisuw sivanam gamagal*

*(Mak 10:13-16; Luk 18:15-17)*

<sup>13-14</sup> Mo imeyes gamagal, sivines Yeisuw bituwanis wanaman, mo binitoug pines. Navamul bikayabes kid, Yeisuw ikayuses, ilana, “Awoum kwayabes. Bweina bimeis waseg yey, peinan Yowbad nakabkaleiwag wanuwan tasiyas babaw asisinap mawana gamagal.”

<sup>15</sup> Bo ituwanis ikous, mo inoun.

*Guyawaw sikabeisiw Yowbad nakabkaleiwag waseg singaya keikay*

*(Mak 10:17-31; Luk 18:18-30)*

<sup>16</sup> Teitan gamag inek Yeisuw ilana, “Tamwey, aw-wotet bwanabwein bawtel mo baban mwamovag nag beikous?”

<sup>17</sup> Iw to Yeisuw, ilana, “Aveiyag wawun kwatiganeig silmanin sinap bwein? Anmwanet nises ansinap bwein. Magat sivanam mwamovam

nag beikous, kadiloka kuvnas nakaleiwag beibwein.”

18-19 Ilivan, “Aw-kaleiwag?”

Yeisuw ilana, “Tasiyas: Awoum kuweiy gamag; awoum kwanavay mav; awoum kuveinaw; awoum kuyaweid, teitan gamag livanen; kuvnases tamam son inam, kwanow ages; o kuvnas soum mawana kuvnaseim tatoneim.”

20 Toubwat townen ilana, “Kaleiwag siyas babaw bo ayakous. Aveiyag nikabwag waseg yey?”

21 Iw to Yeisuw, ilana, “Magat sivinam sinap bwein bukuyakous, kun kuymiyis muvavag babaw, money kukow kunow, kuvgen tasiyas tasimavs wasigeis, igaw Yowbad mo biyamiyiseim walbalab. E, mumoney kuvgen beikous, mo kum kwabkunig yey.”

22 Toubwat townen ikatiligen anilivan, ipiyev, peinan ikayus nawliyoug, singay babaw; bo igeg nanon, inoun.

23 Yeisuw mo idibakes navamuls, “Singay keikay guyawaw sikabeisiw wanuwan Yowbad nakabkaleiwag.

24 “Vayuwein badibakeimiy, man avakaein manawen kamel kalamwey keikay beisiw vas wawawun; tage guyawaw singay keikay beisiws wanuwan Yowbad nakabkaleiwag.”

25 Inavamul iliganes, isunasun ninous, ilansa, “Magat tasiyas nag, kalisiy mo beisiws?”

26 Yeisuw ikines tasiyas navamul, mo ilana, “Gamag yakamiy wasigeis nag kadilok, tage Yowbad waseg youda babaw bo ikadiloken-wan.”

27 Pita mo ikatugan, ilana, “Yakamey bo nakapiyev mavavag babaw, tage bo nakabkunim yak, aveiyag yakamey bakalouvat?”

28 Yeisuw ilana, “Mounid adibakeimiy, yakamiy nukubkunigs yey, igaw tut wanakougwaw, Gimgilitoun yey basin abag bwanabwein waseg, yakamiy bukusinis wakabamiy sinawatan akweiy bukwaleiwags wasigeis min-Yisleil adakums sinawatan akweiy.

29 “E, kalisiy yakamiy kulisawes mibunatum, tawlimiyas, timmiyas, inmiyas, nitimiyas, o mipwepway vagan bukwawes gunawotet, atimapun tasiyas singay babaw bukubanes son mwamovamiy nag beikous.

30 “Gamag babaw nimugwas igaw bikuyeims, o tasiyas nikuyeims igaw bimugwas.

## 20

### *Tawteleins bag*

1-2 “Yowbad nakaleiwag mawana teitan taw, inaven avakaein. Iyam gaboug ikit, iliwon waw-takon ven, ilana, ‘Gunawotet nises, gunabag, bukuneis kuwotets katanok yam, maysan wotet katanok kina, igaw mo basekeimiy.’ Itams mwasanin, inounas ineis wanabag.

3-5 “Wankuyeim, kalas bo italgagal, in waven, iban gamag mwasanin isimavs. Ilana, ‘Kuneis, kuwotets gunabag. Igaw maysan mo basekeimiy.’ Mo itams, ineis. Wankuyeim, yanay, iban gamag, ilivan mawan, mo ineis, iwotets wan-abag. Wankuyeim kalas itageg, iban gamag, ilivan mawan, mo ineis.

6 “Babaw gamag iwotets ee... kakita beiboug, tamwey townen in waven, iban gamag mwasanin, ilana, ‘Aveiyag wawun makava kusesusa bo iboug?’

7 “Iweis tasiyas, ilansa, ‘Peinan ta-kal bisekem mawotet.’

Ilana, ‘Yakamiy-vak kuneis, kuwotets gunabag.’

8 “Iboug, taginbag idibek natouwat, ‘Kudibakes tawteleins bag bimeis, maysan siwotet kusekes. Kusilamaw kweivaw gamag tasiyas mwana nimeis, mayses kusekes. Ikous, mo tasiyas kwayav nimeis. Mawana bein ee... nakabiyokous tasiyas gaboug nisilamaws.’

9 “Tasiyas kweivaw gamag nag bivakaein siwotet, imeis, wotet maysan mo ikawes katanok kina.

10 “Siyas gog gaboug nisilamaws, idokes kid avakaein mayses bikawes. Nag gog, katanok kina. Meiveka gamag mayses bo katanok kina.

11-12 “Mayses ikawes, ivtokes livan tamwey townen, idibakes, ilansa, ‘Tasiyas nag bivakaein siwotet mayses bo katanoka mawan yakamey. Yakamey gog nakawotet kalas midamed. Gaboug nakasilamaw kawwotet oko iboug.’

13-15 “Tamwey ikatimop aygan teitan, ilana, ‘Gwa, nag ayagageim, nag. Gaboug agulivan bo kutams: Katanok yam katanok kina. Mukina townen-an kukow kunow. Sivinag basekes kweivaw gamag siyas mawana yakamiy. Kadilok yey bakaleiwag gunavavag waseg. Awoum bimouvit dabam peinan agusinap bwein.’

16 “Siyas nimugwas igaw bikuyeims, o tasiyas gog nikuyeims igaw bimugwas.”

*Sivtounun ilivnek bikanig mo bitamanaw vayuwein*

*(Mak 10:32-34; Luk 18:31-34)*

<sup>17-19</sup> Ikous, mo inounas, bikatulags kid bineis Yelusalem. Waked Yeisuw idibakes tasiyas navamul, ilana, “Bo bitakatulags taneis Yelusalem, teitan gamag mo bisilkodeig Gimgilitoun yey, mo biyousigs tasiyas tanuwgwes lun situwawek sisiyas takatimlakeins kaleiwag, biyateleigs vagan bikatimateigs, igaw mo bitameigs wasigeis tobwag ven gimgilis Yelusalem nisesus; tasiyas bisibaweigs, biwaweigs, bikatkaviteigs waklos. Yam kweitoun mo batamanaw vayuwein.”

*Yemes son Yon initougs waseg Yeisuw*

*(Mak 10:35-45)*

<sup>20</sup> Iweis nāwen Sebediy nakwaw, siney nitun tawaw asteiy, manāwen ikulul wamatan Yeisuw, binitoug waseg.

<sup>21</sup> Yeisuw ilana, “Aveyiyag sivinam?”

Iw manāwen ilana, “Kukwaleiwag vagan kid igaw bukuguyaw, nitug siyas-nan bisinis wadadam, teitan wamkwatay, teitan wamkimaw.”

<sup>22</sup> Yeisuw ikatimop asilivan, ilana, “Nag kukwakins mikanitoug towen. Tab kadiloka bukumoums agukwawig to bamoum?”

Ilansa, “Bo kadilokem.”

<sup>23</sup> Idibakes, “Mounid bukumoums agukwawig, tage na-ikadilokeig bakaleiwag kavel bisin wagunkatay o wagunkimaw, nag. Tamag gog bo ikatineg abes tasiyas bisinis wagunkatay o wagunkimaw, mtowen takaleiwag.”

24 Yeisuw navamul tasiyas sinawatan mo iliganes sikanitoug asteiy son bwadan bo ikawkunes.

25-27 Yeisuw gog ikakin asisinap, idawes bimeis. Imeis mo ilivan, “Kukwakins ven babaw guyawuns asisinap, keikay wudous; o sikaleiwag tawtoun wasigeis. Yakamiy gog amisinap kweitan. Kukin kal sivanan biguyaw wasigeis yakamiy, bweina bmlavag mitouwat; o kal sivanan bimug, bweina beibus mawana tasimav, bikokew miwotet.

28 “Yey gog, Gimgilitoun yey, agusinap mawan. Yey nam, mata ge kulabeigs; deisa balabeimiy. Kaleivig bo atam maysamiy tababaws yakamiy.”

*Toukwaws asteiy ivag mo ikins bwein  
(Mak 10:46-52; Luk 18:35-43)*

29 Wankuyeim waked ininounas, bo ilisawes Yelikow, singay babaw gamag ikatukuns Yeisuw waseg.

30 Tasiyas toukwaws asteiy isinis wadadan ked, bo iliganes livanen Yeisuw, peinan bo neim. Iliganes, mo iwaks, ilansa, “Deibid tabun Mesay yakoum, binok nuwam yakamey.”

31 Asibabaw ilansa, “Kukwapays yakamiy!” Tasiyas gog isimkakinsa waseg, ilansa, “Guyaw, Deibid tabun yak, binok nuwam yakamey.”

32 Yeisuw itoun, mo idawes tasiyas bimeis, mo ilana, “Aveyag sivanamiy bavag wasigeis yakamiy?”

33 Ilansa, “Guyaw, kuvag beilal mitem.”

34 Yeisuw inok nuwan tasiyas, mo ikabkwen mites, nuwanawa ikins bwein, mo ibwakuns Yeisuw waseg, inounas.

## 21

### *Yeisuw isap ven Yelusalem*

*(Mak 11:1-11; Luk 19:28-38; Yon 12:12-19)*

<sup>1-2</sup> Inounas ee... kadiykusan-o Yelusalem, koy townen kay siyas oliv nitatos, ven yagan Bete-peig; mo ikayeb navamul asteiy, ilana, “Kuneis ven townen palatan, mo bukubanes donkiy nises, anvatul iyawanis wakayon, son natun nisesus; kulikus, kutokes kumeyes.

<sup>3</sup> “Kukin kal bikatugwan wasigeis yakamiy, kwatimapus anilivan, kulansa, “Tanuwagan sivinan mansiyas donkiy,’ mo beitam townen.”

<sup>4</sup> Ivages mawan, mo ikamat livanen Mesay, kweiboug palopit nilivnek, ilel mawan:

<sup>5</sup> “Kudibakes Sayon vinay-nen, ‘Kukines miguyaw bo beiw, Imwen donkiy watapwan; magina tammanum mtowen neiw, Isin donkiy natun watapwan.’ ”

<sup>6</sup> Ineis tasiyas asteiy, ikanawes aygan Yeisuw.

<sup>7</sup> Ibanes donkiy son natun, itokes imeyes; inibwis asikweim, isenas watapwan donkiy, Yeisuw imwen, isin wakunuwatan donkiy.

<sup>8</sup> Gamag babaw iyaves asikweim waked; mwasanin gog itateiys amweilok yageivein, iyaves waked.

<sup>9</sup> Tammugwas imugwas, takukuyeims ikukuyeims, asibabaw iwkuwaks, ilansa: “Kalin nuwem, Deibid tabun yak. DaGuyaws nikayabeim, nukum vagan bukwatin-abwem.

Kalin nuwem Tamads walbalab.”

<sup>10</sup> Isiw in Yelusalem, taginvens babaw isisawls imimeis silmanin bikines Yeisuw, illivans, “Kavel mtowen?”

<sup>11</sup> Tasiyas sisiy Yeisuw ilansa, “Mtowen palopit yagan Yeisuw, gum-Nasalet teitan, inaven wawnuwan Galiliy.”

*Ikawsapes tasiyas wanuwan Yowbad nabunatum niggimwals*

*(Mak 11:15-19; Luk 19:45-48; Yon 2:13-22)*

<sup>12</sup> Yeisuw isiw in wanuwan Yowbad nabunatum bunavakaein, mo ikayabes tasiyas niyamiyises sivavag; ikatitan siteibol tasiyas nikatimapus money dakul, o ikatitan abes tasiyas niyamiyises bwabun.

<sup>13</sup> Idibakes, ilana, “Bukitab waseg livanen Yowbad nabunatum nises mamagina: ‘Gunbunatum bikayuses silmanin nitoug;’ tage nukuvages buntuman veinaw.”

<sup>14</sup> Igaw nises Yowbad wanbunatum, tasiyas toukwaws sisiyas takagayals inekes Yeisuw; ivag, mo ibweins.

<sup>15</sup> Tasiyas gog tanuwgwes lun situwawek sisiyas takatimlakeins kaleiwag ikines Yeisuw, Yowbad wanbunatum, nawotet tawtoun, o gamagal niwkuwaks ilansa, “Kalin nuwem Deibid tabun yak,” singay mo ikawkunes Yeisuw tasiyas.

<sup>16</sup> Ikawkunes, ilansa, “Bo kuligen ages, siyas gamagal?”

Yeisuw itam, ilana, “Oo!” Ilana, “Adok nag kukwakins livanen Yowbad, Bukitab waseg, mamagina:

‘Ninous bo kusekes gamagal sisiyas apwaw, mo iyakawns bwein.’ ”



17 Mo ilisawes inoun, ilisow ven towen avakaein, inoun in wunkakit, imasis ven towen Betaniy.

*Ikawtun yaveinun  
(Mak 11:12-14, 20-24)*

18 Iyam-nen gaboug iyum in silmanin wunovek, ivag anamoun.

19 Waked iban yaveinun kaytan, iwekey, anagin nag, yageiveina mav, ikawtun ilana, “Igaw nag kweitan anagim beivag waseg yak.” Nuwanaw mo ikaleyag, imat.

20 Navamul ikines, isom ninous, ilansa, “Nuwanaw bo ikaleyag yaveinun makaywen! Aw-sinap towen?”

21 Iw to Yeisuw, ilana, “Mounid adibakeimiy, awoum beivag ninoumiy akweiy. Magat bukunamis Yowbad natawtoun waseg, mo bukuvages mawana yey navag yaveinun; e, bukudibakes koy towen kulansa, ‘Kunoun kun kumukul wayol,’ mo binoun bein bimukul wayol.

22 “Aveiyag bukunitougs Yowbad waseg, kunamis beibwein, mo bisekeimiy.”

*Ilansa, ‘Aw-kaleiwag waseg nukuwtel mawan?’  
(Mak 11:27-33; Luk 20:1-8)*

23 Ikous, inoun in Yowbad wanbunatum, ikatimlakay. Mo imeis tasiyas tanuwgwes lun situwawek sisiyas tammwayas, ilansa, “Aw-kaleiwag waseg kuwtel mawan, o kal isekeim mukwaleiwag towen?”

<sup>24</sup> Yeisuw ikatimop asilivan, ilana, “Kweitan sinap bakatugan wasigeis yakamiy; e, bukulivans kamnat mo basekeimiy livan kamnat vagan bukukwakins silawun gunakaleiwag.”

<sup>25-26</sup> E, Yeisuw mo ikatiganes, ilana, “Kal isek Yon nakaleiwag mo ibaptayses gamags? Yowbad? o nag? adok gamag mwasanin?”

Bo ibol ninous tasiyas, illivans sisiyas, ilansa, “Kukin bitalivans ‘Yowbad,’ towen gog mo bilivan ‘Aveiyag wawun nukupiyaves aygan?’ Kukin gog bitalivans ‘Gamag mwasanin,’ bo biyagageids gamag babaw, peinan idokes palopit teitan mtowen Yon.”

<sup>27</sup> Idibakes Yeisuw ilansa, “Nag kakakin.”

Iw to Yeisuw ilivan, “Yey-vak nag balivan, nag bakamtilakeimiy kal isekeig gunakaleiwag.”

### *Kabebay Kunutaw son Bwadan*

<sup>28</sup> Yeisuw ikabebay, ilana, “Waninoumiy amawan? Tamwey teitan nitun tawaw asteiy. Mo inek kunutaw ilana, ‘Nagein kun gunabag kuwotet.’

<sup>29</sup> “Kunutaw ipiyev. Wankuyeim mo ikanavin nanon; inoun in iwotet.

<sup>30</sup> “Tamwey towen mo inek tawanay, ilana, ‘Kun kuwotet.’

“Tawanay ilana, ‘Oo! Bo ban awotet.’ Nag gog, ipiyev wotet, isinal.”

<sup>31</sup> Yeisuw ilana, “Asteiy ikatiliganes aygan times, tage kal ikanaway aygan?”

Ilansa, “Kunutaw.”

Iw to Yeisuw ilana, “Mounid adibakeimiy tasiyas mawana kunutaw mo beisiws wanuwan Yowbad nakabkaleiwag. Peinan tasiyas

takalbalebs, takaweins takis sisiyas tasiyas ikaninavays mav bo bimugwas Yowbad nakaleiwag waseg; yakamiy mawana tawanay wankuyeim.

<sup>32</sup> “Peinan Yon ikatimlakeimiy ked didumwal, tage nag kusimounids. Takalbalebs tasiyas bo isimounids, tawaw vinay. Yakamiy nukukines tage nag ikanavin ninoumiy; nag kusimounids, nag.

*Tawteleins bag*

*(Mak 12:1-12; Luk 20:9-19)*

<sup>33</sup> “Kabebay kweitan kunages: Tamwey teitan isop gleip babaw, bigulen gleip waseg; kay kaytan isop wadadan bag palavas, bo imlavag anakal; wayn kasinen ivkaes ikous; tamtakavatein bag nabunatum iwlul ikous; ivatam wasigeis gamag mwasanin vagan kid bimtakavates inabag; mo inoun in kweitan ven.

<sup>34</sup> “Igaw tutan gleip anagin bimwanoug mo ikayabes natouwat mwasanin, binekes tasiyas tamtakavateins bag, idokes tanuwagan bag anagin bikawes.

<sup>35</sup> “Nag gog, tasiyas tamtakavateins bag iyagages tamwey natouwat, teitan iwaweis, tayuwein ikatimates, tatounun iwaweis dakul waseg, imat.

<sup>36</sup> “Wankuyeim tamwey townen ikayabes natouwat kalamwey babaw, mo iyagages tasiyas.

<sup>37</sup> “Ikous, mo ikayeb natun, idoki bivnases natun.

<sup>38</sup> “Nag gog, iwtusis natun, ilansa, ‘Mtownen tamwey natun tatonen, kumeis taweis, mo bitakawes bag townen, dakiyays yakids.’

39 “E, iweis, iyousis, itokes tamwey natun, ilaves in watoulan bag, mo iweiys imat.”

40 Yeisuw ikatigan ilana, “Igaw beim tanuwagan bag, amawan bikaleiwag wasigeis tasiyas tawteleins bag?”

41 Iweis tasiyas, ilansa, “Biyagagesa singay, bikatimates, siwotet gog mo bisekes gamag mwasanin asisinap bwein, tasiyas mo beitams anagin bisekes tamwey bweilim katanok katanok waseg.”

42 Yeisuw ilana, “Adok nag kuvinis Bukitab livaneig, mamagina:

‘Wululay towen tawteleins bunatum nipiyaves,  
Tage bo imlavag anmwamwan bunatum.  
DaGuyaws nawotet towen,  
bo isom nanouds.’ ”

43 Yeisuw mo ilivan, “Mapun adibakeimiy Yowbad bigidem nakaleiwag wasigeis yakamiy, bisekes ven mwasanin, igaw tasiyas mo beitams inakaleiwag waseg, mo anagin beivag.

44 “Kukin kal bipiyaveig mo kalbaleb bilivet, mamagina bikalivatow wakunuwatan wululay towen mo bigulek won, o kukin gog wululay towen bikalivatow beiweiy gamag teitan mo bikatimimey. Wululay towen yey.”

45-46 Kabebay tasiyas iliganes siyas tanuwgwes lun situwawek sisiyas tasiyas Palisiy, ikakinsa tatineis askabebay. Sivines kid biyousis Yeisuw. Ta-mawan; iwenes gamags, peinan gamag babaw idokes Yeisuw palopit teitan.

## 22

### *Kabebay sagal veivay* (Luk 14:15-24)

<sup>1-2</sup> Vayuwein Yeisuw ikabebay livānen Yowbad nakaleiwag. Ilana, “Yowbad nakaleiwag māwana guyaw teitan inasagal. Bo isagal peinan natun teitan beivay.

<sup>3</sup> “Inasagal avanin ikatineg ikous, ikayabes natouwat mwasanin, idawes gamag bimeis bisagals. Ipiyaves gog.

<sup>4</sup> “Wankuyeim ikayabes natouwat mwasanin, idawes tasiyas ilansa, ‘Datoveks bo ikatineg kan ikous, bulumakaw kawkaveys bo iweiys ikous, bulumakaw bulwaway, askeitub igegayous, bo iweiys ikous, youd babaw bo ikatinages ikous. Kumeis sagal towen, peinan tamwey natun bo beivay.’

<sup>5-6</sup> “Tasiyas gog ipiyaves, issebaws, inounas ineis palatan palatan, teitan in wābag, teitan in bigimwal, mwasanin gog nisesus waven iyousis tamwey natouwats iyagages. Natouwat tasiyas asimwasin nag bikakit vāgan; mwasanin ge iweiys ikatimates.

<sup>7</sup> “Guyaw towen iligen, kapasal nuwan, ikayabes takanaviys, ineis iweiys takalbalebs tasiyas ikous, sibunatum babaw igabus kov waseg.

<sup>8-9</sup> “Iyums takanaviys; iwāge tamwey ilana, ‘Nakadilokes tasiyas beikams sagal to nakatineg. Kuneis guntouwat yakamiy, kudawes tasiyas wadadan ked nisesus, kukin kalisiy bukubānes, kudawes bimeis.’

10 “Inounas palatan palatan, tababaw ibanes mo idawes, mwasanin takalbalebs, mwasanin toubweins. Iliganes, ikatuyouns imeis, bo ikaławt gamag babaw wasagal.

11-12 “Tamwey towen im bikin gamag babawan, iban teitan ta-isikam sagal kweiman, idibek, ilana, ‘Gwa, amawan nukum, ta-ivag amkweim sagal kweiman?’ Towen isesuna ikikapay.

13 “Iw to guyaw, idibakes natouwats ilana, ‘Kuywanis naman kaken taw towen, kulaves bein watoulan, dadub waseg.’ Tasiyas watoulan bivvalams-wan, singaya bige ninous.

14 “Yowbad bo idawes gamag babaw; teyuy-e beisiws bimeis.”

### *Sisal natakis*

*(Mak 12:13-17; Luk 20:20-26)*

15 Siyas Palisiy iliganes, mo ineis, illivans sisiyas, idokes bikatiganes kid mo beibol Yeisuw anilivan.

16-17 Illivans ee... sinap kweitan mo iton. Ikous mo ikayabes sivamul mwasanin sisiyas Elod nagamag mwasanin, idibakes Yeisuw, ilansa, “Tamwey yak, kakakin amsinap mound, kakakin Yowbad nakaleiwag kukwatimlakay mound, o nag kugoulus guyawaw mwasanin, peinan gamag babaw wamatam bo katanokwan. Wananoum amawan? kadilokeids bitatams Sisal natakis? o nag? bitapiyaves adok?”

18-19 Yeisuw gog ikakina asisinap kalbaleb, ilana, “Aveiyag wawun kuyakwaneigs? Tayyaweids yakamiy! Kwatimlakeigs money towen, takis silmanin.” Money katanok mo isekes.

<sup>20</sup> Ikow money towen wanaman, ikatimlakes king yagan nises son kululuwan nilel money towen waseg, ikatugan, ilana, “Kavel yagan? kavel kululuwan towen?”

<sup>21</sup> Ilansa, “Sisal.”

Iw to Yeisuw, ilana, “Sisal navavag bweina kutams Sisal waseg, o Yowbad navavag bweina kutams Yowbad waseg.”

<sup>22</sup> Iliganes, isom ninous, iyums ineis wasiven.

*Gamag beikits vayuwein*

*(Mak 12:18-27; Luk 20:27-40)*

<sup>23-24</sup> Yam towen tasiyas Sadusiy mo inekes Yeisuw. Tasiyas Sadusiy asilivan ilansa, “Gamag nag beikits kanig waseg.” Mapun ikatiganes Yeisuw ilansa, “Tamwey, Moses nakaleiwag mamagina, kukin kal bikanig, nakwav sam, tage natun nag, kadiloka bwadan beivays son nakwab, igaw mo bikop natun bimplavag tuwan natun.

<sup>25</sup> “E, kunutaw teitan wamaven nises, budan teinim tatanok. Kunutaw ivays son nakwav, natun nag, ikanig, isikein ivays son nakwab.

<sup>26</sup> “E, isikein ikanig, natun nag, nakwab ivays son tawanay. Tasiyas tawanay imtamats ikous, nitsiyas nag, oko digumasus mo ivays son nakwab; ikanig, natun nag.

<sup>27</sup> “Ikous tawaw babaw, wankuyeim mo ikanig kudavin manawen.

<sup>28</sup> “Igaw tutan beikits kanig waseg, vin manawen namwan amtowen? Peinan asibabaw neivays siney.”

<sup>29-30</sup> Yeisuw gog ikatimop asilivan, ilana, “Ibol ninoumiy, peinan nag kukwakins Bukitab, o

peinan nag kukwakins Yowbad natawtoun. Igaw tut wanakougwaw gamag beikits kanig waseg, mo beikous veivay, peinan gamag bimlavags mamagina Yowbad natakayob nisesus walbalab.

<sup>31-32</sup> “E, moundid gamag beikits kanig waseg. Adok nag bukuvinis Yowbad anilivan wasigeis yakamiy, peinan ilana:

‘Yey Ebelam naYowbad yey;

Yey Aysak naYowbad yey;

Yey Yekob naYowbad yey.’

Yowbad nag ikaleiwag takanigs tatuwes wasigeis; nag. Tage tamwamovs wasigeis ikaleiwag.”

<sup>33</sup> Gamag babaw iliganes ansinap, bo isom ninous waseg.

### *Kaleiwag townen imug*

*(Mak 12:28-34; Luk 10:25-28)*

<sup>34-36</sup> Tasiyas Palisiy iliganes Yeisuw nikati-mop asilivan Sadusiy, nikapays, mo ikatuyouns tasiyas Palisiy, imeis. Palisiy teitan ikatigan Yeisuw, mtowen yatal sinapun ikakin; ikatugan vagan kid biyakwen Yeisuw, ilana, “Dakaleiwags waseg, aw-kaleiwag imug?”

<sup>37-38</sup> Iw to Yeisuw ilana,

“ ‘Kadiloka kusiwayoub daGuyaws Yowbad, kululuwam waseg, kaleivim waseg, o nanoum waseg.’

Kaleiwag townen imug; imgwayes kaleiwag babaw wasigeis.

<sup>39</sup> “Kaleiwag tawtoun kwayuwein nises:

‘Kadiloka kuvnases simwey mawana nukuvnaseim tatoneim.’



40 “Akweiyuna kaleiwag tasiyas wawun kaleiwag babaw, o wawun siyas palopit asilivan babaw.”

*Deibid tabun*

*(Mak 12:35-37; Luk 20:41-44)*

41-42 Tasiyas Palisiy ikatuyouns nimeis, Yeisuw mo ikatiganes, ilana, “Waninoumiy Mesay amawan? kavel tabun?”

Iweis tasiyas, ilansa, “Deibid tabun.”

43-45 Yeisuw mo ikatiganes, ilana, “E, Mesay Deibid tabun; tage kweiboug Yowbad Kululuwan isek Deibid ansinap mo ilivan, idok Mesay inaguyaw tatonen; anilivan mamagina:

‘DaGuyaws idibek gunGuyaw, ilana:

Kusin wagunkatay, vagan bavages beibus siyas astameiliw yak, bukuvnivans wakunutes.’

Peinan Mesay Deibid tabun, amawan Deibid idok tabun naGuyaw tatonen?”

46 Bo ikapays tasiyas. Ta-kal bikatimop aygan. Bo iyakous sikatugan waseg Yeisuw. Wankuyeim mo igoulus; nag teitan ikatugan waseg, nag.

## 23

*Yeisuw ikanes tasiyas takatimlakeins kaleiwag sisiyas Palisiy*

*(Mak 12:38-40; Luk 11:37-52; 20:45-47)*

1-3 Yeisuw mo idibakes gamag babaw, sisiyas navamul, ilana, “Moses kweiboug ikaleiwag gamag wasigeis, o nagein tut towen siyas takatimlakeins kaleiwag, sisiyas Palisiy, bo ikaliwageids mawan. Mapun kadiloka kukwanawes ages; tage

asisinap awoum kukwawes, peinan nag ivnases kaleiwag tasiyas nisekeids.

<sup>4</sup> “Sikaleiwag tasiyas mamagina kunamiy singay mounouvit nissekeimiy, tage nag kweitan koun kakit bikawes tatineis.

<sup>5</sup> “Siwotet iwteles vagan gamag babaw bikines mo bikavasis. Bukitab yageivein mwasanin iyawanis ikaygwagwes wawous vagan gamag bikines, o kweiman tapwaloul issikams vagan gamag babaw bikines.

<sup>6</sup> “Sivines kid bingwayes gamag babaw, sagal waseg; o sivines abes wanakaew wanuwan sinagog.

<sup>7</sup> “Kukin binounas bineis waven sivines kid gamag babaw bikululs wamtes, o bigoulus, billivans, ‘Guntakatimlakay yak.’

<sup>8</sup> “Awoum gamag bidokeimiy ‘Guntakatimlakay yak,’ awoum; peinan mitakatimlakay anmwānet, o yakamiy katanoka gamag yakamiy. Deisa kulansa, ‘Gwa.’

<sup>9</sup> “Ven watinow yakids awoum kudokes teitan, kulansa, ‘Timem,’ peinan Tamads anmwānet nises walbalab.

<sup>10</sup> “Awoum gamag bidokeimiy ‘Guntovek yak,’ peinan mitovek Kelis. Nag tayuwein mitovek nises, nag.

<sup>11</sup> “Kukin kal bimlavag mitouwat mtowen mo bingwayeimiy.

<sup>12</sup> “Kukin kal sivinan bimliguyaw mo beibus; tage kukin kal binib tatonen igaw mo biguyaw.

<sup>13</sup> “Tayyaweids yakamiy takatimlakeins kaleiwag yakamiy, o yakamiy Palisiy, singay kalbaleb bukulivatus, peinan kusilbwades

Yowbad nakabkaleiwag kidenen; yakamiy nag bukusiws; mogo gamag mwasanin beisiws kid; nag gog, bo kusilbwades. <sup>14</sup> (-)

<sup>15</sup> “Tayyaweids yakamiy takatimlakeins kaleiwag yakamiy, o yakamiy Palisiy, singay kalbaleb bukulivatus. Kutavins vena babaw, ikous mo kukuks, bwanit kadiveiyov kudopels. Aveiyag wawun? gamag anmwānet mo bikow mitapwāloul bimlavag gum-Yudiy. Ikous, mo gamag townen kuvages imlavag Seitan angamag, māwana yakamiy, tage bo bilisaweimiy ansinap kalbaleb waseg.

<sup>16</sup> “Takatimlakeins gamag yakamiy, bo ibol ninoumiy, singay kalbaleb bukulivatus. Kulivans, ‘Bweina bitatabudabod Yowbad nabunatum waseg, adilivan yaweid, tage bitatabudabod waseg goul townen nises Yowbad wanbunatum, awoum bitayaweid.’

<sup>17</sup> “Bo ibol ninoumiy, amisinap nag. Aveiyag imug? Goul townen imug? O Yowbad nabunatum imug? Mounid Yowbad nabunatum imug, peinan goul nises wanuwan.

<sup>18</sup> “Kulivans-vak, ‘Bweina bitatabudabod abeilun waseg, adilivan yaweid, tage bitatabudabod waseg lun to nises wakunuwatan, awoun bitayaweid.’

<sup>19</sup> “Bo ibol ninoumiy, amisinap nag. Aveiyag imug? lun townen? o dakabeiluns Yowbad wanbunatum, inalun nises wakunuwatan?

<sup>20</sup> “Mapun, igaw bukutabudabod abeilun waseg, bo kutabudabod wasigeis youd babaw nisesus wakunuwatan.

21 “E bukutabudabod waseg Yowbad nabunatum, bo kutabudabod waseg bunatum son mtowen nises wanuwan.

22 “E, bukutabudabod libalab waseg, bo kutabudabod waseg Yowbad aban son mtowen-vak nissin waseg. Bo ibol ninoumiy yakamiy.

23 “Tayyaweids yakamiy takatimlakeins kaleiwag yakamiy, o yakamiy Palisiy, singay kalbaleb bukulivatus. Gayas siyas kekel minit, dil, kamin, kulagus sinawatan, kalgutan kutams Yowbad waseg, tage Yowbad nakaleiwag avakaein waseg nag kutams, peinan sinap didumwal kupiyaves, siwayoub kupiyaves, simounid kupiyaves Yowbad waseg. Kadiloka kunuwes sinap siyas avakaein. Nag gog. Awoum kupiyaves sinap siyas babaw-wan.

24 “Takatimlakeins gamag yakamiy, mitamiy nag. Kwatkakils sinap kakit wasigeis, mamagina pwasigisig wanuwan amivavan mo kupiyaves, tage kamel sona kwanpwanis.

25 “Tayyaweids yakamiy takatimlakeins kaleiwag yakamiy, o yakamiy Palisiy, singay kalbaleb bukulivatus. Kwawig o abmavin watoulan kwatkakils, kuwidis bwein, gimagim watoulan, tage wanuwan kaeimiy bukuveinaws gamag wasigeis.

26 “Matam nag, Palisiy yak. Bweina beivag am-sinap bwein, waseg bukuban kam, mo bukusen wamkwabmavin o amkwawig waseg; babaw mo beibwein watoulan o wanuwan.

27-28 “Tayyaweids yakamiy takatimlakeins kaleiwag yakamiy, o yakamiy Palisiy, singay kalbaleb bukulivatus. Mamagina alawag

yakamiy, dakul watoulan singay ankakin bwein, singaya pwapwakaw, wanuwan gog kalbaleb, gamag tatuwes seiy, youd bikibik seiy. Yakamiy bo mawan, amikakin watoulan gamag ikines, magina sinap didumwal, waninoumiy gog sinap yaweid, ikamimet, kalbaleb seikwan.

<sup>29-30</sup> “Tayyaweids yakamiy takatimlakeins kaleiwag yakamiy, o yakamiy Palisiy, singay kalbaleb bukulivatus. Tasiyas palopit asisinap didumwal, kweiboug imats, sikalawag nukutoumis, astubub kusenans, mo kulansa, ‘Magat yakids bitasesus sidayas, tammwayas isitut waseg, nag bitalabes igaw iwaweiyas siyas palopit.’

<sup>31-32</sup> “Yakamiy gog kulivans mawan, peinan tammwayas tibiyaas yakamiy, amisinap mawana tasiyas, mo bukuyakousis siwotet kalbaleb.

<sup>33</sup> “Mwatet nitun yakamiy, Yowbad bikaleiwag bilaveimiy bukuneis wadiginasim. Ta-mawan bukusawls bukuneis.

<sup>34</sup> “Mapun akayabes palopit babaw, tassinaps babaw, takatimlakeins kaleiwag babaw; tasiyas biwekeimiy, igaw bukwatimates mwasanin, mwasanin bukuweiyas waklos, mwasanin wamibuntuman tapwaloul bukuwaweiyas vatul waseg, bukwatigigayes mwasanin mo bisawls bineis ven kweitan kweitan.

<sup>35</sup> “Amisinap mapun mo bukulivatus son mapun asisinap tasiyas kweiboug neiweiyas palopits. Ven watinow gimgilis yakamiy nukuweiyas tasiyas tadidumwals, nukusilamaws waseg tadidumwal townen Eibel; mo nukuwaweiyas tasiyas palopits oko Balakiy natun Sekaliy nukuweiyas Yowbad

wanbunatum, abeilun palatan, Yowbad nabunatum palakakit palatan.

<sup>36</sup> “Mounid adibakeimiy gudwouwaws yakamiy, bo bukulivatus mapun amisinap kalbaleb sona asisinap tasiyas tabgabougs.”

*Yeisuw ivq̄lam peinan Yelusalem  
(Luk 13:34-35)*

<sup>37</sup> Livanen ven towen Yelusalem Yeisuw mo ilivan mamagina “O Yelusalem gimgilis yakamiy, nukuwaweiys tasiyas palopits, o dakul waseg nukuwaweiys tasiyas Yowbad nikayabes niwekeimiy; tut babaw sivinag bamtakavateimiy mawana kolkolek imtakavates nitun; nag gog, kupiyaveigs.

<sup>38-39</sup> “Mapuna Yowbad ipiyev miven. Makava bukusesus. Igaw nag bukukineigs ee... anatum bukulivans, ‘DaGuyaws nikayabeim nukum, mapuna kakavasim,’ mounid mo bukukineigs.”

## 24

*Igaw bigulekwes Yowbad nabunatum  
(Mak 13:1-2; Luk 21:5-6)*

<sup>1</sup> Yeisuw ilisow Yowbad nabunatum, inoun; navamul mo inekes, ikamtilakes Yeisuw bikin Yowbad nabunatum siyas bunamnabweins.

<sup>2</sup> Yeisuw ikatimop ages, ilana, “Kukines bunsiyas bunatum. Mounid adibakeimiy bo bigulekwes biyakousis; dakul babaw bilaves bikatigayes.”

*Mouvit tutan nakabsilamaw ven watinow  
(Mak 13:3-13; Luk 21:7-19)*

<sup>3</sup> Inounas ineis koy townen bigulen oliv nises, isin; tasiyas navamul inekes, ilansa, “Kudibakem asinavin bigulekwes bunatum bunawen bunavakaein; amawan bakakakin avei-tut bukuyum bukum mo beikous ven watinow?”

<sup>4</sup> Iw to Yeisuw, ilana, “Awoum gamag mwasinis bikatidavimiy.

<sup>5</sup> “Igaw teitan bisap, bilana, ‘Yey Mesay Kelis yey,’ wankuyeim tayuwein bisap bilana, ‘Yey Mesay Kelis yey,’ wankuyeim tatounun mawan; e, mawana mawana ee... singay babaw. Tasiyas bo bikatidividavs wasigeis gamag babaw.

<sup>6</sup> “Livanen naviy bukuliganes, livan kweitan kweitan, awoum beiyow nuwamiy, kadiloka bivages mawan; nakabiyokous tut igaw.

<sup>7</sup> “Peinan ven kweitan bikanaviys kweitan ven waseg, ven avakaein bikanaviys ven avakaein waseg; ven mwasanin bikamates moun; ven mwasanin nik avakaein bivag.

<sup>8</sup> “Youd tasiyas moumouvit bisunaps, igaw mo bivakaein.

<sup>9</sup> “Tasiyas ikamliweimiy mo biyagageimiy, bikatimateimiy; e, vena babaw gimgilis bikamliweimiy peinan gungamag yakamiy.

<sup>10</sup> “Mapuna mwasinis bikalouws; mwasinis bisilkodes sisiyas, bikamliwes.

<sup>11</sup> “Palopit siyas mwasanin tayyaweweids bisaps, bikatidavis gamag babaw.

<sup>12</sup> “O sinap kalbaleb bo bivakaein, mapuna mo beigwey siwayoub wasigeis gamag babaw.

<sup>13</sup> “Kukin kalisiy bikaptules, ee... nakabiyokous tut waseg Yowbad mo bikatinabwes.

14 “Gungamag igaw mo bikawes livanen Yowbad nakaleiwag, biguyes vena babaw wadaban pwepway, bikatiliganes, mo beikous ven watinow.

*Moumouvit anatum  
(Mak 13:14-23; Luk 21:20-24)*

15-16 “Kweiboug palopit Daniyel nilivnek teitan nawotet igaw biyableb Yowbad navavag, youd singay kalbaleb waseg. E, igaw yakamiy bukukines towen Yowbad wanbunatum. (Bukuvinis livan towen kadiloka bukukwakins). E, igaw bukukines sinap towen, bukusesus Yudiy, kadiloka kusawls kuneis wəkoy.

17 “Magat bukuyeiwas wampwasiw, awoum kusiw vayuwein wambunatum wanuwan vagan bukukow muwliyoug, awoum. Nuwanaw kusawls.

18 “Magat bukuwotet wabag, awoum bukuyum bukukow amkweim.

19 “Tut towen wanakougwaw singay moumouvit bilivatus siyas vinay kakudapoms, o siyas vinvanuns.

20 “Kadiloka kunitougs waseg Yowbad vagan awoum bukusawls bulbweilim waseg, o awoum bukusawls Tapwaloul waseg.

21 “Peinan tut singay moumouvit. Nag kweitan tut ivag mouvitan mawana towen, kweiboug nag, igaw tut wanakoug nag.

22 “Kukin Yowbad nag bigidem moumouvit towen, nag kal son mwamovan bises. Tage Yowbad bo bigidem moumouvit, pinamiy inagamag yakamiy.



23 “Kukin kal bilivan, ‘Mesay townen-an,’ o bilivan, ‘Mesay townen-one,’ awoum kusimounids waseg.

24 “Peinan tayyaweids mwasanin bisaps, gamag bidokes Mesay tasiyas; o tayyaweids mwasanin bisaps, gamag mwasanin bidokes palopit tasiyas, bikatimlakays aniyes, mamagina naman mulin Yowbad, vagan kid bikatidavis gamag; idokes kid bikatidavis Yowbad nagamag.

25 “Bo akatiboug nuwamiy sinap townen.

26 “Kukin gog gamag mwasanis bidibakeimiy, bilansa, ‘Mesay wanawoud nises,’ awoum bukun kukin; awoum. Kukin bilansa, ‘Nises bunatum wanuwan,’ awoum kusimounids.

27 “Igaw Gimgilitoun yey bayum baw, mamagina mititeilin kavikawn bisap wanuvid bimteil ee... bein wayavat, gamag babaw bikines.

28 “Avanuy takanig nises, mansiyas bunibwan bikatuyouns bimeis.

### *Gimgilitoun beiyum beim*

*(Mak 13:24-27; Luk 21:25-28)*

29 “Moumouvit anatut beikous, kalas mo bidadub, tibukon-vak bikanig mititeilin, siyas wutun walbalab bikalkalouws, youd siyas wanakaew bo beigwey.

30 “Mo bukukines aniyag wanakaew yey Gimgilitoun. Ven babaw gimgilis bivalams, bikineigs Gimgilitoun yey, bo baw lov waseg, soug guntawtoun o yakawanag avakaein waseg.

31 “Bwagig biyik avakaein vagan guntakayobs bineis bikatiyounis gungamag wanuvid, wayals, wayavat, wabomat, bilisawes vena babaw wadaban pwepway, mo bimekeigs yey.

*Yaveinun livanen**(Mak 13:28-31; Luk 21:29-33)*

<sup>32</sup> “Kabebay nises yaveinun waseg. Kadiloka kuliganes sinapun yaveinun. Bukukin biyasus yageivein kweivaw mo bukukwakins wuwal bisilamaw.

<sup>33</sup> “Mawan magin bukukines youd tasiyas mo bukukwakins Gimgilitoun yey basap, mamagina wakoukwed nases.

<sup>34</sup> “Mounid adibakeimiy gamag yakamiy, igaw son mwamovamiy bukusesus, mo bukukines youd siyas babaw.

<sup>35</sup> “Libalab son ven watinow bigulek beikous, tage agulivan nag beikous, nag.

*Ta-kal ikakin avei-yam**(Mak 13:32-37; Luk 17:26-30, 34-36)*

<sup>36</sup> “Ta-kal ikakin avei-yam o avei-tut, nag; min-libalab na-ikakins; yey nag bakakin; misinaka Tamag ikakin.

<sup>37</sup> “Mawana tutan Now, mawana tutag yey, Gimgilitoun yey.

<sup>38</sup> “Peinan kweiboug anatut yevagam na-ipop ven, gamag ikamkwams, imwamoums, iveivays, Now mo itouw wawag.

<sup>39</sup> “Yam townen na-ikakins ee... kweis mo isap iyagages tasiyas. Mawan magin Gimgilitoun yey bayum bam, gamag nag bikakins avei-tut.

<sup>40</sup> “Tawaw asteiy biwwotets wabag, teitan bakow, teitan bises.

<sup>41</sup> “Vinay asteiy bikanimimayes wit, natan bakow, natan bises.

<sup>42</sup> “Kadiloka kumtakavateimiy, peinan nag kukwakins avei-tut miGuyaw yey mo bam.

43 “Kadiloka kukwakins sinap towen. Magat tanuwagan bunatum bikakin asinavin boug waseg tavveinaw bisap, bo beikit bimtakavet nabunatum, mata ge tavveinaw ge im iven navavag.

44 “Maw<sup>a</sup>wan-vak yakamiy, kadiloka kwatunags, peinan Gimgilitoun yey bayum, o yakamiy nag kukwakins tutag bayum bam.

*Teitan itoukum, teitan igwey*  
(Luk 12:41-48)

45 “Tamwey inagamag isek inawotet v<sup>a</sup>gan tut babaw bivakamus tasiyas wanbunatum nisesus. Yam katanok katanok inawotet towen. Kavel bitoukum nawotet towen waseg? Adok towen ansinap bwein.

46 “Igaw natovek beiyum beim, biban nagamag inawotet bwein, bikalin nuwan waseg mtowen; o nagamag towen mo bimwasaw.

47 “Mounid mo bisek nagamag towen nawotet mamagina tanuwagan navavag babaw-wan.

48-51 “Kukin gog nagamag ansinap kalbaleb, bilivan, ‘Guntovek bo iyouv<sup>i</sup>y,’ mo bikawegweis won, biwaweis siney, o beikams bimwamoums siney siyas tamwamoums mo bikabalaweins, natovek gog igaw mo beim, tutan nag bikakin, bisap, bisibilut, mo bimop ansinap kalbaleb; bilev gamag towen binekes tasiyas tayyaweids, mo bivvalams, singay bigeg ninous.

1 “Tage Yowbad nakaleiwag mamagina guwavin sinawatan, silamp ikawes, inounas binekes kid mtowen taveivay.

2 “Nanim nag isinaps bwein; nanim nasinaps.

3-4 “Tasiyas nag isinaps, ikokews silamp, tagon go nag. Tage sisiyas sam sitagon wabotol.

5 “Igaw ikayamats, toge taveivay iyouviy; mites inanup tasiyas, mo imasis.

6 “Watapwan boug, teitan iwak, ilana, ‘Taveivay bo neim; kumeis tanekes.’

7 “Ikits tasiyas, bivakanotes silamp.

8 “Tasiyas nag isinaps idibakes sisiyas, ilansa, ‘Tabta mitagon bukusekemas, ne? Malamp bo imtamats.’

9 “Iweis sisiyas, ilansa, ‘Adok nag ampwavin yakamiy mouy yakamey. Kuneis wastow kugimwals.’

10 “Inounas tasiyas bigimwals, mo isap towen taveivay; tasiyas bo ikatunags ikous mo isiws sisiy towen taveivay, inasagal silmanin; koukwed mo ikatibagus.

11 “Wankuyeim sisiyas mo iyum imeis, itamanaws watoulan bwan, ilansa, ‘Maguyaw yak, kwaliyow koukwed pinem yakamey.’

12 “Iw mtowen, ilana, ‘Nag akakin yakamiy.’ ”

13 Yeisuw ilana, “Kadiloka kutoukums, kumtakavateimiy, peinan nag kukwakins avei-tut o avei-yam mo bam.

*Kabebay money avakaein  
(Luk 19:11-27)*

14 “Peinan maḡwana tamwey teitan binoun bilakwen kweitan ven, idawes natouwat asteitoun, imeis, isekes simoney vagan biwotets waseg.

15 “Teitan gamag tawtoun, isek kweinim tawsan kina. Tayuwein natawtoun kalamwey avakaein, isek akweiy tawsan kina. Tatounun nag bivakaein natawtoun, isek katanok tawsan kina. Isek es ikous, mo inoun in kweitan ven.

16 “Natovek bo inoun, towen gog tatawtoun ikow inamoney kweinim tawsan kina, igaw bikuney mo bikatimweis inamoney. E, inamoney ikatimweis kweinim tawsan kina, imlavag sinawatan tawsan kina.

17 “Maḡwan-vak tayuwein ikatimweis kweiy tawsan kina, imlavag kweivas tawsan kina.

18 “Tatounun gog, ikow inamoney katanok tawsan kina, ikaviyeil pwepway, idibwen natovek inamoney.

19 “Tut kadiveiyov ikous, iyum sitovek im, idibakes tasiyas bimeis vagan bimeyes namoney bikin.

20 “Mtowen nisek kweinim tawsan kina, ikow imey namoney, sinawatan tawsan, ilana, ‘Tamwey, kweinim tawsan nukusekeig towen, son kweinim tawsan aban, bo akatimweis.’

21 “Iw natovek, ilana, ‘Bwein! Guntouwat bwanabwein yakoum. Peinan bo kutoukoum wotet kakit, mapuna basekeim avakaein. Kusiw kum, gunakabmwaṣaw waseg.’

22 “Tayuwein nisek kweiy tawsan kina, ikow imey namoney, ilana, ‘Tamwey, kweiy tawsan nukusekeig towen, son kweiy tawsan aban, bo akatimweis.’

23 “Iw natovek, ilana, ‘Bwein! Guntouwat bwanabwein yakoum. Peinan bo kutoukum wotet kakit, mapuna basekeim avakaein. Kusiw kum, gunakabmwāsaw waseg.’

24-25 “Tatounun nisek katanok tawsan kina, ikow imey namoney, ilana, ‘Tamwey, akakin amsinap keikay, anagin gamag siwotet kukokew ven babaw; mapun aweneim, akaviyeil pwep-way, adibwen mumoney, bo avnas bwein; nises towena.’

26-27 “Iw natovek, idibek, ilana, ‘Singay toug-wey, guntouwat kalbaleb yakoum. Kukwakin-wan agusinap keikay, anagin gamag siwotet akokew ven babaw; kadilok-wan bukusen gun-money wanuwan benk, bikatimweis bibabaw; ga bayum bam mo bakow siyas gunmoney babaw.’

28-29 “Natovek mo idibek natouwat teitan, ilana, ‘Kukow inamoney katanok tawsan kina, kusek mtowen tatawtoun, bikatimweis inamoney, bimplavag singay babaw, sinawatan katanok tawsan kina.’ Kukin kal navavag sam, igaw mo bikow bikatimweis, bibabaw. Kukin gog kal t-ivag navavag, teitan mo bikow aveiyag nises; mounida beidev mtowen.

30 “Sitovek mo ilana, ‘Kadiloka kukow guntouwat towen kalbaleb, kulev bein watoulan, dadub waseg. Tasiyas watoulan bivvālamswan, singay bigeg ninous.’

*Bikaleiwag vena babaw wasigeis*

31 “Igaw bam, Gimgilitoun yey, soug yakawanag, o sigwey min-libalab asibabaw, mo basin abag bwanabwein waseg.

32-33 “Vena babaw gimgilis bikatuyouns bimeis wamatag, bakatukin. Mamagina tamtakavatein alen bikatukin, alen sip bineis palatan, alen gout bineis palatan. Mansiyas sip bineis wanak̄atay; tage mansiyas gout bineis wankimaw.

34-36 “Miguyaw yey bakatukin, gamag mwasanin wagunkimaw, mwasanin wagunk̄atay. Ikous mo badibakes tasiyas wagunk̄atay nisesus, balana, ‘Kumeis yakamiy, Tamag nisiwayoub wasigeis yakamiy, kweiboug nibun ven watinow mo ikatineg mikabmwasaw pinamiy yakamiy; e, kumeis kumwasaws. Peinan agumoun, kag nukusekeigs; agudak, soup nukusekeigs; agutowous nag mo nukulabeigs; nases sona mwadoyag, nukusekeigs agukweim; agukwatoun nukuvn̄aseigs; w̄adeil nases, nukulakwaneigs.’

37-39 “Tadidumwals tasiyas mo bikatimapus ay-gag, bilansa, ‘Tamwey, asinavin kakineim soum anumoun kasekeim kam, o amdak kasekeim soup, o amtowous nag mo kalabeim, o sona mwadoyam kasekeim amkweim, o amkwatoun mo kav̄n̄aseim, o w̄adeil nukuses mo kalakwaneim?’

40 “Miguyaw yey mo bakatimop ages, balana, ‘Mounid adibakeimiy, kweiboug nukuleb teitan bwadag takakit, māwana yey bo kulabeig.’

41 “Mo badibakes tasiyas wagunkimaw isesus, balana, ‘Kulisaweigs takalbalebs yakamiy, amisi- nap bo ikunakeimiy, kuneis kov townen nag beik- ous, Yowbad nikatineg silmanin Seitan siney siyas baloum.

42-43 “‘Peinan agumoun, ta-kweitan kag kusekeigs; agudak, ta-kweitan soup kusekeigs; agtowous nag, ta-kulabeigs; sona mwadoyag, ta-kweitan kweim kusekeigs; akatoun, ta-kuvnaseigs; ases wadeil, ta-kulakwaneigs. Takalbaleb yakamiy!’

44 “Tasiyas bikatimapus aygag, bilansa, ‘Tamwey, asinavin kakineim amumoun, kakayus gog kan; o amdak, kakayus soup; o amtowous nag, o sona mwadoyam, o amkwatoun, o wadeil kuses, tage nag kalabeim?’

45 “Mo bakatimop asilivan, balana, ‘Mounid adibakeimiy, kweiboug nag kulabes teitan bwadag takakit, mawan yey nag kulabeigs.’

46 “Tasiyas asisinap kalbaleb bisiwas watoulan, asisinap kalbaleb mapun bilivatus tut nag beikous; tasiyas gog tadidumwals beisiws abmwamov waseg bisigagas.”

## 26

### *Tammwayas sivines beiweiys Yeisuw (Mak 14:1-2; Luk 22:1-2; Yon 11:45-53)*

1-2 Iyakousis anilivan tasiyas, Yeisuw mo idibakes navamul, ilana, “Adok kukwakinsa akweiy yam mo Kaltuwon Sigeilin; teitan mo bisilkodeig, Gimgilitoun yey. Gamag mwasanin mo biyousigs bikatimateigs waklos.”

3 Misiyamun towen tasiyas tanuwgwes lun situwawek sisiyas tammwayas katuyouns in-eis tanuwgwes lun sitovek avakaein wanven, mtowen yagan Kayapas.



<sup>4</sup> Sivines kid biyousis Yeisuw bikatimates; illivans silmanin.

<sup>5</sup> Ilansa, “Kadiloka tasinaps beibwein; amawan bitayousis. Awoum bitayousis sagal waseg; peinan gamag singay babaw; adok mwasanin bikayuses, igaw mo bikawpwanaws.”

*Natan vin iptum Yeisuw kunun  
(Mak 14:3-9; Yon 12:1-8)*

<sup>6</sup> Yeisuw nises Betaniy, Saymon wanbunatum, mtowen toulepel.

<sup>7</sup> Natan vin inek Yeisuw, nabotol bwanabwein wanaman, tagon nises, tage maysan singay avakaein. Yeisuw igaw ikamkwam, isap manawen, tagon towen iligubok kunun Yeisuw.

<sup>8-9</sup> Navamul ikines, ikavikuns, ilansa, “Bo iyamkwen tagon bwanabwein. Kadiloka biyamiyis, maysan avakaein bikow, money towen bivgen tasiyas tasimavs wasigeis.”

<sup>10-13</sup> Yeisuw gog bo itilikwen asilivan, ikatimop, ilana, “Awoum kulivans, ivag geg anmwasin. Inawotet bwanabwein waseg yey. Tut babaw tasiyas tasimavs simiyas nukusesus; yey gog kweitan, igaw mo balisaweimiy. Bo iptum woug silmanin anatut bidibwanigs. Mounid adibakeimiy, ampalawen ven watinow igaw bikawes livaneig, o livanen-vak manawen vin bikawes binawes, gamag babaw biliganes, mo bininuways inawotet towen.”

*Yudas itam kid bisilkod Yeisuw  
(Mak 14:10-11; Luk 22:3-6)*

<sup>14-15</sup> Yeisuw navamul sinawatan teiy, teitan gog yagan Yudas Iskaliyot inekes tasiyas tanuwgwes lun situwawek, ilana, “Kweivin

maysan bukusekeigs mo bakamtel Yeisuw avanuy misikey-yay, mo bukuyousis?” Isenas money silib sinawatoun, mo itam.

<sup>16</sup> Wankuyeim Yudas inineiv amata-ked bwein waseg mo bisilkod Yeisuw.

*Kaltuwon Sigeilin*

*(Mak 14:12-21; Luk 22:7-14, 21-23; Yon 13:21-30)*

<sup>17</sup> Yam towen isilamaws anawik bikatunags silmanin Kaltuwon Sigeilin. Navamul Yeisuw inekes, ilansa, “Avanuy bakakatinge sagal towen vagan bukukwam?” Wik towen nag beikams bled son yist; bwaboum.

<sup>18</sup> Iw to Yeisuw, ilana, “Kunekes mtowen nises waven, kudibakes, kulansa, ‘Matovek ilivan, ilana: Tutag bo alivet, wambunatum bakakam Kaltuwon Sigeilin, sigwey gunavamul.’ ”

<sup>19</sup> Tasiyas iliganes, ikanawes aygan, inounas, ineis, ikatinages sagal towen.

<sup>20</sup> Kwayav mo isinis siney navamul tasiyas sinawatan teiy, beikams.

<sup>21</sup> Igaw ikamkwams, ilivan, “Mounid adibakeimiy, teitan nises wasigeis yakamiy, igaw mo bisilkodeig.”

<sup>22</sup> Singay igeg ninous, katanok katanok mo idibakes, ilansa, “Tamwey, kal bisilkodeim? Yey? o nag? kavel?”

<sup>23</sup> Ikatimop, ilana, “Mtowen soug kakokew kan wakabmavin, igaw mo bisilkodeig.

<sup>24</sup> “Gimgilitoun yey banoy ban makadewen ked nilivnakes Bukitab waseg, tage taw towen tasilkodeig singay kalbaleb bilivet. Magat inan

nag bikop taw towen bo bwein, tage bo ikop, mo singaya kalbaleb bilivet.”

<sup>25</sup> Tasilkodein Yeisuw yagan Yudas mo ikatigan, ilana, “Guntovek yak, mtowen kavel? Yey?”

Iw to Yeisuw, ilana, “Mawan.”

*Datoveks inakamkwam*

(*Mak 14:22-26; Luk 22:15-20; 1 Kolinit 11:23-25*)

<sup>26</sup> Igaw ikamkwams, Yeisuw ikow bled, anilivan bwanabwein isek, mo ivgen, isekes inavumul wasigeis, ilana, “Kaeimiy towen woug, kukwams.”

<sup>27-28</sup> Ikous, mo ikow kwavig, ikalin nuwan Yowbad waseg, ikiv, isekes, ilana, “Tababaws yakamiy kumoums towen buyavig silmanin kaleiwag kweivaw; buyavig iwtawout biwid kid amisinap kalbaleb, simiyas gamag babaw.

<sup>29</sup> “Adibakeimiy, nag vayuwein bamoum gleip sipinen ee... anatut kweivaw sipinen mo bitamoums Tamag wanakabkaleiwag.”

<sup>30</sup> Asiwous ikanweles ikous, mo isaps ineis koy towen bigulen oliv nises.

*Yeisuw ilivnek Pita bikayan*

(*Mak 14:27-31; Luk 22:31-34; Yon 13:36-38*)

<sup>31</sup> Ineis koy towen, Yeisuw idibakes, ilana, “Boug towen bukupiyaveigs amibabawan yakamiy, livanen nises Bukitab waseg, mamagina:

‘Baweiy tamtakavatein mansiyas sip, mo bikatigayes alen.’

<sup>32</sup> “Igaw bakit vayuwein mo bamug ban Galiliy waseg; yakamiy wankuyeim, mo kuwekeigs Galiliy waseg.”

<sup>33</sup> Iw to Pita, ilana, “Magat babaw bipiyaveims, yey gog nag bapiyaveim.”

<sup>34</sup> Yeisuw ilivan, “Adibakeim yak, boug townen waseg bukwayaneig sivatoun, mo beigel kolkolek.”

<sup>35</sup> Iw to Pita, ilana, “Kukin bikatimateims, soug yak bikatimateids aditeiy. Nag bakayaneim, nag.” Inavamul babaw asilivan bo maʿawan.

*Getsemaniy waseg initoug*  
(Mak 14:32-42; Luk 22:39-46)

<sup>36</sup> Siney navamul mo ineis ven yagan Getsemaniy, idibakes, ilana, “Kusinis townen. Yey ban palatan anitoug Yowbad waseg.”

<sup>37</sup> Mo idawes tasiyas Pita siney Sebediy nitun asteiy, mo ivag asteivas, ineis isiwas; mo igeg nanon, won imouvit seikwan.

<sup>38</sup> Idibakes, “Woug moumouvit maʿwana dakul, kakita bakanig adok. Bweina kusesus townen kulalals, kulabeigs nitoug waseg.”

<sup>39</sup> Inoun, nag in kadiveiyov, imasis kantungov, initoug, ilana, “Tamag, magat bukutam bo bapiyev kwavig townen, singay yayan; tage amaʿawan yakoum nanoum, nanoug yey awoum.”

<sup>40-41</sup> Ikous, iyum inekes asteitoun, bo imasis. Idibek Pita, “Ta-bukulalals bukulabeigs tut kadiyakus waseg. Kutoukums, kulalals, kunnitougs; mata ge bukusiws abiyokon waseg. Bo iseiw nuwamiy wotet townen, tage tougwey yakamiy.”

<sup>42</sup> Sivyuwein in initoug, ilana, “Tamag, adok nag kadilok bukwayus kwavig towen, bweina bamoum. Aveiyag wananoum bo bavag mawan.”

<sup>43</sup> Iyum inekes bo imasis, peinan bo inanup mites.

<sup>44</sup> Sivtounun ilisawes, initoug; anilivan mawana nilivan mo initoug.

<sup>45-46</sup> Ikous, iyum inekes navamul, idibakes, ilana, “Igaw kuyeiwas, kummasis. Bo deis! Datuts bo ikous. Bo isap tasilkodeig Gimgilitoun yey. Takalbalebs bo nimeis kid biyousigs yey. Kukits tanounas, tasilkodeig bo isap!”

### *Iyousis Yeisuw*

*(Mak 14:43-50; Luk 22:47-53; Yon 18:3-12)*

<sup>47</sup> Yeisuw igaw ilivan, isap inavamul teitan yagan Yudas, siney babaw gamag ikokews sipulut seiy, sinew seiy. Tanuwgwes lun situwvek sisiyas tammwayas nikayabes nimeis.

<sup>48</sup> Towen tasilakod bo nidibakes, “Kukin kal bakamoloul soug, towen kuyousis, mtowen Yeisuw.”

<sup>49</sup> Nuwanaw mo inek Yeisuw, ilivan, “Kalin nuwaguntovek yak,” mo imulouls son.

<sup>50</sup> Iw to Yeisuw, ilana, “Gwa, wawun nukum?”

Ituts tasiyas, iwekes, iyousis Yeisuw, itawtouns waseg.

<sup>51</sup> Son Yeisuw teitan igut napulut wakaban nises, iweiy natouwat tanuwgwes lun sitovek, ibob teigan.

<sup>52-54</sup> Iw to Yeisuw, ilana, “Kuyamen mupulut, bein wakaban. Tasiyas gog tawayins gamag pulut waseg, igaw bikankanigs pulut waseg. Adok nag kukwakins gunanitoug waseg Tamag, nuwanaw

mo beitam min-libalab bilabeigs, singay babaw tawsans. Nag gog. Kukin nag biyousigs, ta-mawan bikamat livaneig Bukitab nilivnek.”

<sup>55-56</sup> Misiyamun towen Yeisuw idibakes asibabaw, ilana, “Yam babaw nases Yowbad wanbunatum akatimlakes gamag, ta-kuyousigs. Nagein gog aveiyag wawun kukokews mipulut, minew, nukumeis kuyousigs mamagina tavveinaw yey? Tage youd towen ikamat peinan tasiyas palopit nilivnakes Bukitab waseg.” Navamul aspwayat ilisawes Yeisuw; mo isawls.

*Yeisuw iyatal waseg Kayapas*

*(Mak 14:53-65; Luk 22:54-55, 63-71; Yon 18:12-14, 19-24)*

<sup>57</sup> Iyousis Yeisuw ikous, inawes Kayapas wanbunatum; mtowen tanuwgwes lun sitovek avakaein. Inaven waseg nikatuyouns nimeis tammwayas sisiyas takatimlakeins kaleiwag.

<sup>58</sup> Mtowen gog Pita ikikikun wankuyeim ee... isap waven, isin waven siney tamwey towen natouwats, idoki aveiyag binuwakes.

<sup>59</sup> Tasiyas tanuwgwes lun situwawek sisiyas takaleiwags babaw inineivs kalisiy biyaweids yatal waseg vagan kid mo bikatimates Yeisuw.

<sup>60-61</sup> Babaw iyaweids, Yeisuw silmanin, tage nag ibanenes silawun yatal, nag.

Wankuyeim asteiy mo imeis, ilansa, “Taw towen ilivan, ‘Kadilokeig bagulek Yowbad nabunatum, yam kweitoun mo bawlulavaw bayakous.’”

<sup>62</sup> Itamanaw tanuwgwes lun sitovek, ikatigan Yeisuw, ilana, “Aveiyag bukwatimop? Aveiyag amsinap towen, tasiyas nillivans?”

<sup>63</sup> Yeisuw gog isesuna ikikapay.

Iwage tanuwgwes lun sitovek, ilana, “Tamwamov Yowbad iligen amlivan yak; kadiloka kulivan moundid. Tab yākoum Yowbad Natun, Mesay? o nag?”

<sup>64</sup> Yeisuw idibek, ilana, “Māwan amlivan. Vayuwein livan mo badibakeim:

‘Igaw bukukineigs Gimgilitoun yey, biseinig Yowbad wanakātay, guntawtoun waseg; mo bukukineigs wālov walbalab bawekeimiy.’ ”

<sup>65-66</sup> Kayapas, kapasal nuwan, iksigeb anakweim, ilana, “Bo kuliganes anilivan towen kalbaleb. Nag ivag sivinads gamag biyateles; babaw yakids nitaliganes anilivan kalbaleb. Amāwan bitanuwakes mtowen?”

<sup>67-68</sup> Mo igusus Yeisuw magin, iwaweiyis nimes waseg. Igawa iwaweiyis, mwasanin ilansa, “Magat yākoum Kelis, bukulivan māwana palopit yākoum, kwavteg yagan kal iweim!”

### *Pita ikayan Yeisuw*

(*Mak 14:66-72; Luk 22:56-62; Yon 18:15-18, 25-27*)

<sup>69</sup> Pita igaw nises Kayapas wanven, wamatan nabunatum, tawtelein bunatum nātan inek, ilana, “Adok yākoum soum Yeisuw mukunoys Galiliy nukumeis, ne?”

<sup>70</sup> Ikayan mtowen, ilana, “Nag. Ta-akakin aveiyag nukulivan.” Babaw gamag ikatiliganes anilivan towen.

<sup>71</sup> Isineikik in wadunan ked waseg, nayuwein vin ikin, idibakes siney, ilana, “Taw townen veiyon gum-Nasalet townen Yeisuw.”

<sup>72</sup> Ikayan vayuwein, ilana, “Nag bakakin gamag townen. Tamad!”

<sup>73</sup> Igaw kakit, tasiyas nitomos wadadan ven iwekes Pita, ilansa, “Adok moundid yākoum veiyon gum-Galiliy yākoum, ne? Peinan aygam māwana aga-Galiliy.”

<sup>74</sup> Ikavikun Pita, anilivan kalbaleb igegayous, itabudabod, ilana, “Nag; ta-bakakin taw townen. Tamad!” Mo igel kolkolek.

<sup>75</sup> Pita inuway Yeisuw anilivan, “Nuwanaw bukupiyaveig sivatoun, mo beigel kolkolek.” Inuway livan townen, isunap, inoun in tanāban, ivālam, singay igeg nanon.

## 27

### *Yeisuw iyatal wamatan Paylat*

*(Mak 15:1; Luk 23:1-2; Yon 18:28-32)*

<sup>1</sup> Iyam-nen gāboug, illivans tasiyas tanuwg-wes lun situwāvek sisiyas tammwayas, idokes kadiloka beiweiys Yeisuw, beimat.

<sup>2</sup> Naman iyawanis vatul waseg, itokes, inawes Paylat waseg, guma-Lom townen sigabman avakaein.

### *Yudas ikanig*

*(Wotet 1:18-19)*

<sup>3-4</sup> Yudas, mtowen tasilkodein Yeisuw, ikakina beiweiys Yeisuw, ikanavin nanon, iyamen maysan townen, money silib sinawatoun, bisekes kid tanuwg-wes lun situwāvek sisiyas



tammwayas, ilana, “Agusinap kalbaleb; bo asilkod gamag towen bwanabwein.”

Iweis tasiyas, ilansa, “Yakoum muwotet; yakamey nag.”

<sup>5</sup> Yudas ipiyev money towen, ilev in Yowbad wanbunatum wanuwan, inoun in, ikow vatul, iyawen kayon mo ikayagweg, imat.

<sup>6</sup> Tasiyas gog tanuwgwes lun situwawek ikawes money towen, ilansa, “Towen maysan gamag buyavin, awoum binek Yowbad namuloul. Amawan bitavkakes money towen?”

<sup>7</sup> Mapuna iyamiyises tawtelein loutan napwepway, vagan kid bidibwanis takanigs asibwabwal igaw bikankanigs ven towen waseg.

<sup>8</sup> Peinan money towen maysan gamag buyavin, mapuna tadokes pwepway towen yagan “Gamag buyavin pwapwayein.” Tut towen waseg pwepway yagan mawan.

<sup>9-10</sup> Ivages mawan, mo ikamat livanen palopit towen Yelemay, peinan kweiboug ilivnek mamagina:

“Ikawes money silib sinawatoun, maysan mtowen min-Yisleil bo ikaliwages, mo iyamiyises tawtelein loutan napwepway. DaGuyaws bo ikaliwageig mawan.”

<sup>11</sup> Inawes Yeisuw gabman waseg, itow wamatan. Mtowen gabman mo ikatigan, ilana, “Tabta yakoum min-Yudiy siking yakoum?”

Iw to Yeisuw ilana, “Mawan amlivan.”

<sup>12</sup> Tanuwgwes lun situwaweks sisiyas tammwayas mo iyateles Yeisuw; towen gog nag ikatimop ikkapay-wan.

13 Iw to Paylat ilana, “Tab kwatiligen livaneim babaw illivans?”

14 Towen gog nag kweitan livan iyamen; mapuna gabman towen bo isunasun nanon.

*Ikaleiwag vagan beiweiys Yeisuw*

*(Mak 15:6-15; Luk 23:13-25; Yon 18:39–19:16)*

15 Bweilim katanok katanok sagal towen waseg, gabman ansinap bilik tasiwun deil, am-towen sivines tababaw gamag. E, bilik mo bein wamnat.

16 Teitan wadeil nises, butun avakaein peinan ansinap kalbaleb, yagan Yeisuw Balabas.

17 Katikunouks gog gamag babaw, Paylat ikatugan, ilana, “Kal sivinamiy? Kwavtagis yagan mo balik bein wamnat. Tabta sivinamiy Yeisuw Balabas? o adok sivinamiy Yeisuw, mtowen idokes Kelis? Takaleiwag yakamiy.”

18 Ikakin geg iyateles Yeisuw peinan ikamliwes.

19 Tage mtowen Paylat issin wakaban vagan bikaleiwag, Paylat nakwav mo ikayeb natouwat inek, isek aygan nakwav mamagina, “Awoum kuvag aveiyag taw towen waseg. Gamag towen bwanabwein. Boug akamikon towen silmanin; mapuna singay igeg nanoug.”

20 Bo itatays ninous gamag babaw, tasiyas tanuwgwes lun situwaweiks sisiyas tammwayas; ilansa, “Kwavtagis Balabas yagan; Yeisuw gog beimat.”

21 Vayuwein gabman towen ikatugan; ilana, “Asteiy wadeil nisesus. Am-towen sivinamiy balik beiw wamnat?”

Ilansa, “Balabas.”

22 “Tage aveiyag bavag waseg Yeisuw? Mtownen idokes Kelis.”

Ilansa, “Kwatimet waklos.”

<sup>23</sup> Iw to Paylat ilana, “Aveiyag wawun? Nag ivag ansinap kalbaleb.”

Iweis tasiyas, iwkuwaks, ilansa, “Kwatimet waklos!”

<sup>24</sup> Paylat go ikakin ta-mawan binuwek, peinan kakita bisilamaws kawpwanaw; mapuna idow natouwat, ilana, “Soup kumey, bawid namag.” Imey, iwid naman wamtes gamag babaw, ilana, “Yey nag baweiy gamag towen bwanabwein; e, takaleiwags yakamiy.”

<sup>25</sup> Iweis tasiyas, ilansa, “Yakamey bakakaleiwag, bakaweiy; mawotet towen mapun bakalivet simayas nitimayas.”

<sup>26</sup> Paylat mo ilik Balabas, inekes tasiyas. Ili-van gog Yeisuw beiweiy vatul waseg, bisekes asibabaw bikatimates waklos.

*Takannaviys isibawes Yeisuw  
(Mak 15:16-20; Yon 19:2-3)*

<sup>27-29</sup> Gabman nagamag tasiyas takannaviys itokes Yeisuw inawes wasibunatum bunavakaen. Takannaviys asibabaw ikatuyouns nimeis, inibwis Yeisuw anakweim, ivaskoumis anakweim avakaen bwabwel. Ikous, mo ikawes vatul kulikoul mamagina doudiw, ikwanis isenas wakunun, magina anapay; nakaytuk isekes wanakatay; mo ikululs wamatan, ilansa, “Kalin nuwem yakoum, min-Yudiys siguyaw yakoum!” Isibawes igegayous.

<sup>30</sup> Ikous, mo igusus won towen, ikawes nakaytuk iways wakunun.

<sup>31</sup> Isibawes ikous, mo inibwis maynawen kweim bwabwel, ivaskomis anakweim tatonen, itokes, inawes beiweiys waklos.

*Iweiys Yeisuw waklos*

*(Mak 15:21-32; Luk 23:26-43; Yon 19:17-27)*

<sup>32</sup> Isekes Yeisuw anklos kaytan beikew, inounas. Waked mo ilivatus gum-Saylin yagan Saymon, ilansa, “Kukow anklos taw townen.”

<sup>33</sup> E, Saymon ikokew Yeisuw anklos, inounas ineis koy yagan Golgot. (Takativin livan bein aga-Muyuw “Takanig busabwesan.”)

<sup>34</sup> Bo isekes Yeisuw wayn son alun beimoum, vagan mamayuy biyenom; ikamkwen, ipiyev.

<sup>35</sup> Pwapwat ikatikavates wanaman o wakaken; ikayagweg waklos. Takanaviys tasiyas iyakousis wotet townen, mo ikaliwages anakweim, kalisiy bikawes, mamagina makava ilaves kweitant youd silmanin bikines kalisiy bikawes asikweim tatanok tatanok tasiyas.

<sup>36</sup> Ikous, mo isinis, imtakavates.

<sup>37</sup> Anklos wakunuwatan ileles nakalbaleb mamagina, “Mtowen Yeisuw, min-Yudiy siGuyaw.”

<sup>38</sup> Siney tavveinaws asteiy iweiys waklos, teitan wanakatay, tayuwein wankimaw.

<sup>39-40</sup> Tasiyas gog inounas makadewen ked isibawes, asilivan kalbaleb, ilansa, “Yakoum kudoki bukugulek Yowbad nabunatum, bukuwlulavaw gog yam kweitoun. Magat Yowbad Natun yak, kubus kum, kuymoveim.”

<sup>41-43</sup> Mawan-vak tanuwgwes lun situwawek, sisiyas takatimkakeins kaleiwag, sisiyas tammwayas iyages Yeisuw, ivtokes livan,

ilansa, “Bo ikatinabwes gamag mwasanin, nag kadilok bikatinob tatonen.” E, ilansa, “Mtowen kid Yisleil guyawun, kadiloka beibus waklos beim, mo bitaliganes anilivan. Peinan anilivan, ‘Asimounid Tamag Yowbad waseg; yey Yowbad Natun yey.’ Magat Yowbad sivinan gamag townen, kadiloka beim bikatinob.”

<sup>44</sup> Mawan-vak tavveinaws tasiyas asteiy nikayagwesk wasklos, iyages Yeisuw.

*Yeisuw ikanig*

*(Mak 15:33-41; Luk 23:44-49; Yon 19:28-30)*

<sup>45</sup> Yanay idadub ven babaw ee... k̄alas itageg mo ikamnat vayuwein.

<sup>46</sup> Igaw dadub ven, Yeisuw mo iwak, aygan avakaein, ilana, “Eli, Eli. Lamasabaktaniy.” (Takatavini go bein aga-Muyuw waseg: ‘Guna Yowbad! GunaYowbad! Aveiyag wawun nukulisaweig?’)

<sup>47</sup> Gamag mwasanin nitatos wadadan iliganes, idokes Yeisuw ididow kid Ilaytiy.

<sup>48</sup> Mapun teitan isawl in, ikow yotout isen wayn yayan wanuwan, ik̄alawt yotout, ibes wamatan kayal iyasel, isek Yeisuw, imoum.

<sup>49</sup> Mwasinis gog ilivans, “Ga ises. Adok Ilaytiy beim bikatinob. Ga takines.”

<sup>50</sup> Vayuwein Yeisuw mo iwak, aygan avakaein, kululuwan ilisow, bo ikanig.

<sup>51-53</sup> Maynatan kweim nisilbwed palakakit, Yowbad wanbunatum, tut townen waseg mo ik̄sigeb maynawen kweim; isilamaw wanakaew, ik̄sigeb in watinow, ivag mwayney. Nik ivag, dakul itavis, alawag ikaliyowes, tadidumwals mwasinis nimmasis wakalugwes, tutan Yeisuw

ikit vayuwein mo ikits tasiyas, inounas ineis Yelusalem, gamag babaw ikines.

<sup>54</sup> Takalikay townen siney tasiyas takannaviys imtakavates Yeisuw, ikines nik, ikines youd siyas nikamats; aspwayat, ilansa, “Mounid Yowbad natun.”

<sup>55-56</sup> Vinay mwasinis itowas tanbes. Natan vinen-Magdal yagan Meliy; nayuwein valeyin, manawen nitun tasiyas Yemes son Yosep; natounun Sebediy nakwav, ivag nitsiyas tawaw asteiy; sisiyas vinay mwasanin. Tasiyas kweiboug sisiy Yeisuw meinoy Galiliy nimeis, o yam babaw imtakavates. E, tasiyas itowas tanbes ikakins.

*Yeisuw itakus*

*(Mak 15:42-47; Luk 23:50-56; Yon 19:38-42)*

<sup>57-58</sup> Yeisuw inavamul guyaw teitan yagan Yosep. Inaven Alimatiy. Yam townen kwayav waseg inek Paylat, initoug kaleivin Yeisuw bidibwen. Paylat itam.

<sup>59-60</sup> Yosep ikow kaleivin Yeisuw, isumweil kweim pwapwakaw gimagim, isen wakalawag. Inakalawag takunumwan kweitan bo itateiys wanuwan dakul, bo imlavag Yosep alawagan tatonen. Isen kaleivin Yeisuw wanuwan, iyatipin dakul avakaein, ikatibwed wadon leg, mo inoun.

<sup>61</sup> Vinay asteiy isiwas tanaban isinis ikikines, vinen-Magdal yagan Meliy son valeyin.

<sup>62-63</sup> Yam townen ikatunags silmanin sagal. Iyam-nen mo sagal; tasiyas tanuwgwes lun situwawek sisiyas tasiyas Palisiy mo ikatuyouns inekes Paylat, ilansa, “Tamwey, kanuw anilivan tayyaweid townen, igaw mwamov, ilana, ‘Yam kweitoun mo bakit vayuwein.’

<sup>64</sup> “Kadiloka kukwaleiwag gamag mwasanin bintakavates alawagan kweitoun yam. Mata ge navamul bineis ivenos kaleivin, mo bidibakes gamag, bilansa, ‘Bo ikit vayuwein.’ Singay mo bikatimweisis yaweid, bikatidavis gamag babaw.”

<sup>65</sup> Iw to Paylat, ilana, “Takaymateins alawag nisesus wasigeis yakamiy. Kuneis kuwteles mawan beibwein.”

<sup>66</sup> Ineis tasiyas; youd mamagina kaybas ikawes, ipakus wawadon leg; takannaviys isekes siwotet imtakavates alawag towen.

## 28

### *Yeisuw itamanaw vayuwein*

*(Mak 16:1-8; Luk 24:1-12; Yon 20:1-10)*

<sup>1</sup> Yam tapw̄aloul-nen ikous, kadiyakusa beiyam kweivaw wik S̄abat waseg, vinen-Magdal yagan Meliy son valeyin, asteiy ineis ilakwanes alawag.

<sup>2</sup> Nik ivag avakaein. Yowbad natakayob ibus walbalab im, iyatipin dakul, isen wadadan alawag, isin wakunuwatan.

<sup>3-4</sup> Magin immteil mawana kavikawn, anakweim singaya pwapw̄akaw. Aspwayat takaymateins alawag, itatata wous, ikabalamats imasis.

<sup>5-7</sup> Toge anelos idibakes vinay tasiyas, ilana, “Awoum beivag amipwayat. Akakina kunineivs Yeisuw, kudokes kid takanig. Nag. Mtowen bo nein. Bo ikit mawana nilivnek. Kumeis, kukines nakabmasis makawan. Kunuwanaws, kuyum kuneis, kudibakes navamuls, kulansa, ‘Bo ikit kanig waseg.’ Mtowen bo bingwayeimiy

wa-Galiliy, yakamiy wankuyeim kuneis, mo bukunekes. Bo kuliganes agulivan?”

<sup>8</sup> Mapun ilisawes alawag, isawls, iyow nuwes, bogo imwasaws; isisawls kid bidibakes navamul.

<sup>9</sup> Isisawls ee... Yeisuw im ilivatus, ilana, “Kalin nuwag.”

Iweis tasiyas, iyousis kaken Yeisuw, magina bitapwalouls waseg.

<sup>10</sup> Itapwalouls, Yeisuw mo idibakes, ilana, “Awoum beivag amipwayat. Kunounas, kunekes budag, kukines bineis Galiliy, mo bikineigs.”

### *Tamtakavateins alawag asilivan*

<sup>11</sup> Inounas tasiyas, tamtakavateins alawag mwasinis mo ineis ven towen Yelusalem, inekes tasiyas tanuwgwes lun situwawek, youda babaw ikamteles ikous.

<sup>12-13</sup> Katuyouns gog asibabaw sisiyas tammwayas, illivans ikous, mo isekes simoney avakaein takannaviy tasiyas, bital kid mites, ilansa, “Igaw kalisiy bikatiganeimiy, kuyaweids, kulivans, ‘Navamul bo imeis boug waseg, ivenos takanig towen; igaw kammasis yakamey.’

<sup>14</sup> “Kukin gog mitovek avakaein biligen, deisa bakalivan simey towen, bakasowm amisinap.”

<sup>15</sup> Itams tasiyas, ikawes maysan yaweid towen. Asilivan bo mawan; min-Yudiy mo iliganes. Igaw nagein tut towen min-Yudiy asilivan mawan.

### *Yeisuw isekes siwotet navamul*

*(Mak 16:14-18; Luk 24:36-49; Yon 20:19-23; Wotet 1:9-11)*

<sup>16</sup> Navamul sinawatan tatanok inounas ineis Galiliy, ikatulags koy towen Yeisuw nilivnek.



<sup>17</sup> Ikatulags koy townen, ikines Yeisuw, ikululs wamatan; tage mwasanin nag isimounids bwein, ivag ninous akweiy.

<sup>18-20</sup> Iw to Yeisuw, ilana, “Tamag bo isekeig gunakaleiwag babaw, walbalab, watinow. Kuneis kumulis ven babaw gimgilis, kwatimlakes gunaked, kubaptayses Tamag Yowbad yagan waseg, Natun yey yagag waseg, o Kululuwan Townen Bwanabwein yagan waseg; kwatimlakes bivnases kid agulivan townen nasekeimiy. Peinan yam babaw sigwey yakamiy bitasesus ee... igaw mo beikous ven watinow.”

**KALEIWAG KWEIVAW**  
**The New Testament in the Muyuw Language of Papua**  
**New Guinea**  
**Nupela Testamen long tokples Muyuw long Niugini**  
Copyright © 1976, 1993 The Bible Society of Papua New Guinea

Language: Muyuw

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0. You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-30

---

PDF generated using Haiola and XeLaTeX on 11 Nov 2022 from source files dated 9 Oct 2020

517ae3da-6769-54e8-8afd-7d53f958558c